

Дагъусттаннал адабият

16+


ISSN 0235-0165

ЦӀубарз

ЛИТЕРАТУРАЛУЛ ВА ПОЛИТИКАЛУЛ ЖУРНАЛ

2/2019
март - апрель

Буттал КӀанттул цӀанийса
дяввилий талай бивӀминна
хае дурса гьайӀал Гьази - Гьумук





ЦІубарз

КІива зуруй цал буккайсса
литературно-художественный
ва общественно-политический
журнал

2/2019

Двухмесячный
литературно-художественный
и общественно-политический
журнал

Учредитель:
Министерство информатизации,
связи и массовых коммуникаций
Республики Дагестан

КАЯЛУВЧИ - ХЪУНАМА РЕДАКТОР
Мурад АхІмадов

Итабакълакьиссар
1952 шиная шинмай

Аь. Исмяилов - хъунама
редакторнал хъириувчу

*Журнал основан в 1952 году
Расулом Гамзатовым*

РЕДКОЛЛЕГИЯ:

2/2019

март - апрель

Государственное
бюджетное учреждение
Республики Дагестан
“Редакция республиканских лите-
ратурных журналов “Соколенок”
и “Литературный Дагестан”

С. АхІмадов

Э. Аьбдуллаев

Р. Башаев

М. Давьдов

Х. Илиясов (*редактор*)

К. Мазаев

Сс. Увайсов

С. ХІажиева

И. МахІаммадов

С. Къасумов

Электронный адрес редакции:
litdag@mail.ru

ПОЭЗИЯ

С.Стальский. Шаэрнал даву – бюхттулсса давури.....	3
Ж.Абуева. Да, изу, Сурхай-хан!.....	6
И.МахIаммадов. На гьуркку давияв щалла дуниял.....	9
Сс.Увайсов. Арснал арснал Каримлун.....	11
Б.Гъазиева. Шанашула, шанашу.....	16

ЖАГЫЛССА ЧIУРДУ

К.Увайсова. Жулла дянив дуньял дур.....	24
А.АхIмадова. Назмурду.....	27
А.МихIадова. Буттал шяраву.....	29

ПОЭЗИЯ

М. Давыдов. Цашиврул байрам.....	31
----------------------------------	----

ПУБЛИЦИСТИКА

ХI. ХIусайнов. Ссавнил лувсса мйыва тав.....	34
А. Аьбдуллаева. Аьбдурашид МахIаммадов: «Дагъусттан криминаллунул республика дакъар.».....	42
С.ХIажиева. Талай лавгсса оьрму.....	46
И. Саидова. Гьинтнил хьхьунил асарду. Укунминнайри медицина дарцIуну дусса. Заннала хIакинну ляхьан увма.....	51
Х. Илиясов. Ихтилатру.....	60
Б. Аьлиева. Цинявннал зума-мазрайсса шаэр.....	79
<i>Мариян Илиясова дакIнийн бутлай.</i>	81

ТАРЖУМАРТТУ

Р.Тагор. Ттул Бенгалия.....	87
М.АхIмадов. Назмурду.....	87

КРИТИКА ВА БИБЛИОГРАФИЯ

П.Магьдиева. Лакрал литературалул дарсеру музыкалуцIун дархIуну лахьхьаву.....	89
--	----

Регистрационный номер: серия ПИ №ТУ05-00410
выдан Управлением Роскомнадзора по Республике Дагестан от 22.04. 2019 г.

Новолуние №2

март - апрель
На лакском языке

Выход в свет 18.05. 2019 г.
Тираж 407 экз
Печать офсетная. Бумага офсетная
Формат 70х108 1/16
Усл.печ. л. 8,4. Усл. изд. л. 8,7
Заказ № 374
Цена свободная.

Типография: ООО «Издательство «Феникс - пресс»
Адрес типографии: 367018, РД, г. Махачкала, пр-т Петра I, 61

Редакция и издатель: Государственное бюджетное учреждение Республики Дагестан
“Редакция республиканских литературных журналов
“Соколенок” и “Литературный Дагестан”.
Адрес редакции и издателя: 367000, РД, г. Махачкала, ул. Даниялова, д. 55.

Поэзия

Ханбиче ХАМЕТОВА,
Дагъустаннал халкъуннал шаэр



ШАЭРНАЛМУР ДАВУ – БЮХТТУЛССА ДАВУРИ

(С.Стальскийн 150 шин шаврийн хас буллалиссар)

Гьарца шинал 18-мур майрай Дагъустаннай кIицI лагай шаэр-патриот, интернационалист ва жяматийсса ишккакку Сулейман Стальский увсса кьини.

Шаэргал личIи-личIисса бикIай.Цавай ливтIукун, гайннал балайрдугу литIай; цаймий ливтIукун, цалва балайрдал абадлий уттава бувну льякьай. Сулаймангу абад хьуссар. Мунияту халкъуннал дакIурдал марцIсса щаращаву яхьуссар ганал кьянатсса ва кьянкья-кьурчIисса балай.



Кьулчинмур аьсрулул Гомер хьун нясивну бивкIсса чувнал бакIрачIан тамансса бивкIссар. Ккашил кьяивчIансса кьисматрах луглай, ганан зун багьссар Гянжалив, Дянивмур Азиянал бургьил ччуччин бувсса авлахьирт-тай Сырьдарьялуй ламу буллай, Бакуйннал нефтепромыслардай. Кьура шинай, дуниял «датлай» занай, чIявусса ккавказсар Сулайманнун. «Яла-яла ттун бувчIуна захIматкашнан жапану бушиву», - тIий ур га цалва дакIнин бичавурттаву. Амма захIматшивурттаца га лахIан ан кьябювхьуну ур. «Сагьну уссаксса, шаэрнаща, кьяцI бивгьуну, ацIан кьашайссар. Ххуймур ккавказний, га шад уккавантIиссар, оьмур ккавказний – пашман шавантIиссар.Цалва

асарду лабитан ганаща кьахьунтIиссар...»

Цалва шеърирдаву га ур насихIатру буслай, оьрму ххуй чулинмай баххана бансса кьяйдарду буслай. Сулайман ур цалва шеърирду хас буллай халкъуннан: га чичлай ур гайннал ххаришивурттая ва дардирдая. ЧIун ларгукун, чIалан бивкIунни Сулайманнул шеърирдаву яла гужмий бушиву лирикимий ва

философиялул мяъналул бувцIумий, динналиямий ва ччавриямий. ТIайламур бусан, сакин бувултрал ва таржумачитурал гъаз бувну бур ва халкъунनावух ппив буллай бивкIун бур ганал одарду, мунихтуну авадансса творчество мискинну чIалачIи дурну дур. Переводчиктурал цалвамий пикрирду бивчуну бур ганал шеърирдавун, даххана дурну дур мяъна, баччан бувну бур авторналмий пикрирду.

Сулайман Стальский – XX-мур аьсрулул Гомерди, дагъусттаннал совет литературалул гъану бивзмари. Му цинявннан кIулссар. Мукунма кIулссар совет заманнай ганал творчество тIутIайх дирчушиву. Амма чIявучин къакIулссар култ личностьрал шиннардий ганал бакIрачIан бувкIмур.

30-ку шиннардий «социальный заказрал» тIалавшинна гужлан хьуссар. Одарду ляхъан бан шайсса, гьунар бусса шаэр Сулайман, ккалли уллан бивкIссар политикийсса лирикнан. Амма Стальский так «кIюрххил буккай чанна цIукуя» бакъа къачичлай къаивкIссар. Ганан аьлтта чIалай диркIссар хIукума-трайсса диялдакъашивуртту ва тIайладакъашивуртту. Ганал шялусса образ хIасул хьуссар укунсса иширайну: маз баву, гьуш чаву, бухьттан бишаву, къадармур, къюркъумур дащуй дихълахьимий шеърирду тинмай къабивтун, «уссурвалсса миллатирттал» мазурдийн таржума къабувну, халкъунनावух гузла буллай бивкIаву хьуниминная цIарду цаву дурмий.

С. Стальский ва дурккучув XI. XИажибагов дустал бивкIссар. XИажибаговлул хьунмасса захIмат бивхьуссар Стальскийл революция хьуннинсса ва хьуну махъсса творчество аьч дан ва низамрайн дущин. Ганал азарвахьул ххару оьрусрайн таржума бувссар. Мукунма «Ватанналиясса пикрирду», «Дагъусттаннаясса балай» тIисса поэмарду накьлу бувссар. «МарцIну бувтсса оьрму» тIисса луттирай муния Н. Къапиева чичлай бур. 1977 шинал авгъуст зуруй, XИажибагов увгъусса чIумал, Сулайман МахIачкъалалив увкIсса куц буслай бур ганал шацар, Бакуй ялапар хъанахьисса Зулайхат Султанова. Цана хьинну кIулсса XИажибагов «халкъуннал душман» акъашиву балжи бан увкIсса халкъуннал шаэрнащал гьалгъавугу тIун ччай цучIав къаивкIссар. ЧIалкъавхьуну ганан бавссар Н. Самурскийгу увгъушиву. Профессор Аь. Аьликберовлул бусласаврийн бувну, угъарасса шаэрнал дард ххи хьуссар Н. Самурскин кIанай Обкомрал цалчинма секретарьну увкIсса Сорокиннул ва Дагъусттаннал НКВД-лул хьунама Ломоносовлул цаява тIалав бувкун, гай халкъуннал душмантал дащуй бихълахьисса, гайннай аьйб дуллалисса шеърирду чичаву. Шаэрнал му амру биттур къабувссар. Ганал куссар: «ТIайламур бусан бучIину бакъар, къатIайламур чичлан ттуца къабюхъанссар.» Амма ганал ялагу куссар: «Агана зумув рухI дуну ухьурча, шаэр къаагъну ацIан къабюхъайссар.» Микку га авчуссар гьалгъа тIун. 1937 шинал 7 ноябрь-даний Лениннул майданив ганал, махьгу лавхьуну, шеърирдугу бувккуссар. Халкъуннан на даин увчIайвав, ттигу увчIинссара тIисса ххару бивкIссар гай шеърирдаву. Сорокин ва Ломоносов лап рязий бакъа бивкIссар. Чумул цинцилтту зия хьуну душиву бувчIуну, га махьунай шяравун зана хьуссар

лап пашманну. Цаппара гъантрава, 1937 шинал 23 ноябрьданий га ивкIуссар. 30-ку шиннардил репрессиярдал чIун ганаща духIан кърхъуссар. Яла-яла Н.Самурский, XI.ХIажибагов, М.Далгат, К.Мамедбагов ясир баву ганан къащи хъуссар.

СССР-данул Верховный советрал депутатъгуравунсса кандидатну къамул увсса ганахъ куссар Н.Самурский ва га кунмамий дащуй бихълайсса шеъри чича куну. Амма ганал къачивчссар.

1925 шинал ганая увссар Дагъцикрал член, 1934 шинал халкъуннал шаэрнал цIа дуллуссар. Къасумкантуллал районналийн С.Стальскийл район чайссар. Гава районналий Ашагъа-сталь тIисса Сулайман ляхъусса шярвалугу дуссар. Шаэрнал хIурматран 18-майрай Поэзиялул къинилул байрам дувайссар. Ганаяту аьщуйн щунну куну бур В.Луговскойлул: «С.Стальскийл шеърирду дакIнивун бухлай бур. Гайннуву бур жулла ххувшавуртгал ххурхху... Ганал цалва миллатрахсса ччаву муксса гужсса диркIун дурхха, га диял хъуну дур шалва Дагъусттаннангу, Кавказнангу, Совет билаятрангу.» Мийжаннугу, хIакъсса махъру куну бур хIакъсса шаэрная.

*Дугъан къритан цув пана дуниял,
Най дур чуннив, цирив цинна къакIулу,
Нач хъунмур хъинмунин дурну хIисав-ккал
Цурда ци зиссарив, цинна къакIулу.*

*Инсантал бур чахъран тти хIисав буллай,
Гайннал бурхIардия ппалгу бур дукълай.
Хъудугъултри учай, хIухIалри учай,
Къурнил даву кIулсса цучIав къалякъай.*

*Мукъурттил дугълай бур утти хъуругу,
Даву дансса цучIав акъассар чIалай,
Ххаржан дан ччай уссар бурчул къуру бу,
Мах-чаннан къахъанай уна личIи дан...*

**Лазги мазрая.
Таржума – Хизри Илиясовлул.**



Жанна АБУЕВА

ДА, ИЗУ, СУРХАЙ-ХАН!

*Га лап хьинну авьсса авьзал-заманнай
Жула лакрал улча лап чантІну бивкІссар,
Гъумучиял къувват сий дуну бивкІссар,
Лахъсса давурттайну лавайну бивкІссар.*

*Ттул Лакку улклуйсса бюхттул барзунтту
Абадул абадлий пахрурдай буссар.
Бюхттулсса барзунттал бакІру чаннассар,
Зунттал ас лахъ бувсса арсеру чІявуссар.*

*Чулахъ Сурхай-хан ва хан Мюртазали,
Башир, Абдулкъадир ва Эмран-баггу –
Гай хьинну бюхттулсса лакрал виртталли,
Абадул абадлий бюхттулну ливчІссар.*

*Къириятрал цІаний гай талай бивкІссар,
Халкъ бачинбувутну мудангу бивкІссар.
БачІсса Дагъусттан гайнналва бивкІссар,
Га бюхттул бан мудан гай царай бивкІссар.*

*Виричувсса тарих уттава буллай,
Душмантурал хъхъичІ гай бавцІунма бивкІссар.
Къириятрал цІаний цІаравун ххяхлай,
Ца щихъхъунчІав мадад гъич къабуллуссар.*

*ХІакъину цимурца лерицун ларгунни.
Зу лахъ бувсса ххуллу ялавай бунни.
Лещан къаданишверул яхІирай бивкІсса,
Лещангу дурунни яхІ ва къирият.*

*Гъази-Гъумук улча бакъава хъунни.
Виричувишвертту хъамадиртунни.
ЯхІ ва къириятгу хъулук ливчІунни.
Лавгмунийн пуй куну, ялавай хъунни.*

Да, изу, Сурхай-хан, чIуннича изан,
ЧIуннича лакрал цIа дирчIан къадитан,
Изуча, ццах чин ба ва Лакку улча,
Хъунишанул увгъуну цучIав акъарча!

Да, изу, Сурхай-хан, лагмава ургу,
Къириятрал цIурду миллатран дула,
Адав ва къирият духлаган дурну,
ДирчIан дурну дурча инсапрал къартта!

Миллатрал къирият хъамара диртун,
Инсанишуву арцух дахлайнма бурча.
Дяъвидал цIараву къаччувчусса лак,
Хъус-хъиншиврл цIаний ччуччин буннича.

Ваксса укун миллат палачат буллай,
ПарабакIуйн лахълай чансса бакъарча,
Иттату паранну парх учин дурну,
Гай къадарсса чиваркI луххайн буккан ба.

ЛавхIуну лавгунни Гъази-Гъумучи,
Ина ццах чин дува утти гайннал рухI.
Иная, Сурхай-хан, лак бюхттул бувсса,
Лакрал къириятгу лап ларай дурсса.

Гъич чара бакъассар, чантI учинтIиссар
ЯхI-къирият дусса лакрал виртталгу,
Лагъартуннал цинзир руцари дурну,
ЦIуница бюхттулну гай лахъ хъунтIиссар.

ПАРТИУ ПАТИМА

Ци бусалалулла ина лахъ бувсса?
Цумур балайлулла бюхттулгу бувсса?
Бювхъусса вил чурххал къалиправугу,
Агъ, цукунсса гужери лабивкIун бивкIсса?

БакIралгу, чурххалгу хъинну бювхъуну,
Лявхъунгу бура лакрал аьрицарай.
Бусалдаравусса му вил ишара
Абадул абадлий хъхъичI дарцIунна дур.

Нартнал кунмасса гуже чурххай къабивкIиссар,
Нартнаяр гужесса рухI вил мудан диркIиссар,
Буттал улча ябан рухIралгу вихъхъун
Дуллуссар къалхангу, тургу канихъхъун.

*Га рухІрал душманнайн ххяххан бувссара,
Виричувсса дакІнил гужгу буллуссар,
Вилла караматсса чувшивурттайну
Чувнаяр бюхттулну ина ливчІссара.*

*Халкъуннал дакІниву ина буссара,
Вил цІанингу тачІав бивкІу бакъассар,
Щюллисса кІаччину цал ттигу ина
Алвагъсса мархрава личинтІиссара.*

ГЪАЗИ-ГЪУМУЧИЯЛ КЪУЙСУ

*Бюхттул барзунттал бакІай
КІяласса занчру буссар.
Барзунттал ухнилухгу
Къуйсу экъи най дуссар.*

*Хъиннура гъалак хъуний,
Гъалакнуну ххурхху чайссар.
Паракъатну нанийни,
Авара къабикІайссар.*

*Паракъатну най диркІун,
Кувний гъалак дуккайссар,
Ганих та бургарчагу,
ДакІ мудан ххари шайссар.*

*Мий бюхттулсса ххяллавух
Найна дура, жул Хъуннех.
ТачІав хъуннар къашара,
Оърмулуцал дачара.*

ЛЕХХАВУ

*Аъзиятрай къуману
На леххаву тІий бура:
Миллатрайн бала бутлай,
Ххуттава маличларду!*

*«Талаталтру» тІий бурув,
Зулвагу оърчІру буна?
ОърчІкІурисса арцул
ОърчІкІури хъун бурув?*

*ОъІалишиву ппив дуллай,
Оъ бивкІун циван буру?
Къадарсса тІуллу дуллай,
Къадар хъанай цан буру?*

*На леххаву тІий бура,
Леххаву тІун багълай тІий:
Дуржагърал цІурду лахълай,
Дуржагъ ласун ччай бурув?*

*КІулли чачан душиругу
Лап къурчІину бушиву,
КъурчІишивурттал къуртти
Гай хІачІлайнма бушиву.*

*Иблисрацал дус хъуну,
Зал хъама итан ардув?
Ниттил буллусса ккукку
Сан къабуллан къаст хъури?*

*Аъркинсса ххуллу-ххагу
БакІрава буккан бувну,
ОъІалсса дяъвилул цІу
Зу кІиен дурну буру.*

*Ниттихъал зун дакъарив
Ва дуниял дуллусса?
Зуйн хъунмасса умудгу
Гайннал бакъаяв бивкІсса?*

*Зу дуллалимур циру?
Бусурмантал бакъарув?
Динни тІий зулва ххуллу,
Ххурххуппалувн цан бувхру?*

*Ниттихъал арсру байсса
Гъарзад ккуччу дулланив?
Цайминнал арсру литІлан
Гайннал хъуни байссарив?*

Да, оърчIрув, бацIияра,
На леххаву тIий бура,
Жулва щалвагу Кавказ
Къюкьин буллай цан буру?

Дяъвилул арсру хъанай,
Язугъну буру матIру!
БацIияра! Миннатри,
Миннатгу къамул бара.

Оърус мазрая таржума бувссар
МАЗЯЙХЪАЛ Казбеклул.

Илияс МАХIАММАДОВ

НА ГЪУРККУ ДАВИЯВ ЩАЛЛА ДУНИЯЛ

АьтIисса чIивитIул
КIану гъуркку тIий,
Нину дур балай тIий
Лагъсса чIукIалий.

На гъуркку давияв
Дуниял щалла,

Балайгу чивияв
Шайкун ттуцава.

Так къааьтIунишврл
ОърчIру мюрцисса,
Тяхъану гъанишврл
Оърму оърчIнийсса.

НА ЗУНТТАЛ ЧУВРА

Ттул чаннасса пикри – бургъил тIинттаяр,
Ва марцIсса ттул дакIгу – ливцI щарацаяр,
Анаварсса буци – чявхъа-гъараяр,
Ттул илкинишвугу – зунттал барзуяр.
Хъазамраву къюкIгу – асланналуяр,
Адав, яхI, намусгу – ттул миллатраяр.
На ура зунтталчув, занч мютIий байсса,
Дуснан хIурмат бусса, душман ххит айсса.

Къаччива къадаргу цамур ванияр,
Цу уссар чумартсса зунттал чувнаяр?
Къаччива аьрцигу цамур ванияр,
Ци дуссар бюхттулсса вай ттул зунттаяр!

ЛЕЩАН ДАРА ЦІУРДУ ВА ДУНИЯЛЛИЙ

*Цумири, тти, вай цари
Дявѣилул ххуллийн бувксса,
Цари ттигу цѣуницѣа
Царал кѣавтѣи кѣиллайсса?*

*Ссуттил ттарацѣ марцѣ дуллаѣ,
Дуван кѣавхѣуссар – учай,
Ца муриѣату дахѣиннин,
Тамур муриѣун цѣинцѣ дагѣлай.*

*Дуниялгу, – хѣунна ттарацѣ,
Кѣабюхѣлай дур дуван марцѣ,*

*Ца кѣавтѣи лещан баннин,
Цамур кѣанттай цѣу лачѣлай.*

*Хѣалал-жѣалалну яхѣун
Битлай бакѣар инсантал,
Цивппа каялутал хѣун –
Мурчѣи-чѣавкѣи политиктал.*

*Кѣачѣунниѣ, таллагѣ, чѣунни,
Бувчѣинуксса чѣун хѣунни,
Лавсун кѣуркѣачѣатуллух
Ххартѣи дан дунѣяллий гѣар пух.*

АБАДУЛ-АБАДЛИЙ

*Бити бан цѣйминнал
Чарттал кѣаларду,
Хѣуслих кѣаних бувкнал –
Мусил бакѣурду.*

*Чумул кѣалияйсса
Кѣала бакѣассар,
Гания личѣайсса
Так ца хѣархѣалар.*

*Агар, личѣайхѣурча
Кѣурчѣулттѣуѣу цѣин,
Винма кѣулхѣун ччарча,
Хѣусгу – тара цѣин.*

*Абадул-абадлий
Ва дунѣяллий,
Кѣулли личѣансса
Назмурду чирчсса.*

* * *

*Цирив ца гѣалакишѣу
Дагѣну дур ттул дакѣниѣун,
Кѣюкѣгу дур хѣювусулну
Кѣавхѣ тѣий оѣ туннурдавун.*

*Ххяххан бувсса чу кунма,
Ссѣхѣ ласун мугѣлат бакѣа,
Чунгу дур лерчун найнна,
Бурттигѣухѣ рухсат бакѣа.*

*Ххяххан ба, хѣхѣури дакѣуй,
Ина цѣл даѣгѣуссара?
Чув-унугу, ца яхѣуй
Нагу палцѣи уванссара.*

*На кунмасса цѣкссагу
Ина яла бивчуссар,
Уттигу чан кѣахѣунссар
Кѣатѣи бувансса цѣкссагу.*

БАЛЛАЙ БУР УТТИГУ

*Битѣу-ххитѣу бур ттигу
Шагѣрулул кучардаѣу.
Кѣуллугѣрал зувал ттигу
Увтѣуссар цѣу-унугу.*

*Ччувчѣуссар ттигу кѣатта
Цуриѣ-ца чиновникнал,
Оѣккѣсса бала-хатѣа
Бивссар хар-хавар бакѣа.*

Уттигу бутта акъа
Ливчуссар щиллив оърчIру,
Щащаргу банбит бакъа.
Цу утавивав ттигу?

Дуссияхха аьдатру
Бувайсса маслихIатру,

Ттизаманнул маслихIат –
Я ккулла, я бугъ ай хIатI.

Аьрасай хIукуматрай
Инсаннал кьимат – шагъи,
Инсан бусрав-хIурматрай
Ччиссия ттун, таллагъий!

ЯТИНССА ЧЧАВУ

Ттул ятинсса ччаврил
Бара – ца цIубарз,
Бусайхха яруннал,
Ссан аьркинссар маз.

Душ, къавихрав юхсса
ХIакъшиврий ччаву?
Муниллхха дурсса
Ттул дакIний цаву.

Бюхъайссар ттул махъру
ДакIнийхтунусса
Бур учин ца къакру
ХIанттивух кусса.

Цибави, акъара
Мазрал пасихIсса,
ДакIгу дур макъара
Ччаврил ххялирчIсса.

Агъ, ххирай, кIулния
Вин ччаву цирив,

ТтулIив ххяхханссия
КIинттулгу арев.

Ина ххива талихI
Ттунма буллусса,
БивкIун бура таммихI
Оьрмуллул бувсса.

Ттигу зана хъунссар
Инт цимилагу,
Цимилгу бичинссар
ТтулIайх къупругу.

Даиман личIанссар
ДакIниву цIалай,
Ччаврил цIарал кIивсса
КIирисса кIалай.

Ттул муданнасса дард,
Ятинсса ччавуй,
Утанссар ина нарт,
Хъин къашай цавууй.

Ссугъури УВАЙСОВ,
Дагъустаннал халкъуннал шаэр

АРСНАЛ АРСНАН КАРИМЛУН

ЦЦарду дур зунттангу,
Ссавний цIурттангу,
ЦЦарду дур ардангу,
Ранг-ранг тIутIангу.
ХIатта хIайвант бакъар

ЦЦарду дакъасса,
Лелуххантрангу дур
ЦЦарду ранг-рангсса.
Инсанталгу бакъар
ЦЦарду дакъасса,

Оьрмугу гайннал бур
Цардаицал найсса.
Бур цIарду лайкъ хьуну,
ЦIурду лархьссагу,
Оьрмулува лавгун,
ЦIарду лирчIссагу.
Ина жун Аллагнал
ЧIатIий гьан унна,
ЧIюлу бан, тирх чин бан
Жул царнил умма...
Хьунишврл вияту

Чув цIанин хIакьсса,
Ххариишуву дарду
ЦIа бюхттул дансса.
ЦIардаву лайкъмур цIа
Жу вин дизарду,
Му цIа вин барча дан,
ЦIурду лахьарду,
ЦIурттачIан гьаз хьуннав
Жу вин дирзу цIа!
Пахрулий личIаннав,
Арс, миллат вицIа!

МУРАД КЪАЖЛАЕВЛУН

Махь мукьурттин хас буллай,
На назмурду чичара,
Макьаннал цIурду лахьлай,
Ина къавтIи бичара.

Мурчаицал бястлий найсса
Гуж гьавасрал оьру чай
Вил макьаннах мюхтажсса
Жул дакIру лерххун дачай.

ДакIурдивун марч хьуну,
Вил кIири вирхху буххай,
Макьаннал суру хьуну,
Гьавас савруннайн леххай.

Вил пагьмулул лелуххул
Аргь жагьилна личIаннав!
Вил макьаннал ххурххулул
Чу дуньяллийх чIа хьуннав!

ССАПАРБАГ АЬЛИЕВЛУН

Инсан ххуллийн уккай
Буттал къатлува
Оьрмулул хьхьиривун,
ТалихIрах луглай.
Къабуккайссархха га
МурчIинал хьхьичIун,
«Ванача на, вилва
Яру тIитIа!» – тIий.

ТалихIрал кIуллук,
КIулагу ляркъуну,
АвицIуну ура
Инава лайкъ бувсса
Къатлул къункьуллук.

Инсан ххуллийн уккай,
Каругу рартIун,
ТалихI лайкъ бай ганал
ЗахIматрал ххуллий.
Чявхьа гьаравухгу
Луглай уну тIий.
Ина ссапарданий
Увккун най ияв,
Оьрмулуву луглай

Къатлувумур бакъар
ТалихIрал къимат,
ХIатта бухьурчагу
Га хIалал бувсса.
ДакI аваданишвур
Ххуймунил сурат,
Лагма инсантурайх
ЧIа дуллалисса.

Виву жям хьуну бур
Аьчухсса бакIгу,
Инсантурайх дачIин
ХIадурсса дакIгу.

БУТТАЕВА АСИЯТЛУН

*Къяркъаравугу га
Дуну тлий мудан марцисса,
Чапалишиврвугу га
Дуну тлий пар-пар тисса,
Жу вийн хIурматрай чару:
«Агъ, жул мусил Асият»,
Виву къюлтIну дуну тлий,
Инсанишиврул хасият.*

*Вил бакIраву аькълу бур
Лагмаминнайх чIа бансса,
ДакIниву лархъун цIу дур,
Аьвкъума гъели ансса.
Мяи чинсса дур хасият
Тарбиялул жям дурсса.
Барчаллагъ вин, Асият,
Ина мукунсса бусса!*

МАРИТА МУГАДОВАН

*Дагъусттаннал цархъаву
Пагъмурдал цIурдах луглай,
Гай халкъуннан аьлтту дан,
ХIакъсса хIарачат буллай,
Ина цIучи ририцуну,
НувчIува пар ливчунни,*

*Гай цIурду цачIун дурну,
ХIакъсса къавтIи бивчунни.
ЧIявусса бур вил цIурдал,
Маритай, гъели бувсса,
Инсанишиву суратрал
Къимат вин пишкаш бувсса.*

ЮРИЙ ГРИНКОЛУН

*Вил гитаралул чIурдал
ЧIявусса хIайран бунни,
Мюриш гъарал кIунтIру хъуну,
Халкъуннавун зивзунни.
Буллай ивкIсса хIарачат
Барачатну лявкъунни,*

*Вил тарбиялул наслу
Илланувух чIа хъунни.
Ттун гитаралул чIурду
ЧIявуну бур тти баллай,
Вил захIматрал къимат бур
Гай чIурдава гъаз хъанай.*

МАХIАММАД-ЗАГЪИД АМИНОВЛУН

*Бивтуссар, дус, ина аслийсса ххулу,
ХъхъичIун багъ чартту ва къунттугу букълай,
Неххардил аьтарттал жиндрал ажартту
Къянкъасса къасттирах бигъану къукълай.
ХIухчалтрачIа ина хъуссара зунттай,
Ккавкссар вин лахъ баргъгу бюрунттал къурттай,
Цир дусса кIа Лаккуй вин къаккарккусса?
Ссалли вил му дакIнийн асар къабувсса?
Бивтуссар, дус, ина аслийсса ххулу,
ХъхъичIун багъ чартту ва къунттугу букълай,
Циксса къабикIанссар хъириг нанисса.
Вил цIагу кIицI дуллай, виха зукълайсса?
Юх, дус, вийн учинссар: «Ва мискин акъар!»
«Ванал авадашив!» – учин лайкъссара,
Махъминнан къабивтун чаннасса къадар,
Цансса къадарданул увцун лавгссара.
Ххулу тIивтIссар ина инава вичIан,
ТитIайсса кунма га цайхнал гъаттачIан.*

АРСНАХЪ ЭЛЬДАРДУХЪ

*Вил иттав чани буссаксса,
ТиртГун дур ттул дуниял.
Вил чурххаву аргъ дуссаксса,
Чан къашай ттул чурххал хІал.
Ина цІуллуну уссаксса,
Къашайшиив мацІуххав ттухъ,
Вил яруннавух уруглай
Ура, арс, на оърмулух.*

*Ура вищал ччаву дуллай
Дан къабювхъусса душних.
Ура умудрай уруглай
На вил талихІрал бургъих.
Ура вил каруннах битлай
Биттун къавхъу гъивчругу,
Вищал ура, арс, лавсун най
Ва оърмулул чичругу.*

АРСНАХЪ АРСЕННУХЪ

*Бургъил тІинтту вил къатлувун
КІюрххил чаннацал дурхай,
Мурхъирал овъчай ххютулун,
КІирил ччувччун най уххай.
Щарацив бур вих буруглай
Чаннасса яру хъуну,
Арду дур вил ччаннацІ тІитІлай,
ТІутІал халича хъуну.*

*Зунтурду бур хъхъичІ бавцІуну,
Жул лахъшиврийн гъаз хъу тІий.
Ххуллурду бур хъхъичІ тІивтІуну,
Вина ччинийн ачу тІий.
Вил бакІрацІ дур бюхттулсса ссав,
ЧчаннацІ-куртІсса хъхъирирду...
Жям дурну, арс, дакІнил массав,
Укку аьч бан пикрирду!*

ХІУСАЙН КАМАЛОВЛУН

*Ттул оърму лавгунни
Инсаннах луглай,
Инсанишвирул сурат
ДакІниву дусса.
Амма ттун га ххуллул
ЛахІу-лахІуннтай
Лап чансса ккавккунни
Ина кунмасса.*

*Элмулул къудрат вил
Лахъсса дунугу,*

*Къаккавкссар ттун ина
ДакІ хъунишиив дурну.
ХІал чанну унугу,
ЧІун дакъанугу,
Вил дакІнил нузру ттун
Ккаккай тІиртІуну.
ЧІяву хъуннав лагма
Ина кунмасса –
ХІалимишвирул кІуллах
ДакІру тІитІлайсса!*

МАЗАГЪИБ ШАРИПОВЛУН

*ДакІнивун дурххукун,
Дус, вил макъанну,
Ттул хъхъичІ бацІай Макка –
КІа буттал кІану:
ЦІан дара, аьчух ссав,
Зунтурду, къурду,*

*Мурчардил тІуркІурду,
Неххал ххурххурду,
Лелуххантрал ссуру,
Ссав кІукІлакІисса,
Ниттихъал балайрду,
КІанттух тІутІисса.*

УВАЙСХЪАЛ ДАВДИН

*Бюхттулеса кIа Заннал вин
ХIакъсса къисмат буллун бур –
Вил дакI гъарнан аьчухну
ТиртIусса ссупрану дур.*

*Жяматрал чIарав бавцIнал
БакIчий хьуну нанисса,
Жул дакIурдил куртIниву
ВицIар хьун пахру бусса.*

*ЖяматрачIа цIа лайкъ дан,
ХIарачат буллай ура,
Гайннал къини чанна дан,
Чирахьну лахьлай ура.*

*ХIарачат хIалал хьуну,
Вил тIювай барчат бур.
Дуллайсса давурттая
Лагмамий рязину бур.*

*Вил оьрмулул чанигу,
ДакIнивусса имангу,
Пахрулул ца чирахьну
Жяматраин лавхьуну бур.*

*Мунияту жу буру
КIа Аллагънайн лабизлай,
Гъаннав тIий вил му оьрму
Цуллу-сагьну аргъ дизлай.*

*Къимат бищун кIулманал
Вил къиматгу бишлай бур,
ДакIниву, урувгманан,
Инсанишву чIалай дур.*

*ДакIнил аргъиран лавхьсса
Дуниял вин тIитIиннав!
ТIайлабацIулуцал Зал
ВицIал архIал изаннав!*

ХIУСМАННУН

*Инсантуран инсан ухьурча санну,
ИкIантIиссар бутлай оьрму инсанну...
Лавгунни ттул оьрму лагма уруглай,
Инсанишву дусса инсаннах луглай.*

*Оьрму бикIанссия, агъ, ца мискинсса,
Бакъа бивкIессания лагма мукунсса...
ДахIалай, бушиву дакI ххари дансса –
Ххирасса дус, ХIусман, ина кунмасса.*

*Баргьгу цир инсаннан, пикри буварча,
Баргь буркъай ххуйсса дус чIарав ухьурча!
ДакI къадачIирчагу рюмкалух вицIал,
Иссара на му вил инсанишвруцал.*

*Булуннав вин оьрму дакIнин тIивтIусса,
Бургьил къудрат дусса, интнил аргъ дусса!
Бизаннав лякълуя уммат дугьрисса,
Инава кунмасса, инсанишв дусса!*



Бахтгун ГЪАЗИЕВА

(80 шин)



ШАНАШУЛА ШАНАШУ

Хас буллай бура ттулва душинил душинил душинил

*Шанашу, ттул ххира души,
Цурттигу шанай бурча.
Ина шанан бивкIукун,
Шанан дикIайча хъхъугу.*

*Ссавгу цIурттал дурцIунни,
Зурул симан тIиртIунни.
Шанашу, ттул ссурухIий,
Вин дуниял тIитIивуй.*

*Шанашу, ттул чIивитIуй,
Мурадиран дур ссихъуй,
Мюрици малаиктурал
Ххира буллай лякъивуй.*

*КIюрххил вищал чантI учай
Къанчуллалу хъхъиругу,
Тяхъасса чIурдал дуцIай
Щалара дуниялгу.*

*Шанашу, ляълужавгъар,
Дунияллул ххуйшивуй,
Баргъгу лавгунни шанан
КIюрххила бизаншиврул.*

*Шанашу, ттул чIивитIуй,
Дунияллул ххуйшивуй!*

* * *

Хас буллай бура хъунасса шаэр, чичу, драматург Мирза Давыдовлун...

*Ниттил ув къинилуцал
Къини вихъ барча дуллай,
Ча тIий бура цIуллусса
Сагъсса, ххарисса оърму.*

*Ихтилатгу пасихIсса,
Бусай мазгу нацIусса,
Гъарца чувнан бусравсса,
Жул аьшукъ, жул тIиртIу дакI.*

Жул даКгу ххари дайма,
Жу тІайла бацІан бுவма,
Сагъну ина личІаннав,
Ттуруира шин хъунадакъин.

Ххяххабургъил тІанттугу
Вин пиикаш дувавияв.
Му вил бюхттулишивручІа
Мигу чанни чивияв.

ТТУН ИНА ХХИРАРА!

Ттун ина ххира хъунна
Фермалий зузи чІумал,
ХъхъичІунминнал дяниву
ХІурматрал улттуй буний.

Ялагу ххира хъунна,
Варакъигу хъарайну,
Начлилну «Ивзрав!» куну,
ХІаллих чІарах бувккуний.

Хъиннува ххира хъунна
ЛачІал хъуру ттихІайни,
Шамуннал бачин байсса
Маша бачин бай чІумал.

Ттеркъукъивъяв къакІула
Вил зумату зизлайсса,
Ттуйва бияла бакъа
Вил хъиригъив най льякъайвав.

ХІУХЧИЛ ВАРСИ

Бюхттулсса ссавгу – магъи,
ХІухчил варсигу – виргъан,
КІукІлусса цюллисса кавс –
Мугу ттул ппалул шану.

Яттин гузатрай уна
Гъан дара вищал хъхъурду.

Чани хъуннин варсуву,
ЛачІлачІисса гъараву,

Зунттайсса ттул магъигу,
Шанугу бур ва варси.
Та хъунавав, ххирамур,
Жула ялув ца магъи?

ХЪУННАРШИВУ

Ца зад кІилийну чІалай,
Иттах ттурлу даркъукун,
Зумув зувира ккарччи,
Ца-цаних къатІ увкुकун,
Аьсив дуккай дикІул дакІ,
Хъунмав хъуссарав тІий.

Урувгма хІайран айсса
Ццузурул симанналий.
ХІаллих цаннил чІарах ца
ЖигратІрурду дагъукун,
ХъуручІ кунма лухІисса
ХІаллурду кІяла хъувкун,
Авлул кунна, дирисса
Ликкурттай хІал чан хъувкун,
Ттулла дакІ нара дуллай,
Ттухъва нава учара:
«Ва хъуннаришиверувугу
ДиркІун дур бусравшиву».

Чаврдай кюнтІуллив багълай,
Мурччив вив хъхъупІ диркІукун,
Бувайсса ихтилатрав
ГъалатІ хъанан бивкІукун.

КЪУКЪУХЪХЫ

*Жул тІутІул багъравусса
Дарвач мусил къукъухъхий,
Ина щил тІайла бувра
Жул мурхъирай кюру бан?*

*Бургъиягу лавивкІун,
ЧапІаву кюру бувну,*

*Ца-цаних къеппагу тІий,
Канай бурав бив-бивмий?*

*Щил тІайла буварчангу,
Цал ахир хайр дуваннав,
РахІат хъанан дикІай дакІ,
Ина гъуркІан дурицукун.*

БУЦАЛА ЦА КОФЕЛУЛ

*БуцІала, ххирама, маччарал кюру
ИиттахІ багъуннича, мякъ лиххан банна.
ДакІнивусса дардру чан шайрив ккаккан
НахІала баннача мий нацІу щинал.*

*Мукъал къяехъа тІисса бакІраву яру,
Аьрцарайн лицІлай бур, царацив хъуну,
Бюхъайхха къакъан дан къакъадагъай макъ,
Хумаршиврул гъавас ялун ливчуну.*

*БуцІала, ххирама, ца ттигу буцІа
Мякъ лиххан банхъуви кайп къабарчангу,
Мискъалукссавагу талихІрал бутІа,
ЛахІзалийссавагу бучІирхха ттунгу.*

ИНА ЖУННИН БУЧІАРЧА

*Ина жуннин бучІайхту,
Къатлул чІирттал пперх кунни,
Пиш тІий калима дайхту,
Гъавагу аьч бувккунни.*

*Чув буссияв уттинин,
Дарвач мусил къукъухъхий,*

*Вих ялугълай ттул яру
МурчІи шавай бияхха.*

*Къакълакъисса банавша
Гъарал цІулаган дувай,
Ина жуннин бучІайхту,
ЦІулавгуннахха нагу.*

ДЕПУТАТЪТУРАН

*Явара, яттихІухчалт мюхчан бувара къарал,
ГъалбарцІру бур лагмава бучминнуйн ишан ларсун!
Жула депутатъталгу лацай мий бурицІурдиха
Яла аьгъумий дикІул чуллу цанналу ччисса.*

*Цалва бацІаннин миннал махъру хъунисса бикІай,
Цинярда илкинишуву халкъуннан данну учай,*

*Амма цалва баџукун бувсмур цялмахъсса ляхъай,
Цинярда гъарахъалтту цанна вирдай зузи дай.*

*Мискин-гъаривмий тIурчан, буссар яхIлий яхъанай,
Щинахун ччатI бунугу, мунийгу рязи хъанай.
Укуннивав гъантIисса аьратталсса замана,
Цавай ччанналун багълай, цавайгу бакIрайн лахълай?*

*Чакъалт дикIул буччиннин мухлукъат ялугъларча,
Жаннаяту ка ларсун, ца гуран къадударча,
Къанумру чичултрая нигъа буслай, ляхIларча
Мискинтурал ттурчIардил ялтту бур вай занан най.*

* * *

*Ина ттунма ккавккукун,
Чил хъаралун бувххун най,
Бургъил гъели къабуб чурх,
Ччучлачи бувай цIарал.*

*Урттувух экъилавгсса
Бявкъу щинал щаращий,*

*Вил чIарав унагума
Мякълил ччучлайна ура...*

*Инттусса лайсал гъарал
Щалла жул ялувн лачIу,
ЛяхIайрав ккаккай ттучIан
Атил хъукун ттул ччисса.*

КЪУПУЛИВУССА ТIУТIИ

*Бургу, ххирай, вай тIутIах,
Вайннул къупал бюхъаву.
Интнил щюлли лаххайхту,
ХъяучинтIиссар вайгу.*

*Инагу ттун лацара
БуцIлацIисса къуплиха,*

*Ччаврил хIукъу бищайхту,
Хъяучин хIадур хъусса.*

*Къуплива тIутIи кона,
Нагу хъяучинссара.
Варакъигу хъарайну,
Ина хъхъичIух бавчукун.*

ИТАРГУ

*– Бюхттул зунттуй итаргуй,
БучIу гъарин ялавай,
Вих хъусса ччаврил цIарал
Ччуччин уллай урача.*

*– На ялавай бучIанна,
Ттул дакIнин ччимур барчан:
Лаххан шуба ласурчан,*

*Мусил яхъа дутарчан,
Цаймий хIайран бувансса,
Иномарка булурчан.*

*– На мискинчув акъара,
ТIиртIунийн ка диллай дур,
Мий цимурца ласунна
Ттулла хъуву хъуну махъ.*

ОБРВАТИУЛ ПАХРУ

*Балай тий бур оьватИи, бяравату буруглай,
«Щиная хIаз ласайсса на бакъа бакъассар» тий,
Дуккан дуллай щинава цилла цюллисса бакIгу,
Къяр-къяр учай оьватIул: «Урув ччал банма ттуцал?»*

*Цан буракъай, оьватIий, виятува пахрурдай,
КъакIуллив вин пахрулул ликри хъамул душиву?
Виярва гьузун кIулсса буссар цаймий-цаймигу,
Таватагу кIулхьунссар инава цу буссарав...*

*«На укунссара», – куну, ганил къирийн тIанкI дурна,
Ццахханнарал къантIа тий, бунийва къарчI бивкIуна.
Ганил хъхъичI бия шатта, къацIгу абахъан бувсса,
Цихъва бияла бакъа га къацIливун бувххуна.*

Вана укунссар шайсса пахру-ххаралул ахир...

ГЪАЛМАГЪАЙ

*Буссияв на бювхъусса
Чун аьрхIал душвараву,
Ца шатлул маз сававну
Чиву къюкъин бувунна.*

*Ттунгу ххива га ттухра
Ччаву хъуну ушиву,
ЦцикIула чIавасса ттун,
ЛуркIан дуклай ивкIшиву.*

*Ссайгъатру лавсун укIлай,
Цал на хъихъи бивтунав,
Ччаврил ччучлай ура тий,
Ццахухва лаган бувнав.*

*Найрал нарзагу ларсун,
ТтутIив къаритай къакъан,
Къакълай, цюлли къахъанай,
ЛичIан бунна лавмартнал.*

БАРХЪАРА ДУШ

*Дунияллийх ца ларгсса
Буттал аьрици даххай душ,
Сина аьрици дяргъуну,
Нану банну ца урша.*

*Мий накъичругу жулла
ДакIурдиву чичинну,
ЦIарал сасан буе урша
Маччаралгу бувцIуну.
Хъинсса бияннавгу тий,
Оьрмулухун хIачIланну.*

*ЦачIу уршагу бувну,
Шахъан пачлив бишинну.
ЦIарал къянкъа бувукун,
Накъичругу дуванну.*

ЦИУ БУССА ДУШ

*Ци янна лаххарчангу,
Чурхгу вил исвагыри,
Ци карци рутарчангу,
Симанналийгу цу бур.*

*Ци даву дулларчангу,
Буххаву вин къаклулли,*

*Ци буруккин бунугу,
Яругу хъяйнма бури.*

*Мяи хъанайнна икIара
Вил дакIнил ссавурданий,
Ци дардру духъурчангу,
Чин ашкара къадайсса.*

НИНУ ОБРЧИАН ТАЧИАВ КЪАДИРЧИАЙССАР

*Ххарину бувхссияв буттал къатлувун,
«Дадай, дадай», – куну, лахъну оввчав на,
Амма къабавунни ниттил гъайлул чу...
Фермалийн ларгхъунссар, гъаттаралсса бан.*

*Ялугълай, ялугълай яру бавкIунни,
Оьлугу ттивзуну, нину дучIаннин,
Амма къадуркIунни ттул нину шардайн,
На бувкIсса къаклулну, ларгривав къурувн.*

*Лавгра на къурувгу, къурув ларгсса ххай,
Буруглай бавцура на хъунил марцай,
КъачIалай дур нину хъунил марцайгу,
Чуннивав ва ларгсса, чуври ладиркIсса?*

*Агъ, ттул аьзиз нинуй, ттул дакIнил къювуй,
Къавхъунни ттуца бан сагъний вил къадру.
Щийнна тти дадай тIун, щийннакъай овьтIун,
Щицалла дакI дачIлан, чIарав цябивкIун?*

*Нава хъура нину, ттулва бур оьрчIру,
ОьрчIал оьрчIругу бур, ттул лагма лавгун,
Хъурдай сагъну диркIсса ттулла нинугу,
Ттулла чIарав дацIан, урчIа ка хъуну.*

ТТУЛ ГЪУТИА

*Буругула, ттул ГъутIай,
Шиннардил диришиву,
Ччай буна жагъилнува
Хъулух дур хъуннаршиву.
Нания оьрму бутав,
Вияту ххари хъанай,*

*Ина тIурчан, ттул ГъутIай,
Бур ттигу чIивинма.*

*ЦичIав чанну къабивтун,
ХIазирай хъунма бував,
Бургъи зурул оьрчI кунма,
Халкъуннавун буккан бав.*

*Вищалмий, кѣатлул хьуну,
Бур, ГѣутІай, ласкѣатраву,
Ина тІурча дард дакѣа,
Вилва буттал кѣатлуву.*

*Щархѣуминнал нинухѣру
Насилланул вив лавсун,
На алиши бакѣу тІурча,
Вил ташулух ялугѣлай.
Валлагѣ, бура, ттул ГѣутІай,
Бюрурал шанийх ккуруй,
Та тІитІиннакѣай, ГѣутІай,
Яру, дуниял ххал дан?
Та ххяххан данна тІутІив
ИчІалу чІюлу дуван?*

*Гѣанссара на ца кѣини
Ахиратрал кѣатлувун,
Вил дирдирдал гѣивугу,
Ттула мукѣах ририцуну,
Инагу личІанссара
Хѣун кѣавхѣуну чІивинма,
ЧІарах ацІан чув акѣа,
Дадай учинма бакѣа.*

*Утти на вихѣ ци чиви?
Бухлавгунни учинмур,
Винма инава, ГѣутІай,
Буллай дѣура аманат.*

ДАКІНИЯ КѣАБУККАЙ

*ДакІния кѣабуккай жува кІиягу
ЧІирунна тІутІал ар чІюлу дур чІумал,
Вилла канивун ттул ца кагу ларсун,
Вилла ччаверияту жап буллали чІун.*

*Начну иттав бурган сикѣаслай буна,
Вил чІунил дикІайва дакІ рахІат дуллай,
Ччан кѣабикІайва баргѣ зунттухун багѣну,
Гарив анаварну ливхѣун най бия.*

*Бачайссияв шаппай куклу мяхссаву,
Вищал гѣалгѣа тІийнна дакІгу кѣадиртун,
Вил яру бикІайва ттиликІрайн кѣутІлай,
Агѣ, хѣурдай зана бан та ччаверил лахІза.*

БУТТАЛ КѣАТТА

*Левкѣсса буттал кѣатлук бура буруглай,
Магѣивгу вив дагѣну, эяллайн дурксса,
Ттула жагѣлишиву дур хѣхѣичІух занай,
ТалихІ буну шиву яхѣанай диркІсса.*

*Жуннин бучІайссия чІявусса хѣамал,
БучІайва дувссухун чІахху-чІарахмий,
Тяхѣану лагайва тай ссутнил хѣхѣурду,
Мюрциминнахѣ буттал бусайва магѣри.*

*СсалчІав пикри бакѣа, ссалчІав дард дакѣа
Най бия жул оърму зунттал шяраву,*

Къинирдал ца къини хар-хавар бакъа
Бургъилух бивчуна микЛирал чявхъа.

ЛахЛуни дурцуна ттул буттал къатлул –
Ахиратрал хъуну жагъилсса нину,
ЧитЛул оърчЛру кунма, ливчЛунав жугу,
ЛявЛуноу буттацЛул, ялгъузну ливчИсса.

Цукссара ххирасса диявав нину
Га дакъа, къарчИ ивкЛул, аьсивсса буттан,
Къархъуна ганаца духЛан му къюву,
Ахиргу, лавгуна ниттил миналийн.

Ялув магъи дакъа чявхълулу ливчИсса
Ххюя оърчЛал нину тти ттуя хъуна,
ЛирчЛуна ттарацЛул ччаргу гъаралу,
Тиха-шиха мурчал ппив буллай чЛаллу.

Дуниял муданна къадикЛай гъарай,
Гъарал хъирив бургъил лухччи гъели дай,
Гъели лаглай дия жулмур тЛювагу,
Дузрайн буклай бия бувсса захЛматгу...

Най дия шинугу, ччех бикЛай оърму,
ЧитЛул оърчЛру кунма, ппив хъунав жугу...
Вана тти бавцЛуноу буттал къатрал хъхъичИ
Нитти-буттал гъаттай, ясирай кунма.

На кунма, ппужъруннал къатрал зиялий
Чансса бакъахъунссар лакрал аьрщарай,
Ттул ЧукЛунал агълуй, ттул чулу щавуй,
Тар буттахъал къатри цЛулагантИсса?

ЯШМИЛУЛ ЯРУ

Агъ, ттул яшимилул яруй,
Ттул кЛюла-лахъи ликрий,
Уртту-тЛутЛал бизанттуйх
Най урахха куклуну.

Циксса уртту ккуччу дав
Язимур тЛутЛух луглай?
Циксса щаращив ххал бав
Ттин нахЛумур ххал буллай?

Агъ, ттул яшимилул яруй,
ТанинцЛакул зананна,
Ккашин кисаран канай,
Щаращал хъхъичИ ник ришлай?

Ккашин дуки ва ттул дакИ,
Вихра ялугълагъисса,
Мякълин хЛачИ ттул яру,
Хъирив къявхъа тЛутИсса.

Жагылсса т Турду

Карина УВАЙСОВА

Бувссар 1985 шинал МахIачкьалалив. Оьрус мазрай шеърирду чичлай байбивхьуссар школалийва. Школа кьуртал бувну махь бувхссар дуклан Дагьусттаннал хIукуматрал технический университетравун. Цанасса чIумал ялапар хьанай бур Санкт-Петербурглив, зий бур спутниковый телевидениялий. Республикалул газетрай ванил шеърирду бившуссар, шеърирдал лугу бувкссар.

ЖУЛЛА ДЯНИВ ДУНЬЯЛ ДУР

*Жулла дянив дуньял дур, цивхьуссар туну?
Жулла дянив оьрму бур, цивхьуссар туну?
Ца лахIзалий дуньял дуржагьну хьунни,
Ттуннив ххива абад алжан бикIансса,
Кьуру микI бавкьунни ва ттул дакIнийхгу,
ДакIнил ки дуркIунни, цибави туну,
Нарив вихну бура гьи дучIанишиврий,
Дяркьусса дакIниву баргь битанишиврий!
Ттул вихь ца миннатри, я ххирасса Зал,
Ва лачак ласайсса вихьри, хьуна Зал,
Уручча га... ганал дакIнил асарну
Нагу, ява, хьама мабитаванна.*

АХИВАЛ

*МикI бур баслай,
Гьараллайну ссут дур дакI мукIру дуллай,
Пашмансса гьантри бур чарван дурну най.
Ссутнил цIаравн жува дуртун гьан данну
Паракьатишивугу, шакьашананну,
Бяйкьунну, бакьа хьунну,
Бакьа бунну жува чял хьу чарттаву.
Дула ка, ца хьуну, цIакьну бацIанну,
ХIатти цири утти жува лахIан бан,
Буручча мурчая, оьсса мазрая.
Лавмарт цу уссарив вин бувчIинтIиссар,
Чулуха заккана бурган був чIумал.
Нигьа бусаврия пайда буссарив?
Жува литIунния бигьа бакьассар,
На – ссавнил паранну, ина – хьхьирил марч,
ХьхьичIва тIурча лапва жапану бия...
ДакIнийрив, дакIнил дус, ччаврил шеърирду?*

ШАЙ

*Мурччая цлунI тий бивкIру
НацIу ницI, кьурчIи загьру,
Утти мурччив кьаркьунни,
Цил цинал тIааьн хьунни.
КIялахIру дагьну дур ужагьирттайнгу,
Ттуруллаву цIуртти бавссуну най бур,
ДачIрасса пахьдагьру, туснакьрав кунна,
Романналул чIапIайх бивхьу ххит кунма,
ЧимучIалттул мина дурунни мурччай,
Куклусса хьаругу гайннуин чIа дуллай,
Оьванмасса махьру ттун ссан аьркинни,
Мурччай микI бассан бан бюхьарча вища...
Мурччайн мурччив цунни, цIарал парх кунни,
Цунилгу мурччая цлунIа тIун бивкIру
Найрал нацIусса ницI ва кьурчIи загьру!*

ЩУГЪЛURДУ

*ДакIнийн бутан бучIантIимур,
Ттуца кьабюхьай.
Айихьу увсса кьинилуя.
На кумаг баннача...
ЧIюлу махьру бусласу
Щялусса хавардах вичIи дихьланнача,
Архнийнгу бурувгун, ина чIаланну...

МакIра кунма, бура занай,
Бура вичIан най,
Алхьалийх тийнмай,
Амма ттун кIулли,
Нава вичIан кьабиянтIишиву,
Чул бищун кIану бакьар,
Щялусса дуньял дур, халкьгу ливну бур.
БачIвасса хаварду, лавмартшивуртту...
Ягу ялугьиссарав нава кьакIулли
Пашмансса дакьикьа ялун дияннийн...
(ДакIнил кьумашиву ганил дулунссар,
Ттул талихIрал ликригу ххуку данссар),
Жулла ларгсса чIунну дакIнин дирчукун,
Щаклил, буруккинттал цIурюкьин бара,
Магьрайн бивкIун бура авдал вих хьанай,
ХIайп, левицунни ттул баргь,
КIюрххил чIавахьулу чанна бувайсса.*

АХІМАКЪССА КАЛЕНДАРЬ

*Апрель бура хІачІлай, микІру цІунІа тІий,
Къяртлуй щябикІара сентябрьданий,
Июнналул ссавний къувгу бур лехлай,
Марххалттанил январь дакІнин бутай ччай!
Бизарсса балайрду тІун бивнни октябрь,
Га бур оьвтІий мартрал къур бувсса ччитрайн
Тул авгъустрал жами бивгъуну най бур
Июлланул хъхъунил нех – ламурдавун.
КІялархсса хъхъуниву
Навалу бура
Ноябрьда, октябрьда
ЛичІишиву цир,
ДакІ дур чанна лархъун,
Чарийн дурксса кунна,
Дур паракъатну.
Февраль гъели буллай,
Чавахъулттайн ххяхлай...*

БАЛАЙ

*Гъарца инт дуркІтари дунъял цІулагай,
Инсаннал оьрмулуд дахханашин шай,
Тунгу хІисав хъуна ина ччан хъусса,
Амма дакІ кІидачІин сикъавсуссияв.*

*Циваннивав къадар ваксса къурчІисса,
Ганищал бяс буван щища бюхъайссар,
Вил оьрмулуд дусгу цамур бикІанссар,
ТалихІрайн букканнав – яла ци чинссар?*

*Ссутнил дяркъу гъарал кІунтІгу бур багълай,
Ссав духъунссар ттухлу вил хъирив аьтІий,
На гъанна, ххирама, хІаллих ша ласлай,
Бакъара ххишала талихІгу ча тІий.*

*ТалихІ бумий хъунссар ччаву къашаймий,
ДакІ някІ чарил думий – дакІру къянкъамий,
Ччаврил тІурча жува чантІ учин бару,
Так талихІрайн буккан мунил къабару!*

**Оьрус мазрая таржума бувссар
Хизри ИЛИЯСОВЛУЛ**



Ѕазмурду

Аминат АХИМАНОВА



КЪАРИ – БАВА

*Бургъилу гъили буллаи,
Къари бава дур шанай,
Лагмара дунялгу,
Мугъаятну дур гъанай.*

*Акъар оърмулул дусгу,
ДакІниймур бусанвагу,
Дуняллул чувнугу,
Утти аьсав дур хъуну.*

*Жиг дартІсса симанналийх –
Лавг оърмулул ххуллурду,
Карав дирхъу каруннайх-
ЗахІматрал щарш накъичру.*

*Архну бюхттул зунттаву,
Дуняллул гъунттулу,
Къари цинна цурдалу
Яхъанай дур пукълуву.*

ЗУНЗУЛЧАНИ

*Зунттухунмай ччех бивкІун,
Барзгу ккуру лавгунни,
НяІсса ссавнил куртІнивун,
БювкІун цІуртти бат хъунни.*

*Хъхъемал кІунтал дюхлулий
Лелуххант чантІ увкунни.*

*Зунзулчаннал къупругу
Дарардай хъяхъа кунни,
Бюхттулсса барзунтталгу
ЛахІу – тІитІу бувунни.*

*Чаннавух цІан дярххунни,
Гъаварал гъагъ бивгъунни,
Архнийсса зунттул муцІлий
Бургъилгу ттугъ бившунни.*

*Бявкъу щаращал щинай
ТутІал лажинт дирссунни,*

*Ажарттулгу бюхттулну
Цилла макъан дурцунни,
АьнакІащал къудурну
Хъювух занан бивкІунни.*

ГЪАРАЛ

*КІунтІа тІий лачІлай дур бизарсса гъарал,
БяшкІантту дуцІлай бур паимансса макъан,
ТуркІу тІий бикІайсса шярал ккаччивгу,
КъарчІ бивкІун шанай бур къатталаллуду.*

*Ттуруллуд кІу дурсса ссавнил зумагу
Лахълай дур оьлувкъу хъхъирил щатІаха,
Архний чІалачІисса зунттал мицІругу,
Бивгъуну нанисса мюри жамирдаха.*

*Ххуллия бйякъусса оьручугу бур,
Барзунттал хъархъаллайх хІу – хІу гъаз буллай,
Гъалакнунанисса неххацал ччалай,
Цилва гуж ххишиву ккаккан буван ччай.*

*Гъарал аьравххусса шагъра ххуллуду,
Ца – цаних зизлайсса гъарал кІунтІалу,
ЯбатІин къашайсса чІимучІалигу
Багъну бур, кІирагу хъагу гъаргъуну.*

*РахІматрайн икрамрай, аьрици дур зукълай,
Къумасса ратІру дур къуртІи гъаз буллай,
Лахъ муруллуд мицІлий ххярхсса тІутІивгу,
Мякъ лиххан буллай дурр, чарттай ххярхнугу.*

ЧУВРА ИНА, ОЬРЧІШИВУЙ!

*Чарив къакІулну бур оьвтІисса чІурду
ХъхъичІ дацІан дуллай дур царай суратру:
Ххяххабургъил тІинтту, зунттал дарарду
Ххуллий ххиттуй ливчІисса ччаннал шаттирду.*

*Пар учай, дакъа шай чІумул дагъантту,
Жиг-жиг батІин буллай каруннай бурчу,
Ав – ав тІий, аьтІий бур зунттаву барцІру,
ДакІнивух пив буллай бйявкъу асарду.*

*Ялагу, ялагу гайва пикрирду –
Чунни лирхъун ларгсса оьрмулуд шинну?
Лахъхъу – цархъхъуявхха нагу чІавасса,
Цукунни хІакъину хІал бахханасса?*

*Ялуд някІсса ссавгу, кІайва цІурттигу,
Цанни утти кІайннул къадайсса кІаниру,
Ягу ттул ярурив кІалашрайн бувксса,
СсалчІаввагу утти ххари къабайсса.*

*Чарах мюрици оьрчІал къюкъа лерчунни,
Мусил ашрапирттал гъарал ларчІунни,
Ттул мурччай дахъвасса пиши микІлавчІунни,
ОьрчІишиву ларгишиву утти бувчІунни.*

Аксана МИХАДОВА



Лакку мазрал учител, СОШ № 12, ш. МахIачкъала

БУТТАЛ ШЯРАВУ

*Щугълурдал кай-кай бувну,
БувкIра буттал шяравун.
Пахъ дагъсса ттюнгъашиврл
Даки къума лаган дурна.*

*Мюриш гъарал вирххулдуцал,
Ссурулккуртрул ца бишай.
Дакину асардацал
БучIанхъуву махъунмай.*

*Къатлул бакIрах къункъула –
КъатIух ппив шаврил лишан.
Буттал мина къариртун,
Хъинну бикIи, лавг вирттал.*

*Дунияллул гъунттулу
ЧIявур чIюлусса багъру.
Багъдад буттал кIанттаву
Бур алжаннул авлахъру.*

КПОРХ

*КIюрххил лавай бизара,
Заннайн икрам бувара,
КIюрххицIун чанна цIукул
ХIайран бувну личIара.*

*Тазану хъай, тIуркIу тIий,
ОърчIру дарсирдайн бачай.
Оърчи-кIурисса чIурдал
Дакинил синттайн асар бай.*

*Бургъил цалчинесса тIинттал
Дуниял чанна дувай.
КIюрххицIун бивз ажарттул
КIюрх дуркIишуву кIул бувай.*

*Агъ, ххуйишуву дунъяллул!
Ххираишуву оърмулул!
Нава ляхъан був Заннайн
ХIайранну ливчIун бура.*

БУТТАЛ НАСИХIАТ

*Пу ия арснахъ буслай
Чувишвруя, яхIлия,
БувчIуну ччай ганангу
Дунияллул мяъна-сан:*

*Ниттил хIурмат буручча,
Хъунанан кумаг бува.
ЯхI бакъу, адав дакъу
ВичIатува арх ува.*

*«ЗахIматишврл хъхъичI ина,
Арс, бакI лахIан мадара.
Душманнал хъхъичI тачIавгу
Ник рищун къаст мадара.*

*Ватанналул овъчирча,
Жан дулун хIайп машара.
Цимилух ялугъинал
ЧIарахгу мауккара.*

*Ттул буттал ттун кьариртсса
ЯхI, кьирият ва адав*

*Ина марцIну ядува –
Мий вин утти аманат».*

ЧЧИССАННАХЪ

*ДакIний буриу, ххирама,
Щюлли кьурух жува най,
Гьавасрал кай-кай буллай,
Щюлли марч дакIнийх бишлай?*

*Нажагь вил чIу баярча,
Щюлли кьур тIутIайх бичай.
Яруннин ххал кьахьурча,
Бизанттайх бурса бакьай.*

*ЧIун диялсса ларгунни,
ЧIарах чIара нех кунна.
Ччаврил мугьру бивицунни,
Абадул интнил кунма.*

*ДакIний буриу, ххирама,
Та хьуначунал махьру:
Хью дурицIусса хьуснияр
ДакIнин ччисса дус хьинссар?*

*Ттул ччаву цIуларгунни,
ЦIунилгу дакIнин агьну.
ЩютIуххул макьан кунна,
Базурдавун дюрххуну.*

*Дакьасса хьурдай муси,
Кьалархсса хьурдай сими,
Вил мусил симан чIалай,
Бусса хьурдай вил тIювай.*

КЪАШАЙ ХЪАМАБИТАН

*ДакI кьума ларгуну,
ДакIнил куртIнива
Кьумасса махьругу
Цивпа ккуру гьай.*

*Цан бурган бувссия
Мий лухIи яру,
Ясир буллай яхIгу,
Ччучлай ламурду?*

*ДурицIусса дакI нажагь
ДачIра кьадарча,
Кьинирдал ца кьини,
Цурда кьавхь учай.*

*Цан дурссия жуав,
Зума нахIусса,
ХIал ласун буллайсса
Ва качар чурххай?*

*Лухччинул вивату,
Щаращи кунма,
Кьавхь тIий бур яругу,
Хьирив ялугьлай.*

*Кьашай хьамабитан
Яруннил бярдугу,
Жайранналул буци,
ЦIузурул симан.*

ГЪИНТТУЛ

*Щарнил зума-кьирагьрай
Щавицилул мурхь бугьарду.
Щарнил оьрчIал хIаз ласлан,
Щинал бяргу бугарду.*

*Чемултгу тамашалий,
Мурхьирал кьяртрай ликкай,
ОьрчIал чIурдавух цалла
Магьнарду хIала дакьай.*

*Гьинттул оьрчIру шяраву,
Тивталну лавай бизай,
Щадсса чIурдугу буллай,
Бяравун хьяхлан бикIай.*

*Ва щавицилул мурхьирай
Буванну вайннун кюртти,
Мяш кьавхьуну дизанну
Вайннун кIинттулгу урицIи...*



Поэзия

Мирза ДАВЫДОВ,
дагъусттаннал халкъуннал шаэр



ЦАШИВРУЛ БАЙРАМ

*КIира къюкI дуссаксса ца хханххираву
Цакуцну тарга тIий, цакуцну ришлай,
Азгъунсса чурххайсса язимур базу
БатIул бан шайссарив дуржагърацагу.*

*ЛухIи хъхъирил цатIив хъямала багълай,
Ххира буллалисса Къирим жазира,
Хъинишвирун лярхъусса аьрици-цин, гъава
Мяйжаннугу хханссар алжаннул мина.*

*Ва неъматрал заллу хъунсса умудрай
Хазарнал, мангъулнал, туркнал аьраллу,
БувкIссар ва жазира зурзу тIий буллай,
МютIи бан шиккусса виртталсса халкъру.*

*Аьрасатнал аьрал, гайннал цашиву
Гъагъан дансса гужру лякъин къавхъуссар,
Вирттаврал оьттуя хъусса тIутIивгу
ОьрчIал яру кунна, дуруглай дуссар.*

*Севастополь шагъру-чаннаннил бару,
Лекъан бан шайссияв Гитлердуцагу,
Душманнал жамирдал аьрсса кьаркъаллу,
Дуссар сситтул канай хъхъирил чIанулу.*

Нааъна Никитан, увчугу хъуну,
Пишкаш бувсса Къирим та Украиннан,
Азарва барчаллагъ Владимирдун,
Къирим зана бувсса цила уссиЧан.

ТутIайх бичу, Къирим, утти тархъанну
Бюхъан бува багъру бургъил тIинтталу,
Дизуча интнил аргъ гъарнал багъраву
Ки къадучIантIиссар вичIав тачIавгу.

Аьрци-цин дарувсса вил ялтту лехлай,
Дакъаврил хъхъиру бур хъямала багълай,
Ччаврил ва хъиншиврул бюхттулсса балай,
КIайннал чIурдавату ттунгу бур баллай.

Саки районналул ва Цусса лакрал,
Халкъ буссар ччянива уссурвал хъуну,
Хъиннува бюхттул дан дусшиврул байран
Жу бувкIру хъамалу уссурваврачIан.

Цал ттигу дугъанну карду узданну,
Дяних къадукканну сунттул ххаллагу,
ЛичIуча абадлий ссавнил цIурттину
Ва жула дусшиву пперха тIий яргну.

ЯтIул ранг ттугъалу ссав хIайран дуллай,
Гъузуй бур жсамирду хъхъирийх тархъанну,
Хъюрухъру щатIив бур зумардайн ппай тIий,
КIира дуниял дур хъамала дагълай.

Мюрци щаращаяр хъхъирирду шайсса,
Ца зурулли хъхъурду чана дувайсса,
Барча дуллай жула цашиврул байран,
Дагъусттанная вин кIирисса ссалам!

КАРАМАТССА ЧУНИЛ ЗАЛЛУ

*Хас бувссар Дагъусттаннал халкъуннал аьртIискан
ХIабибат Буттаеван*

*КIинтнил бявкъу чулданий
Гъурбатрай уманангу
Вил балайлул чIу бавний
Инт чантI чинссар дакIниву.*

*Гъарца махъ тIутIул къупну
Хияллаву хIасул шай,
Зунттал щаращал жюржю
Чурххавух экъи лагай.*

*Аллагънал дуллуну дур
Вихъхъун му къудрат-каши,
Ххирами ххари буллан,
Ххари буллан пашманми.*

*Ва дуниял гъартассар
ДакIнил майдан гъартанан,
Оьрмугу чаннанмассар
Иттав цIурттал пперх бунан.*

*Гъанагъисса марч кунна
Гъалак дурксса дуниял,
Так ччаврил балайлуцал
Паракъат дан хъунтIиссар.*

*Булбулданул такъвалий
Уча балай бюхттулну,
Хъяй-тIуркIутIи дуванну
ДакIнил чагъанттул синтту.*

14.03.2019 ш.



Публицистика

Хажимурад ХИУСАЙНОВ

ССАВНИЛ ЛУВССА МЯЙВА ТАВ

ХъхьичІ мукъун кланай

На 2013-ку шинал Ккуллал районналий «Илчи» кказитрал корреспондентну зун ивния махъ, буккултрахъ бувсѣссия, 1944-ку шинал Ккуллал районналия Аухнавун дизан дурну диркѣсса, мархха ххартІ бувсса шярваллавасса мяйра шярвалу диркѣсса кланттурдая. Гужирай дизан дурсса шярваллу диркѣсса кланттурдай хлакьину яхъанай бур цаппара инсантал. Лещан къадиртун дур таврдавусса цу-цанпир. Мукунсса шярваллуну дур: Бярнихи, Къичурлухи, Чакъал, Тукъатул, Хъусрал-Чар. Таврдавусса цу лершсса шярваллуну хъанай дур: Оьллауртти, Ххяллухи, Арттаби. Тгун чІалан бивунни вай макъарлартту, ца цІанилу цачІун дурну, буккултрал хъхъичІун уттигу цал ласун багълай бушиву. Ва иш укун буван багълай бур ялун нанисса никиран миллатрал тарих дакІния къалаганшиврул. Ва пикрилучІангу на увцунна Арттабиял шярвалу диркѣсса клану бусансса чув ттуна Ккуллал районналий бакІрайн къаагъну махъ. Ялагу 2019-ку шинал дурусну 75 шин барт лаглай дур жулва миллатрал инсантал Аухнавун бизан бувния шиннай. Макъалартту «Илчи» кказитрай дурксса лагрулий дуллай ура:

ЧАКЪАЛИ

Ватаналул залухъру

*Урттугу цюллисса,
Щингу дяркъусса,
Щамагу хъхъинякѣсса,
Ттул буттал улчай.*

Укунсса махъру дакІнин багъуна ттун, жулла Ккуллал районналул хъунмурну хъанакъисса, Ваччиял шярава, Ккул-Хъусрал чулинмайсса ххуллулияту, пагъламантурал шярваллил чулинмай нанисса ххуллийн увккун, бакІрал ялувсса зунттурду янилун багъайхту.

Янил хъхъичІ дацІлацІисса, цаннир ца ялтту дуккан хІарачатрайсса тІтІавуртгалгу ттул дакІ гьулусан дуллай дия. Хъунмур ххуллул чІараввасса нукІувамур ва цІумур ламулгу буслай бия оьрму, ца кланай къабавцІуну, цилва буцилий най бушиву. Балай-гъалай тІий, ккуру нанисса Хъуннеххал

чІанулусса марцішиврулгу, пар-пар тІисса щиналгу ттул дакІ гацІана цашалла балайтІи дуруна.

БакІлавайсса ххуллу. Ва ччаннал ялтту кай-кай буллалиссаксса, янил ласун хъанахъисса зунттурдал лагрурду ягин хъанан диркІуна. Му иш тасттикъ буллай, кув марххалттанил янналувусса, кувгу щамарал кахридакълтравусса, зунттурдал авуршиврияту ябатІан кълхъанахълаврил. ТІайлану учайсса бур: «Зунттурдаяр зунттурдури ххуйсса», - куну. Ва лахІзалуву ттул янилун багълуна, кълблалул чулийсса муданма ттула дуснувасса Щуну-Зунттул ца хълцІлий щябивкІсса хълнасса оъруснал шаэр Пушкиннул симанналула лавхълусса ххяллул парчагу. УвкІун ивкІун ур Лаккуйн Пушкингу! Такну гълраца зунттул бакІгу ттулва чулинмай буруглай: «Ча увкра инагу, шагълрулул инсан ва кълотІсса зунттал дарардавун?» - тІисса хханссия.

Укун, Лакку билаятрал авуршиврия нахІала буллай, кІартташи гълз дурну унува, ттул пикрирду бяличІан бувуна, чІиви машиналий хълрив лавсса, Куллал шяравасса гълаттарал хІакин МутІайл ва Ваччиял шяраваллил СПКлул хълнама Шяпинал. Ия-я буну махъл, на бувсълссия гайннахъл ттулва аърххи-ххуллу бушиву Чакълалал МихІаммадчІан. «Туну кІаначІансса ххуллу архсса бакълхълурчагу, ккаччал авара уварача, жу ина иян уванну кІаначІан», - куну, янил ляпІ учиннин, ца хълнамасса, чичрурдугу дурсса, ххуллул кІибачІулий бацІан бувсса чарил чІарах лавгун, Чакълалал МихІаммадал кълатрал хълвун иян увунав. Жул хълхълчІун дурккуна МихІаммадал щарсса Зумрут. На ца кълнилул хълхълчІва телефонналувух бувсълссия МихІаммадахъл нава учІансса. МихІаммадал телефонналул номер ттухълхълун буллауна кІива-шанма гълнтлул хълхълчІва МутІайл. Бурги оърмулул тІайлабацІуртта, цайна МутІайн тІайла авцІунав ваначІан иян увангу. Бувсуна Зумрутлул МихІаммада арх акъл яттичІа ушиву ва цуппа гълншиву ганайн оьвчингу.

Цалчин ттулва яруннил хълхълчІ дарцІусса суратрал на хІайран увнав. Му суратгу дия укунсса: лахълсса зунттул ссимиялттул дянив, ца ххинчулийсса лахІунттуй, зунттуйн ттиликІ хълхълчин дурну дурсса лакку ларзнищалсса дурагу царай кълтри. Кълтрал хълхълчІсса хълвусса лазилакълаврил, марцішиврул на хълннува карамат увнав. Гълаттаралмий, яттилмий ккуранну ца авурну, лагма бярал, чатІлул чІултти буну, дурну дия. Вай чІулттал ялувгу ятІулсса лаххиялул парчри бавхІусса кълалттухълру бия. Кълалттукълртгайсса янналия барцІру нигълбусайссар тІива. Сагълсса кълатрая арх дакъл, тивушиву яхълуну шяраваллил санциннарая бусласисса лекълурду дия. ЦачІанма нанисса ххуллу яхълуншиврул ца магълрну кълвкъл чарттая бувсса хІачачІирттугу бия. Кълтрал лувгу аьпалухълхълун лавгсса чакълалал чиваркІуннал абадсса кълтрал чІаравсса кІялабарзру. Вайннул кутІа-лахълшиврул, сий дучІан даврил буслай бия аьсрурдал лахълшиврий оърму бутаврил хІасиллу чІун-чІумуй даххана хъланай диркІшиврияту.

Тун Чакълалал шяравалу диркІсса кІанттайн лагаврил мурадгу бия, шикку яхъланай бивкІсса, яхълусса цалва нитти-буттал мархха-ххуну духлаган кълдиртсса, хІакълнугу шиккува яхъланахълисса, МихІаммадал ва Зумрутлул жухълра дихъллахълисса дарсирая «Илчи» кказитрал буккултрахългу бусан. Гълй-гълй, жунма чанкъланссавагу кІулну бухълурча нитти-буттал наслулул никирттая, му чІумал оърмулул кълнирду цинцилттай дирхълуну, ганил кІу-куклушиву хІисаврттаун кІункІу дуван шай. Мунияту утти жува вичІи дишинну МихІаммадал ва Зумрутлул – кІия инсаннал, ца кълдарданул къл

атлул нузру цукунсса кІуллах тІтІлай бивкІссарив бусласисса ихтилатрах. Буслай ур МихІаммада:

- 1944-ку шинал Мичиххичнавун дизан дуваннин, цІана жу яхъанахъисса кІанттай диркІун дур Чакъали тІисса шяравалу. Га чІумал шяраву диркІун дур 73-нна хозяйство. Шикку бивкІун бур лагмасса Къичурлухи, Бярнихи, Тукъатул, Оьллауртти тІисса шяраваллу цивун духлахисса шяраваллил совет. Чакъалив ва Къичурлух бивкІун бур байбихъулул школардугу. Жул шярара І-мур ЦІувкІрав дуссар мукъра километра. Му ххуллийх дуклан лагайсса бивкІссар жул оьрчІру, ххюйлчинмур классрава лаваймий классиртавун биянинсса. Тул хъунтаттайн Ися, хъунбавайн Залму учайсса бивкІссар. Гайннал бивкІссар МахІаммад, Паша тІисса арсругу, Лейли тІисса душгу. Мичиххичнавун бизан буллалисса чІумал, «Жу армиялийсса арсру зана къавхъуну къабизанну», - тІий, гай шиккува ливчІун бур. Гайннал душ Лейли, 1910-ку шинал бувсса, ХІусайн тІисса адаминан шар хъуну, гайннал дянив 1940-ку шинал ура на дунияллийн увккун. Тул нитиуссурвалгу, бутта ХІусайнгу дяввилиа зана къавхъуну бур. На нитищал изан увссара цІанасса Чапаево, га чІумалсса Кишеймин тІисса, мичиххичнал шяравун. Ттун дакІнири нава, акъагъаншиврул маразрай аьравалттул хъхъичІсса ттуршардицІун аьвхІусса чІун. Аьравалтту цирдагу Хъусрациял, Ккуллал чулуха дуркІуна. Га чІумал ххюрагу шярара дизан дурсса хозяйствардал сияхІ хъанай диркІссар 240. Ялагу дакІнири, баркьутираву унува, марххала буллалисса дяркъусса чІун диркІшивугу. Га цуппагу апрель барз бивкІун бия. Хъирив Буйнакскалийн бияйхту, аьравалттая бучІан бувну, поездрай шябивтун, Хасаврайн биянин лавгсса дакІнири. Жун гийх яхъанан буллуна кІира зивулийсса къатри. Къатрал хІаятирттаву бия, къабивтун ккаччив, кІарттуву бия ччуччукъуру хъусса ччатІ. ХІаятирттаву бия хІажикІалул бувцІусса парачив. Амма, 1947-ку шинал, жун баллан бивкІуна ттул хъунтатта ва хъунбава, арсругу дяввилиа зана къавхъуну, урганма акъа, ливчІун бушиву. Жул Чакъаллал шяраваллил аьрцигу бакІраяту Ккуллан дуллуну диркІун дур. Яла тайннал цанна Бабаюртуллал даралувату аьрци дулайхту, вай къадиртун дур. Хъирив ва аьрцигу дуллуну дур ЧІяйннал колхозран. Жу бувкІсса чІумал шикку дикІайва сайки 70 ттизайсса оьл бусса пирма. Тул нинугу ЧІяйннал колхозравун бувххуна, нагу 1948-ку шинал Ваччавсса школалаийн занан ивкІссара. Ваччав га чІумал арулва класс бакъа къабикІайва. Хъиривмий класкру на ЧІяв къуртал бувссар, тиккува интернатрай ацІлай. Тул хъунтатта ва хъунбава 1882-ку шинал бувсса бия. Цивппагу ссурахъал бивкІссар. Хъунбава 1954-ку шинал, хъунтатта 1966-ку шинал ахиратравун лавгуна. Вай цІана жу яхъанахъисса къатригу ттул хъунтаттал буттахъалла диркІун дур. Жулвамий оьрчІругу хІисав бувсса чІумал ххюра ник хъанай дур.

На 1960-ку шинал школа къуртал бувайхту, бутта дяввилий ливчІсса ятин ушаврийн бувну, шавагу на уруган багълагъисса кІива инсан ушаврийн бувну, на армиялийн къаувцунав. На гара шинал ЧІяйннал колхозрал Бярнихалу тІисса шяравалу диркІсса кІанттайсса пирмалийн зун увхссияв учетчикну. 1962-ку шинал, ва давугу къадиртун, на зун увхссияв райпорал дуки-хІачІия даххайсса ттучанналийн. Райпорай зий унува, на Буйнакскалий, заочнайну ккалай къуртал бувссия Кооперативный техникумгу. 1963-ку шинал ттучанналиймур давугу къадитан увну, зун увцунав загатскотрайн хъунама бухгалтерну ва ккассирну. Гикку зузиний увхра партиялувунгу. КИ-

ра шин дурссар на заготскотрай зий. Яла на увцунав Статуправлениялийн. Бакрjагту хьунама инспекторну, хьирив хьунама экономистну зий икIайсси-
яв. На гикку 1998-ку шинайнин зий ивкIссара. Яла, сокращениялун агьну,
кIира шинал хьхьичI пенсиялийн тIайла увккунав. Ганияр махь на тIитIав
КФХ, ятту-гьаттара ябуллалисса. Ттухь дур 25 гектар аьршарал арендалий
дуллусса. Вай ттухьхьун ЧIяйнал шярваллил администрациялул дуллусса
аьршир. ТIайлар, жунма букансса нувши бугьарча бакъа, тракторду дакъа-
шиврийн бувну, цамур бакIлахьия дугьан бюхълай бакъар. Ппал, хIайван ла-
сун жучIан шиккунма бучIай ярусса, ссурхIи. ХIукуматран дулун багъайсса
налогру на циняв цилла чIумал дулайссар. Ялагу кIицI буван ччива, бакIра-
яту Ваччав даврийн заназиний ттул дикIайссия хьунбуттал каний дахIайсса
ссятрах ЧIятусса МахIаммадхIажи тIисса оьрчIащал даххана дурсса ласа-
питI. Хьирив ларсьссия ИЖ-56 тIисса мотоцикл, яла «Запарожец», хьирив
«Жигули». Утти цичIав дакъар.

МихIаммадал бусласимур чIумуйнусса бяличIин бувну, утти вичIиди-
шинну ванал кулпат Зумрутлук:

- На I-мур ЦIувкIратусса буре. Ттул бутта Къадиаьли Бакрихьал тухумра-
васса, нину Аьйшат Чанкухьал тухумравасса бия. На бувну буре 1948-ку ши-
нал. На бакъагу жул кулпатраву Шарапуттин, ХIажибутта тIисса уссурвалгу,
Нурижат тIисса ссугу бикIайва. Цана ца ссу ливчIун бур, уссурвал ахира-
травун лавгун. Ттул буттал Хьуннеххай, СумбатIуллал лув, дуссия цува зал-
лусса гьарахьалу. Га гьарайзу икIайва. Жулла шяраву мйива класс къуртал
бувну, хьирив 1966-ку шинал на ЧIяв къуртал бувссар I0 класс. На га чIумал
хьинну гужсса спортсменка бикIайссияв. Лечавриву ххуй шайссияв, пяти-
борьелуву хьхьичIун буккайссияв, волейболланийгу ххуйну буккайссияв.
ЧIярусса грамотартту дуркессар га чIумал. Жул кулпат МихIаммадихьащал
муданмагу дусну хIала-хIурттуну бикIайва. Уссурвалгу ванал дустал бия.
1966-ку шинал, школа къуртал бувайхту, Дагъусттаннал Университетрал био-
логиялул факультетравун бувхссияв. Амма хьиривмур шинал, МихIаммадан
шар хьуну, яла оьрчIалсса буллан багълай, му къуртал къабувнува ливчIссар.
ТIайлар, на бухгалтер шайсса курсу бувккуссия. Ттул уссурвавран МихIам-
мада муксса ххирану икIайвахха, куяв къаувкуну, дус учайва. На бакрjагту
ца шинай бухгалтерну банкирай зий бикIайссияв. Яла жулла Ккуллал район-
налия шагьрулул чулинмай заназисса автобусиртгал билетругу бахлай, дис-
петчерну зий, 30 шин дурссар. Ваччату га чIумал МахIачкъалалив, Избер-
башрайн, Каспийскалийн заназисса автобусу бикIайссия. МихIаммадал ва
ттул дянив хьунни ххюва оьрчI-душ. Хьунмур душ Басират бухгалтер бур.
Ванил лас Рамазан I-мур ЦIувкIратуссар, кIиккусса пагьламантурал шко-
лалул директорди. Хьиривмур душ Светлана Ваччав ветаптекалий зий бур.
Ванил лас ур Серегин тIисса Ккулатусса. Ва цувагу подстанциялий зузисса
электрик ур. Изольда тIимур душ медсестра бур. Ванил лас ЧIятусса Аьлил
маршруткалий зий ур, вай Каспискалий яхъанай бур. Аминат учительница
бур. Ва ЧIяйнал школалул директорну зузисса Арсений тIисса адаминан
шар хьуну, тиккува зий буссар. Ур жул чIатIимурадран Аллагьнал уллусса
МихIаммадал буттан цIасса, ХIусайн тIисса аргу. Ванал къуртал бувссар
МахIачкъалалив Сан- Марино институтрал экономикалул факультет. Яхъа-
най уссар Новостройрайсса Чапаево шяраву, I-мур ЦIувкIратусса ПатIимат
тIисса учительницану зузисса душгу бувцуну. Цувама, каруннал давурттив
дуван пагьму бусса ушаврийн бувну, строительствалуха зун икIай.

Жул чачІу яхъанай хъуну дур 47 шин. ЖучІа тачІав хъамал чан къавхъусар. Улу, шагърудаяту дахху-ласу дуван бувкІсса къумукъ, лазги, китаЙгума бучІайссия жучІан гъантта бикІан.

На зузисса 1736 - тІисса автоколонналул цимиллагу дуллуссар грамотартту, бахшишру. Дур мукунна МихІаммадалгу чІярусса грамотартту. Нагу, МихІаммадагу буру захІматрал ветерантал. Цал на, цал МихІаммада, лагсару чил хІукуматирттайн туристурал путевкарттай. На – Руминиянавун ва Венгриянавун, МихІаммада - Руминиянавун ва Югославиянавун. 1984-ку шинал арх дакъасса ЧІяйннал пирмалия бувцуссар жучІан чанигу. Вин квавкхъунссар жучІан кІура баллалисса ххуллул чІарав бацІан бувсса хъунмасса чару. Га чару дукІу цалва харжирах бацІан бувунни шагърулий бувсса, Чакъаллал шяраваллияту мархри нанисса шама багъадурал. КІицІ дуванна миннал цІардугу: МахІаммадов МахІаммад - ЦІаххуйл арс, Къурбанов Къурбан-Амирханнул арс, МахІаммадов МахІаммад - Закариянал арс. Вайннан бур га чаричІагу арх дакъа, ххуллийх нанима, увхсса инсан игъалаган шяикІан, чак буван бюхъайсса чІирисса дахал дувансса пикригу. Аллагънал кабакъинхъуви!

Гъай-гъай, Аллагънал ка къабавкъуну, жушава цичІаввагу буван къашай. Жулва зунттаву яхъанакхисса инсантурал оърму махъсса шиннардий хъинну баххана хъуну бушиву аьлттта чІалачІисса зат бур. Хъуру дугъансса тракторду дакъашиврийн бувну, мий дугълай бакъар. Ахънилссагу жучІара, къатрал чІаравсса багъирдаву дугъарча дакъа, жяматран аьмсса аьрщарай дугълан къабикІай. ЛивчІун бур анжагъ, ятту-гъаттара ябувну, миннуяту ласласисса дуланмагърай яхъанан. Ва давурив жулва зунттаву, цахъис шяраваллал администрацияртталгу, чу-чу къауллаЙ, низамрай лухччив хъуннав, хъуру хъуннав, инсантурал ишла дулансса бакІцІуцІавуртту дуварча, къаоьккину хъунссия. Ца районналул къуллугъчинал ттухъ бувсуна чІявумий шяраваллал администрациярттал хъунимий, инсантал, ваца цивпа бувчІлачІиний чІурду булун бакъа къааьркинни кунма, хІисав буллаЙ бур. Улу, ва къуллугъчинал кІицІ дуруна ца шяраваллил хъунаманал цІагума, бувагу инсантурах ургъил бакъасса.

На хІакъину бусав бунияла буттал аьрщарал къадругу кІулсса, ганил дуллалимургу ласун хІарачат буллалисса, ччимур кІанай эьратран хІисав буван бучІисса, Чакъаллал ХІусайннул арснал МихІаммадал кулпатрая. Вайннаха лавхъхъуминнал ядуллаЙ душиву жулла Ватан.

Апрель 2013 ш.

ТУКЪАТУЛ ВА ОБЛАУРТТИ

КІаланнал ядуллалисса шяраваллу

Инсаният. ВаничІансса ххуллурду бур личІи-личІисса. Му личІишивугу хІисав дуван бучІир, дунъяллул аьрщарай инсан лявхъуния шинай, га инсан цува яхъанакхисса аьрщи язи дугъаврищал бавхІуну муданмагу бивкІшиву. Мий яхъанансса кІантту язи бугъавриву тІайлабацІу шаву ягу къашаву утти жушава, «бухъунссия, хІисавравун лавсхъунссия» тІисса жулла хІакъинусса кІулишиврул луртанналушал бахІирча бакъа, кІул буван шайсса затмур бакъар. Гъай-гъай, аьлимтал, цашава кІул буван хъумур цанниха ца лашан

буллай, чIарав бихълай, цалвамий пикрирдугу ахттаршиврийн хъар буллай, жухъвагу буслан бикIай.

Уттигъанну ттун бахтти хъунни 1944-ку шинал Ккуллал районналия Мичиххичнавун дизан дурсса Тукъатуллал ва Оьллаурттиял шяраваллу диркIсса кIанайн гъансса. Му бахттилул сиптачигу хъунни «Илчи» кказитрал отделланул хъунама, чичу ва шаэр Руслан Башаев. Ванал тавакью бувуна: «Цакънива Сиражуттин Илиясовлул уртакъшиврий итабавкъусса Лакрал ва Ккуллал районнайсса шяраваллан хас бувсса лу кунмасса, ЦIуссалакрал районналун хас бувсса лу итабакълай бурча, му луттирай рищунсса Тукъатуллал ва Оьллаурттиял шяраваллу диркIсса кIантгал суратру рищун насу», - куну.

На дакIнихтуну тIий ура, кIай шяраваллу диркIсса кIантту ттунма ххал шайхту, циксса ттулва дакIнин кьутIайсса, тарив жулва Къапкъазуллал инсантурайн учайсса «варвартал» тIисса махъгу, аьшуйн шуни кунма, чIалан бивкIуна. Яла дакIнил макъу зия шаву ци дия учирча, хъиннура Оьллауртти тIимур шяраваллил эяллагIан ийхту, кIикку къатри дурсса архитектуралул лишанну янилун дагъайхту: «Алалай, буниялагу щалла дуняллий жунна ххал шайсса, кIалан бучIан бувавил сийлийсса къатри дуваву, цимигу азарда шинал мутгалий яхъуну диркIун дунура, махъсса 70 шинал манзилланий духлаган жура циваннивав дитлатисса?» - тIисса, ттуйра нава кунмасса лакрал интеллигенциялийгу аьй-бювкъу душивуну чIалан диркIуна.

Хаварду бикIай ваца жулва инсантурал жипаву арцу хъуншиврул, Дагъусттаннай цукунсаривсса туристурал кластер (циксса зу ттуйва хъярчагу ва махъ лакку мазрай цукун учинсарив ттун къабувчIай) дуллантIиссар тIий. Гъай-гъай, мий туристансса бигъалагай кIантту буваншиврул аьлтта чIалачIисса зат бур чIярусса харж-хурж аьркиншиву. Мигу жучIара дакъар, дуларчагу Аьрасатнал хIукуматрал дулун багълай бур. Оьллаурттиял шяраваллил эяллал чIарав авцIусса чIумал бакIраву хIасул хъуна укунсса пикри: «Ва жулла эьратрансса архетектуралул ххуй аьламатру ишла дурну дурсса шяраваллия ливчIсса чIиртту, шикку цимигу аьсрулул лахъишиврий инсантал яхъанай бивкIсса шяравалу, ялун цаймий къатри къадуллайнма, вай лирчIмий къатри дусса къяйда дакъин дуварча, учиннуча «ссавнилусса тIивтIусса музей» хъунссия. Ваччату шиккун, ва ка къарщуннагума караматшиврун ккалли дуван бучIисса шяравун, бувагу ахьтта най ца сьятрал ххуллу бия. «Зунтгал халкъуннал инсаният». Вана туристурая жунна арцу нани дувансса ца иш. Вана районналийсса школардал оьрчIру, Гъунив, Дарбантли, цамур кIантгайн буцайни кунма, экскурсиялий буцин бучIисса зиярат.

Да чIалай буриг ва зиярат тIисса мукъул жулла вичIан тIааьнну баллалаву?!

Тукъатунсса ва Оьллаурттивсса ххуллу ттун ккаккан бувуна дукIува кIул хъусса Чакъаллал МихIаммадил. Чакъаллал ва ХъунцIувкIуллал шяраваллил чулинмай нанисса ххуллул шанбачIулул бакIрайсса, Чакъаллал шяраваллил чулинмайсса лишанналул кьунтгачIан на иян увунав цалва машиналий Ваччав Ветуправлениялий зузисса Вихъуллал Аьлил Мусал. Шиччава ххуллул шанбачIулия арх акъа цалва яттичIа ттун хъунаавкъуна Чакъаллал МихIаммади. Шиккун нава цIунилгу учIаву ци багъаннарайсса хъуссарив бусайхту, МихIаммадил ккаккан бувуна Чакъалияту Тукъатуллал чулинмай нанисса жегъир ххуллу. Бувсуна ванал Тукъатлив СумбатIлиятусса МахIад

тИсса адамина КФХ тИртІуну яхъанай ушиву. Тукъатлияту арх дакъа чІалай душиву Оьллаурттиял шыравалугу. Гъай-гъай, на яхши-хаш къабувну чІарах къаувкссияв Зумрутлулгу. Ванилгу: «Ва жучІату Тукъатлив чани бувцусса тталлу бивцусса ххуттал чІарах нанисса жагъир ххуллийх насу», - куну, хъиннува тІайла ацІан увунав.

Инт дучІаннин яхъусса суннайсса, гъаннардайсса къаркъсса урттулгу буслай бия даралул аваданшиврия. Чакъаллал ва Тукъатуллал шыраваллал дянивсса ратІнил ца ххинчулий бия, гъаваллаву бавцІуний кунма, лагма чІаракІуннил аьрщи цІуцІлай «тталлу» бувсса аьрщарал ялув бавцІусса кІива хъунисса мукъмуруцІусса къунгу. Тукъатливрив на хъунаавкъунав ят-тиккаччал. Гъай-гъай, дуссия ттул канихъ ккаччая мугъаятшиврун ларсѐсса лахъисса ттархъгу. Га ттун ккаччайн галай дуван дакъагу, зунххисса зунттал ххуллурдайх наниний, лув дизангу дучІи ляхълай дия. Бувагу урчІива-ацІива кІялабарз бия ливчІун Тукъатуллал шыраву. ЧІаравра дия кІаланнал ядурсса чан-къансса эяллайн дурксса къатригу. Дия шикку МихІаммадил тІийкун, ятту-гъатгара бакъайсса, чІиртту лагма бувсса хъюрдугу, ца къаттагу. Ца бавхІусса, ца итабавкъусса кІива ккаччи бакъа шикку цуцІав акъая. Ккаччив хІап тІун бикІайхту, нава шиккун увкІсса даралул дянив бивхъусса ца бакІуяту, чІиви машиналучІа авцІусса адамина щютІа тІун ивуна ттуйн. На махъунай зана ивкІун, кІаначІан лавгссияв. КІа ия Тукъатуллал шыравалу диркІсса кІанттал лагмасса аьрщи арендалий ларсѐсса СумбатІуллал шыравасса Бугъаев МахІад. Ванал бувсуна ттухъ цува шикку, лагмасса 40 гектар аьрщарал арендалий ларсун, КФХ тИртІуну ушиву, ябулла ура тІива ятту-гъатгара, балчант. Цащал бур тІива кулпат Заира, арс, душру. Шикку ванал цал хъунни тІива 7-8 шин. ХъхъичІава ва зий ивкІун ия СумбатІлив хІухчуну.

Ва адаминал зумату вай 40 гектар тІисса махъру ттунма баяйхту, га цІана дакІнин багъуна укунсса затгу. ЧІалачІисса зат бур Новостройрайн бизан буллалисса жулва инсантурал бакІрачІан ялун ци бучІанссарив къакІулсса зат бушиву. Зунттаву цалва къаттта-къуш бусса, яхъаныхъисса инсантурахъхъун ичІаллил иширттан ишла дуван дуллай бур дачІи гектар аьрщарал. Микссара ххулув бувангу. Хаварду бикІай ваца зунттавусса аьрщи яхъанансса лагрулул дакъа тІий, бизан бувссар жулва инсантал Мичиххичнавун тІий. Цукун хъувиявав Оьллаурттисса ххуллугу чанкъансса бакъин буварча, оьккисса нигъачІисса бакъахъувкун, кІа шыравун 40 кулпат бизан буварча. Ттун кІикку кІайннан луртама хъун кунна чІалан диркІуна. Ттулва пикри цІакъ буллай, учин ччива, шыравалу дирхъусса кІану бия зунттурдал дянив лавсѐсса, чанну дакъа дяркъу къащайни кунмасса.

Гъай-гъай, на кІицІ бувсса Оьллаурттиял шыравалу «ссавнилусса музей» бавриятусса ва «мукъцІалва кулпат кІиккун бизан буван бучІия» тІисса ттулва пикрирду зущал кІибачІларчагу, ттун чІалай бур мий хІукмучитурал канилусса ишру бушиву. Халкъуннал учала бур: «Дукра канан икІайхтури, иштахІ багъайсса», - тІисса. ЦІана ттунгу чІалан бивкІунни вай нава тІисса затру бартбигъиншиврул, цал хІасул дуван багълай бушиву, уставгу бусса, жяматийсса, сиясийсса «Общество возрождения жизненных устоев в Кулинском районе», - тІисса сакиншинна. Явара, на таксса ттулва пикрира бусласисса. Мукунсса «Таксса инсаннан бучІиссар цалва пикри цайминнайхгу кІибачІин», - тІисса, ихтияр дуллуну дур 1949-ку шиналва бувксса Венскал-

лал конвенциялулгу. Мунил лув къулбас дурссар Аьрасатнал Хикуматралгу.

Тухъатуллал ва Оьллаурттиял дянив дия дурагу ХъунцIувкIуллал чулуха нанисса ратI. Ва ратIату лавай Оьллауртти дирхъусса лухччинул марщайн нанисса ххуллул дянивун ияйхту, ттул итталун багъуна цалчин кIялабарзру. Гайннулу мина дирхъусса инсантурал рухIру: «Ча увкра, хъамаличу?», - тIисса хханссия ттухъва. Пашмансса сурат. Лакрал бур рагъний учайсса зай: «Вил вилаххав мечI ххяхханнав», - тIисса. Ца инсаннал бакъа щаллусса цимигу аьсрудал лахъишиврий хIасул дуллай диркIсса инсаниятрал ва «жавгъарданул» вилаххав ххяххун бия мечI. Га къинирив ятту-гъаттарал, вай мечIал ухру личIаннин, га «зайгума» бувкуну бия.

Вагъ, да бурги, зайлиятугу хайр бияйсса бур!

Жува яхъанахъисса дуниял дикъаркIлакIиссар, ккурккисса кIаланнул лагрулийсса ва гъанагъисса дуну тIий. КуртIсса кIулшиврул лагру дакъахъурчагу, аьлтта чIалай бивкIиссар Оьллаурттиял чиваркIуннан шикку яхъананшиврул, мугъаятну шану-кIараллай утгубишиншиврул, цукунсса къатри дуллан аьркинсарив. Караматсса лагъ-лахъсса кIаланнал лагрулий дурсса тIювардал на гъавасравун лаган увну, яруннищал дакIнивунгума макъ дучIан дуруна. Вай макълил тIин бия нацIуссагу, ццихъ буссагу.

Ухъурча дунияллий бутгахъал наслурдал цахъисвагу асар биян бувсса оьллаурттиричу на оьвтIий ура: «Да! Аллагънал ляхъан бувсса инсантал! КIаксса хIаллай яхъусса зулла бутгахъал мина мадухлаган дитару. На аькълукар акъара, буванмур зунма кIулссар. Вассалам ва калам.»

Май 2014 ш.



Анриана АБДУЛЛАЕВА

Абдурашид Махаммадов:
«Дагъусттан криминалланул республика дакъар»



Ноябрь зурул 10-нний щалвагу жулва билаятрай кичи лагайссар виваллил иширттал органнал зузалтрал кьини.

1775 шинал Петр I хлукмулийну Жяматийсса низам дуруччаврил къуллугъ сакин бувния шихунмай ва службалуву цимиллагу дахханашивуртту хьуну дур. 1917 шинал ноябрь зурул 10-нний бувккун бур рабочая милиция сакин баврил хлакьиравусса декрет. 1962 шиная байбивхьуну кичи дуллай бивкун бур Аьрасатнал милицанал зузалтрал кьини.

Виваллил иширттал органнал зузалтрал байранналуцун бавхлуну, вай гьантрай жу хьунабавкъуру Дагъусттаннал виваллил иширттал министр, полициялул генерал-лейтенант Махаммадлул арс Абдурашид Махаммадовлуцал.

-Абдурашид Махаммадович, гьашину Аьрасатнал Виваллил иширттал министерстволул кичи ларгунни полициялул органнал гьану бивзун 300 шин бартлаглагисса юбилей. Ци учинна мунил хлакьираву?

-Маяжаннугу, ва хьуннасса агьамшиву дусса дата хъанай дур. Ваницун бавхлуну Аьрасатнал Виваллил иширттал министерстволул бунни хьунмасса мажлис. Нагу гьуртту хьура му мажлисрал мероприятиярттай. Цалчинна хьусса Кремлилувусса Съездирттал дворецраву. Жун ккаккан дунни ххаллилсса концерт. Тааьнсса асардащал зана хьура.

Революция хьуннингу, хьуну махьгу бивкссар Дагъусттаннай полициялул зузалт зий. Хьунмасса Буттал кланттул цанийсса дяввилул шиннардийгу ккаккан бувссар жулва милицалтрал цалва хлал. Виваллил иширттал органнал зузалтраясса клиннан дуллуссар Совет Союзрал Виричунал ца.

Къабигьасса диркссар республикалул полициялул зузалтран 90-ку шинну. Му члумалгу захлматсса шартлрдай дуручлай бивкссар низам ва агьалинал мюхчан-

шиву. На дакніхтуну барчаллагьрай ура, чярусса захілатшивурттугу дурхлуну, дак кьадурккун, цалва пишалул буржру лайкьну бартбигьлагьисса жулва зузалтрахь.

- Ци учинна хлакьину республикалийсса криминал тагьарданул хлакьираву?

- Амну циняв уголов тахсиркаршивурттая гьалгьа тлурча, оператив тагьар, гьай-гьай, бигьасса дакьар, амма кьуманивун дагьссагу дакьар. Дуссия члунну шиная 300 инсан ивклусса тахсиркаршивуртту сияхлрайн ласласиссагу. Цланасса члумал му журалул 65-70 тахсиркаршиврул ккал дур. Мукунна даххана хьуссар цаймий журалул тахсиркаршивурттал ккалгу. Щил ци тлурчагу, на дак! дарцлуну ура: «Дагьусттан – криминал республика дакьар, дагьусттанлулвалгу – тахсиркаршивурттайн клункл тлусса агьлу бакьар».

- Балжину бувсун ччива цумур чулуха ххуйсса ялу хьхьарасса ккаккьяртту хьуссарив?

-Жу ляличисса кьулагьасрайн лавсун буссар халкьуннал баклрачлан члявусса баларду буцлацисса экстремизмалул масьала. Ва чулухуннай республикалул МВД-лул хьуннасса даву дурссар. Жунна цинявннан дакнийссар лув-ялув оьхлалсса терактру дуллалисса, органнал зултрал бакьассагу, агьалинал оьрмурдангу хьуннасса нигьачлаву дусса, халкьуннавун ццах багьсса шинну. 2010-ку шиная республикалий 10 теракт хьуну дур, махьми шиннардий цахьис чанну – 5,7,8.. Хлакьину республикалийсса тагьар члаланну паракьат хьушиву цинявннан члалачиссар. 2010,2011, 2012-ку шиннардий жу сияхлрайн ласайссия терроризмалул ва экстремизмалул журалул 1000-нний дирсса тахсиркаршивуртту. Цлана мукунсса 300 иш бур. Члаланну чан хьунни инсаннал оьрмулийн кьаст лавхлусса ишру. Му бакьассагу, чярусса шиннардил лажиннарай жуца цалчин бювхьунни ивчланна тий инсан ивклусса ишру 90%-рал ашкара бан. Ххуйсса ккаккьяртту члалачи дан бювхьунни инсаннал цлуплу-сагьшиврун зарал биян бувсса личли-личисса цлунцияртту дурсса ишру ашкара бавриву ва мий тахсиркаршиву дурмий бугьавриву. Мукунна хьямалашинну, цуркру ашкара бавриву. Гьай-гьай, дуссар жул давриву диялдакьашивуртту. Чялиш дуккан дан багьлай бур агьалинацалсса хлала-гьурттушиву. Даки дакьинсса кьархьунни кьавкьиншивуртту, машинартту бавцусса ишру ашкара баврил ккаккьяртту. Ххишаласса кьулагьасралун ласун багьлай бур законналуцлун кьабавкьусса ярагь ишакаш баврил масьала.

Хьхьарану дур участковыйтурал даву. Ва яла чялишмур ва мюнпат бумур кьуллугь биклан аьркинссар. Гьарица кулпатраву, гьарица клчириву хьанахьимур клулсса члумалли, жунгу ссах ххишалану кьулагьас дан аьркинссарив клулну биклантлусса. Уттигьанну жу букьан барду ва кьуллугьрал цаппара каялувчитал. Мий кьуллугьирттай биклан аьркинссар участковыйтурал даву чялишну, мюнпат буну дачин дансса, агьали рязи банну зунсса инсантал.

- Чялиш буккан бувасса «шанахисса ячейкартту» («спящие ячейки») цланасса члумал жучлара циксса дуссарив клулссарив органнан?

-Виваллил иширттал министрствалул ФСБ-лувацца жулва коллегяхьащал хьинну ялув бавцлуну дуллаи буссару му даву.

Так нанисса шиная республикалий жуца ашкара бан бювхьунни мукунсса ацлвахьул группарду. Хлэйп, цаппара иширттаву жуца миннал оьхлалшивурттан ххуллу кьукьин кьабювхьунни.

Каспийскалий, автозаправочный станциялий виваллил иширттал органнал зузалтрайн ярагьуннищал ххьявхьунни. Ва иширал хьиривляявуртту дулай, мукунмасса группарду ашкара бан бювхьунни Дарбантлив, Хасавюртлив, Кьизлардай, Махлачкь-алалив, Буйнакскалий. Уттигьанну Буйнакскалий жул зузалтрал увгьуссар органнал зузалт оьрмурдацла бан хладур хьусса мукьа инсан.

Жу ва даву тачлаву хлур хьун кьаритлатиссару. Буссар жу мудангу итталу бувгьусса ва журалул тахсиркаршивуртту дан кунмасса инсанталгу.

**- Сириянал билаятрайсса иширттаву гьуртту хъанахъисса да-
гъусттанлуvtурая ци бусан бюхъанссар?**

-Мугу яла хъуннасса къулагъасралу битан багълагъисса масъаларттавацца цар. Гъашину 25 инсан увгъуссар, Сириянава зана хъусса. КӀицӀ къабувну къабучир, махъсса ппурттуву хъинну чан хъунни тихун нанимий. ЦӀана жул хъунмур мурад бур, хъхъичӀва тихун лавгун, зана хъумий кӀул баву.

Ци чулийгу, цӀанасса чӀумал 1500 дагъусттанлуvt талай ур законналуцӀун къадаркъусса ярагъуннищалса къюкъраву Сириянал республикалий ва цаймигу дяъвирду нанисса кӀанттурдай. Му чулухунмайгу ххишаласса гуж бутун зун багълай бур. Минная, тиха зана бивкӀун махъ, республикалий къюлтӀсса ячейкардавун хӀала бувххун, тагъар оьлукъин дансса нигъачӀаву дуссар. Мукунсса иширттащал жу хъунабавкъуссару.

**- Ци учинна хӀакъинусса республикалул ххуллурдайсса тагъар-
дания?**

-Хъунмасса буруккин бутлатисса, леххаву дутан багълагъисса тагъар дур. Гъашинусса шинай республикалий ДТП-лий оьрмулуцӀа хъуну ур 350 инсан, ларгсса шинналнияр цахъи чанну. Ва чулухуннайсса даву бюхъайссаксса гуж бутун дуллан багълай бур. Тайлассар, вай иширттан савав хъанахъимур цимурца жул биялдарайсса, жуца чаран лякъин бюхъайсса бакъар. Жулла аьрцарайх нанисса федерал трасса 60-ку шиннардил шартӀирдайсса бур. Та чӀумал республикалий 100 азарвавагу машина къабивкӀссар. ЦӀанасса чӀумал республикалий миллионналийн бивсса машинартту бур, ххуллурич баххана хъуну бакъар. Мунияту, инсантал оьрмурдацӀа хъусса бачӀи ишру «Кавказ» федерал трассалий хъанай бур. Шиккува кӀицӀ бан, ва ххуллул цаппара бутӀри бакъин бувну, дахханашивуртту дурну махъ, мий кӀанттурдайсса апатӀругу чан хъунни.

Ялагу, Дагъусттаннай шанма бутӀул кӀива бутӀа зунттал кӀанттурду бур. Щупиртурал дуручлай бакъар зунттал ххуллурдайх заназиминнаясса тӀалавшиннарду.

Аьрххи-ххуллийн бувкмий бала-апатӀрая мюхчан баву мурадрай, ци чаран ляхъларчангу, шупиртал ва бахъттагъалт кӀулши дуну бакъахъурча, жу дуллалимуния мюнпат чансса бур. Махъсса шанма зурул дянив жуца бювхъунни ххуллурдай инсантал оьрмулуцӀа хъусса ишру чӀаланну чан бансса чаран лякъин. Полк зузи барду кӀива сменалий. Патруль чан бувну, нарядру чӀяру дарду. Шупиртурал удостоверенияртту, хӀилла дурну къаласуншиврул, ялув бавцӀуну буру.

**-Аьбдурашид МахӀаммадович, ина 30-нния лирчусса шинну
дурну дур виваллил иширттал органнаву личи-личисса кӀуллу-
гъирттай зий, минува 8 шин – министрнал къуллугърай. Цумий
шинну дия винна яла захӀматмий? Хъуссарив хӀукму бан захӀматсса
тагъарданувун агъсса чӀуннугу?**

-Республикалул виваллил иширттал органнангу, ттун ттуннагу яла захӀматмий дия 90-ку шинну, царай законнай ялапар хъанайгу бивкӀун, ца формациялия цакуну цамунийн бувкӀсса . Му чӀумал на (1992 шинал дайдихъу) зий уссияв Хасаврай. Та бия циняв миллатирттал суккушиннарду шурущисса шагъру. МуницӀун - Чачаннавусса ишругу. Та чӀумал Хасавюртуллал районналул ва шагърулул, ЦӀуссалакрал, Казбековуллал районнал отделлал хъхъичӀва-хъхъичӀ байбивхъуссар зузалтрацӀа хъанай. Ляличисса тагъар диркӀссар, жун багъссар укунмасса чӀумал къабайсса хӀукмурду буллан. Тай дия экстремизм ппив хъуну нанисса, виваллил иширттал органнал зузалтран республика паччахӀлугърал канища къадуккан талан багълагъисса тагъар дусса шинну.

ЗахӀматсса хъуна, ттунма дакӀний-мазрай бакъанма, нава хъунмасса жаваблущинна дусса министрнал къуллугърай ивтсса 2010 шингу. Ца шинал дянив терактирдаву ливтӀуна 157 виваллил иширттал органнал, ФСБ-лул прокуратуралул зузалт ва укунмасса инсантал. Оьрмурдай хӀайп къаувкуну, щаллу буллай бивкӀссар цалва къуллугърал буржру виваллил иширттал органнал зузалт.

**-Рязину урав хӀакъину зучӀава къуллугъ буллан букӀлакисса жа-
гъилсса зузалтрал хӀадуршиннарая, пишакаршиврул даражалия?**

- На рязину ура жучлава къллугъ буллан ччай бушиврия, жулва къллугъ сийлий бушиврия. Дагъусттанлувтуран гъарица члумалгу ххирар форма. Цаймий субъектир-дай виваллил иширттал органнаву зун къананисса члумал, жу конкурсрал гъанулий къамул буллай буру.

-Пишалул байранналуцлун бавхлуну, цумий подразделениярттая ца дуван ччива?

-Хъхъичлва-хъхъичл клицл бавияв оператив къллугърал подразделенияртту. Республикалийсса тагъарданул ялув бацлаву, агъалинал мюхчаншиврун нигъачлаву дусса, экстремизмалул- террорданул тахсиркаршивуртту дан бюхъайсса инсатал ашкара баву хъунмурчлн миннайн багълагъисса масалартту бур.

Хъунмасса барчаллагъ учивияв, хъхъу- къини къаувкуну, къатлув ччимур шартлрдай къллугъ буллалисса патрульно-постовой нарядирттахъ, силистталул ва дознаниялул подразделениярттахъ. Члявусса бур жучла къллугърал буржру лайкъну биттур буллай, республикалий паракъатшиву дузал дуллалисса зузалт.

- Цанаса интернетрал бияла хъунмасса заманнай, хъинну ишлану дур соцсетру. Гъурттуну уссарав ина миннувах?

- Гъай-гъай, нагу ишла дувара интернетрал каша. Амма соцсетирдал чялишсса гъурттучи акъара, члун къадиклай. Цанасса жагъилтураща интернетрал биялалейхчлн библиотекарттавуна занай, картотекардай аьркинсса луттирду ххал буллай бивксса жул члумалнир бигъану къллшивуртту ласун бюхълай бур, мий ласунсса шартлру ххишала хъуну дур. Ва XXI-мур ттуршукур, ччайнугу-къаччайнгу члумул цлушиннарду къамул дан аьркинссар.

Цлусса хаварду къл бан, архну ялапар хъанахъисса ттулва дустуращал, архлал дуклай бивкминнащал дахлаву дан, цлухху-бусу бан къулайсса шартлру дур.

- Цукун къамул дара вила чулуннайсса критика?

-Ва къллугъ цуппава зума-ккарччулусса, члярусса аьй-бювкъурду дучлайсса къллугъ бур. Цаппара затру хлсавравун ласара. Гъарца аьй-бювкъулул хъирив изларча, оьрму биял къахъунссар. Ттулла агъаммур даврин харж дансса члун миннулсса буллай харж дуллан къаиклара. Ттухъ цлуххирча, оьрмулуву тачлав яла винна нач хъанансса тлул дан къааьркинссар. Мури яла агъаммур зат.

- Цинярдагу МВД-лул мероприятиярттал гъуртту шай республикалул Баклчи Владимир Васильев. Члалай бур та мудан зул чларав ушиву.

- Гъай-гъай. Республикалул Баклчи ур Аьрасатнал МВД-лул генерал-полковник, министрнал хъиривчуну зий ивксса инсан. Танан ххуйну къллну бур жу ссаха ва цукун зун аьркинссарив. Жунгу жуйрасса жаваблувшинна хъиннура асар хъанай дур. Хлара-чат буллай буру республикалий хъанахъисса ххуй чулийннайсса дахханашивурттацлун жущава шайсса кумаг бан, чларав бацлан.

- Аьбдурашид Махламмадович, виваллил иширттал органнаву лайкъ дурсса наградартту вил чансса дакъар. «За личное мужество», «Почета» орденну, «За заслуги перед Отечеством» орденналул медаль, «За безупречную службу в МВД», «За доблесть в службе» медаллу ва м.ц. Цумур дур миннува винна яла язимур?

- Цумур духъурчагу награда – му ттул къллугъран, даврин лавайсса къимат бищаву хъанай бур. Миннуцла цинявннуцла на ххариссара. Диркссания агъалинал бусравну уну тлий дулайсса, масала, агъалинал чулуха барчаллагъ баян буллалисса награда – му дикланссия ттул яла бусравмур ва яла язимур.





Сиянат ХІАЖІЕВА

ТАЛАЙ ЛАВГССА ОБРМУ

*Паргалишеву - кІулишеверуеур,
КІулишеу - дуккавриеур,
Дуккаву - оьрмулуеур,
Оьрму - талатавриеур.*

Инсаннаща дан къабюхъайсса даву дакъассар, амма цуксса гьунар бусса ухьурчагу, инсаннаща къашай лерххун нанисса чІун дацІан дан. Оьрму наниссаксагу жува бикІару лавгмунил, ккаккмунил хІисав-сан дулла. Циваннив къакІулли, инсаннан цалва оьрмулуву хьусса ххуй-мур ччяни хъама битай, амма цал дакІнийн щунсса ххуй бакъамур хьуний, га хъама битан захІматну бикІай, хаснува арснацІа хьусса нитти-буттан. Бунугу жулва учала: «ЧІун наниссаксса, дакІнийсса щавугу цІу лагайссар»,- тІисса, ттулва пикрилий, бакъахьунссар хІакьинусса къинигу, арснацІа хьусса ниттил дакІнийсса щаву цІу лаган дансса дару – дарман.

АцІния хъайсса шинну ларгун дур та оьккисса боевиктуращалсса дяввилий арс ивкІуну Мусаевхъал кулпатрал, амма хІакьинусса къинигу я утту бивхьусса шаний, я инсантурал дяниву, канакисса дукралувухгу, хІачІлачІисса щинал ххувлувугу цила арснал симан хъама ритан хъанай бакъар Мусаев Ибрагьим-Халиллул нину-ппу. Бунугу оьрмулул жагьилсса, сахІибурхІай дусса хъамитайпа, амма арснах рутІлатІисса мукьал яругу буруххин бувну, ца чІивисса къяс хьуну, хъачІругу вивннай ларсун, мурцІувун лявкІусса кунма, цила арсна бур буслай: - «Цалчинсса оьрчІ, цалчинсса ттул ххаришиву, талихІ... Ттун, хІакьинусса къини кунна, дакІний дур ттуна арс увсса къини, ганал цалчин ттуйнма «дадай» увкусса чІун, ганал цалчин лавсусса ша. Бюхъайва га чІумал ттуяр талихІ бусса рухІ къадиркІунгу дикІан ва дунияллий...,- арс дакІнийн утлатисса ниттил яру ххаришиврул бувцІуна, гассят цилла хъхьичІ арс авцІусса куна.

Жува бикІару тачІав жунма бивкІу бакъасса кунма арцух, хъуслих къаних бувккуну лихълай, ххяп-шап тІий, зий-занай, тачІав пикригу къабару, цукунсса ци къадар бурвав жулва хъхьичІ жухва ялугълай, куну. Амма жапашиву дагъай дакІнин, жулла дакІниймур барт къалавгуний.



-Щил учинссия, лахъ-лахъсса, ца ххяликсса ттул арс, цувагу дахъра аргъ дирзсса, учӀиакъасса Гелаев савав хъуну, оърмулуца хъунсар куну,.. - ниттил яру мукъал бувцуна. - Чивиния шинай тӀайлашинна ххирасса, тӀайламур бацӀан буллалисса ттул арс, га кьинигу хъунаманал цахъва ина инава магъара, вила подчиненный гъан бува куну бунува, нарахха вайннал хъунама, на хъхьичӀ, вай хъиривнурхха даву дан аъркинсса куну, цалчин цува хъирив агъну ур, цана Гелаев ккаккайхту. Га укъавгъуну кьаикӀанна тӀий, бюхттулсса ца муруллуя вамур муруллуйн тӀанкӀ дуллалисса Ибрагъим-Халил, куртӀсса кьакъалувун агъну, шанма гъантта хъуна ганах луглай.

Жухъ тачӀав кьабусайва цува чун наниссарив, так командировкалийн най ура учирча бакъа. Му бакъассагу, га чӀумал Ибрагъим – Халил дахъва кулпат бувну, цамур квартиралий уссия ялапар хъанай. Амма чара бакъа цува аърххийлий нанитари, жухъ барчаллагъ учингу учӀайва. Га ия зий яла нигъачӀаву дусса милицанал отделениялий МахӀаммад Оьмаровлул каялувшинна дуллалисса. Яла захӀматмур иширттавухгу гай бикӀайва цалчин.

Ца кьинигу жухъ Щурагъун командировкалий най ура куну лавгсса, амма гъунттимур кьини телевизорданувух ккаккан бувна гайннал отделениялул оърчӀру автоматругу хъарайну Къарамащилий битуххиту буллалисса кӀанай. Цалва оърмулуву гикку ккаккуну бия ттул арсан цалчинсса бивкӀу. Гания шинай утту ивхъусса шанийгу ганал бакӀрацӀ кӀараллил лув бишайва пистолет. Хъхъунил хъхъудяризалгу чантӀ учайва леххаву тӀий. Ххуй дакъасса макӀ ккаккайхъунссия, га ссят пистолет хъхъичӀун бугбайва, яни утту ивхъусса шанийгума талан хӀадурну икӀайва. Бюхбайссар, цанна Къарамащилий ккарксса суратру, жухъ кьабусларчагу, хъхъичӀ дацӀлай, аьраттал уклай, макӀрагу хъумур, ккаркмур тикрал хъанай диркӀун дикӀангу. « Я, ттул арс, кьарити му даву, му нигъал ва хъуллил дянивсса даву дур, жун ина командировкалий лавгукун, шаний шану кьабияй, чӀярурхха ххуй-ххуйсса

цаймий-цаймий давурттугу, ххишалларан, ина чурххалгу буюхтуулсса ура, азаруннал дянивугу я бацансса»,- миннат буллан бикайссияв арснахь, амма арс мютий ан кьавхьуна. «Тун кIулли ттулла даву ххуйну, на профессионалла. МарххалттануцIухгума, дадай, цIу лачайссар, цIу дишайсса куц кIулну бухьурча. Зу ттул буруккин мабари, цуппа ца душманнал ккулла ттул чIарах кьабуккантIиссар. БурцIия нигьаусайма, вацIувун кьагьайссарча,»-- куну, жу увкумургу хьярчирахун бихьайва. Ганий ттун ттула арс лашайва бугьан кьашайсса мурчаха.

Гьай-гьай, га бия ганал дакIнил мурад. Школалий дуклакисса чIумала икIайссия жулва кучалий, хIаятравура низам дихьлай. ДакIний бур, цал чIаххурал кьатта бавцуну ливхьун нанисса кIия-кIия жагьилнал хьирив хьуну, гай бавтгусса куц ганал. Гания шинай гьарца диял дакъашиву хьуний, чIаххурал Ибрагьин-Халиллуйн дикIайссия леххаву, ва иширавугу жун кумаг ба тIий. ЧивинияцIа захIмат ххирасса, тIайлашинна тIалав дуллалисса икIайва, яни цува дуклакисса школалийгума. Дарсирайн кьазанай шаллусса барз хьуна, цайн муабллимнал «тIалай» кунни тIий. Банмур бакъа, гиччагу профтехучилищалувун авкьуссия. Гагу ххювайрдайну кьуртал бувну, хьунма хIал кьавхьуна цалва пишалий зий. Ялагу, ттун милицанай зун ччай бур тIий, милицанал школалийн увххуна. Милицанайгу цал физрукну икIайссия зий, яла участковыйну, хьунма хIал кьавхьуну га б-мур отдельланул хьунаману ивтуна МахIаммад Омьмаровлул.

Гьай-гьай, я на, я ттул лас МахIаммад рязийну бакъассияв жула арс га отдельлануву зузаврия, му бакъассагу, га чIун дия хьинну нигьачIаву дусса, захIматсса. Чансса бакъая га ппурттуву бунагь бакъасса, жагьи-жагьилсса солдат, милицалт бандитьтурал ккуллалуша ххассал кьавхьуну, абпалухьхьун лавгсса».

- На ттула арс даврия уккан ара учин, ганал хьунаманацIангума лавгссияв. « Ттун укунсса зузалт , вил арс куна зирангсса, хIарачат





хъхъичІунсса, гъунар
бусса жагъил чара
бакъа аьркинну ур,
ттуща ва даврия укъан
ан къахъунссар,» -
куну, ганал хъунамагу
рязий къавхъуна, - жул
ихтилатравух хІала
увххуна МахІаммадгу.
- Жуща бан шайсса
цичІав бакъая, так
Аллагнахъ цІими
чІа тІурчан бакъа.
Га шинал тачІав
дакъачІин дяркъусса
кІи дия, цуппагу яла
бъавкъумур кІинтил
барз - февраль. « На
гъунтий Хасавюртливн
командировкалий най
ура , - куну, арсенал,
жухъгу барчаллагъ

куну, лавгуна. Цимивагу гъантта хъуна Ибрагъим-Халил учІан.
Гъарца къини жу телефонналувухгу овъчайссия. Гъай-гъай, гай оьсса,
бандитъурал дурцІусса шиннардий, Дагъусттаннай хъанахъмунил
хъирив къабавцІусса, ганил миллатрал къадарданул буруккиттарай
акъама нажагъсса акъахъунссия. Мунияту жугу тачІав, жува ичІува
буний, телевизор къалешайссия. Га къинигу буру хъамалгу буну
жуннийва телевизорданух буруглай. Яруссанал Цунтиннал районналий
Гелаевлуйн шаву дирну дусса дур, МахІачкъалаллал 6-мур милицанал
отдельланул зузалтрахъхъун иривну тІисса передача дур най. Му чІумал
телефонналувух овъкуна МахІаммадлуйн. Мадара хІал хъуна ганал
телефонналул трубкагу бувгъуну, жухъ ссехІ дуккан къахъанай. Мукъал
бувцІусса ласнал яруннайну ттун га ссят щак багъуна хъумунийн. Ттулла
дакІница парча багъсса ххива...», - бацІан къавхъуну, ниттил яру
мукъал бувцІуна. Утти ганища ттухъ цичІав бусан бюхълай бакъая.
Ттун бувчІуна, ниттил хъхъичІ ацІния ххюра шинал хъхъичІ хъумунил
сурат хъхъичІ дарцІуну душиву.

Жулва учала буссар: «Мурхъ бюхтгулссаксса, ццунсса бикІайссар
ганил мархригу», - тІисса. Мукссавагу, хІакъину Мусаевхъал кулпат
къакІулсса нажагъсса акъахъунссар ва жула Дагъусттаннай. Ва машгъур
хъуну бур цилва багъу-бизулину, цилва гъунардайну. ТтурчІиял шяравасса
Увайс АхІмадовичлул - Ибрагъим-Халиллул ттаттал цалва оьрму хас
бувну бур шагърулул низам дуруччаврин. 50—ку шиннардий ва ивкІун
ур ЦІуссалакрал милицанал хъунаману, 60-ку шиннардирихъ Хасаврал
милицанал хъунаману. Увайс МахІаммадовлул бувсса гъунардал, захІатрал
барашиннагу дуллай бур Хасавюртливсса кучалул, Увайс МахІаммадовлул

цІанийсса. Ванала арс АхІмад Увайсовгу хІакьинусса кьинигу ур жулва шагьрулул низам дуручлай, милицанай зий. Цалла милицанал даврихсса ччаву Увайс АхІмадовичлул чІа куну духьунссия арснал арснан Ибрагьим-Халиллулунгу, нитти-буттащавагу мютІи ан кьавхьуну, милицанайн зун увххусса, цалла жан харж дурсса ва хІакьину жуйнма бивтсса бургьихлу, инсантурал оьрмулул паракьатшиврухлу.

БивкІу бакьасса инсан акьашиву жунма циняннан кІулли. Цува дунияллий усаксса инсаннал цалла цин кьаритай ва аьрщарай, яни учиннуча, кьатри, арс, душ... Чава жагьил хьуну ур бутгал лажин кьаккарксса, бутган цІа дирзсса Ибрагьим-Халил, амма виричув ивчІарчагу, ганал цІа личІай абадлий тарихраву. Мукун Мусаевхьал цІагу абадлийра личІантІиссар ва жулва Дагъусттаннал тарихраву. МВД-лул хьхьичІ дацІан дурсса мармарчарил гьайкаланийгу, ца цІуку кунна, пар-пар тІий дур капитан Ибрагьим-Халиллул цІагу, ялун нанисса никиран эьратну чІалай.



Имара САИДОВА

ГЪИНТНИЛ ХЪХЪУНИЛ АСАРДУ



Вай гъантрай «Бархъал» кафелу, чъивусса бусравсса хъамалгу бавтуну, мачча-гъанмигу лагма лавгун, оърмулул 80 шинал юбилей кӀицӀ ларгунни ЧукӀуннал шяравасса Дагъусттаннал Чичултрал Союзрал член Бахтгун Гъазиевал. Оърмулул ва захӀматрал ххуллул хӀасиллу дуллалисса мажлисрай хъунни Бахтгуннул уттигъанну итабавкъусса «Яла лахъимур гъинтнил хъхъу» тӀисса хавардал луттирал презентация.

Бахтгун барча бан бивкӀун бия Дагъусттаннал Хакъуннал шаэр Мирза Давыдов, Дагъусттаннал Чичултрал Союзрал лакралмур секциялул хъунама Илияс МахӀаммадов, «Цубарз» журналланул редкатор Хизри Илиясов, Дагъусттаннал Чичултрал Союзрал член, Ккурккуллал школалул аърали музейрал хъунама Даниял Магъдиев, Поэзиялул театрданул хъунаманал хъиривчу Абдулкъадир НякӀучиев, Дагъусттаннал Чичултрал Союзрал член СалихӀ Алимов.

Цалва ихтилатиртгаву вайннал бивсунни Бахтгуннул творчествалия, лавайсса кӀимат бивщунни ванил шеърдан.

Бахтгун Гъазиева бивну бур 1948 шинал ноябрь зурул 12-нний ЧукӀуннал шяраву. 1965 шинал, Ккурккуллал школа къуртал бивну махъ, Бахтгун зий бивкӀун бур ЧукӀуннал колхозраву. Оърмулул 18 шинаву чивчуну бур ванил цалчинсса шеърду. Мигу хъунмурчӀин бивкӀун бур колхозниктурал, хӀухчалтрал, хъу-лухччинуха зузиминнал захӀмат лахъа-хъун буллалисса. Вай шеърду бивкӀун бур «Дусшиву» журналланий, «Ххяхха баргъ», «Цусса ххуллу» кказитирттай.

Шагърулийн бивзун махъ, сайки, 30-хъул шинай Бахтгун зий бивкӀун бур Кураевлул цӀанийсса оърчӀал азараханалий. Шеърдахсса гъавас ваниву гъар

мудангу бивкІун бур. Уттинин бувккун бур Бахтгуннул ряхва жуж. «Ттул дуниял» тІисса луттиравун ванил цачІун бувну бур цинма бавсса, кІулсса, личІи-личІисса хаварду.

Бахтгуннун дакІний дур цуппа чІивисса чІумал хъхъувай ниттишал дус-сухун батІайсса, ца супралух дукрагу дуркун, хаварду буслай цябикІайсса чІунну. Мукунсса батІавуртгал архмигума гъан байсса бивкІун бур. Щар хъуну махъсса оърмугу ванил талихІ бусса хъуну бур. 50 шинай нахІуну-хІалимну, цаннал иттав ца буруглай, оърму бувтун бур вайннал. ХІакъину Бахтгуннул чІарав бур цилва захІматрал кьадру-къимат кІулсса арсеру ва душру.

Ваймий ххювагу жуж бур шеърирдал. Чал къавхъуну Дагъусттаннал Чичултрал Союзрал итабакъин тІий бур язи-язимий бувчІусса шеърирдал жуж. Цилва шеърирдаву Бахтгун буруккинттарай бур дачІра дуклаккисса зунтгал цархъая, лакрал миллатрал ва ниттил мазрал бучІантІимуния.

Цуппа барча буллалисса ихтилатру къртал хъуну махъ, Бахтгуннул дакІнихтуну барчаллагъ увкунни цилла кьини хъун дан бувкІсса Чичултрал Союзрал вакилтурахъ, уссу-ссурваврахъ, гъан-маччанахъ. ЛичІиссава барчаллагъ увкунни цилла чІарав авцІусса Мирза Давыдовлухъ. Цилва ихтилат къртал буллай, ванил оьвчаву дунни жагъилминнайн оърмулуд бугъараминнал хІурмат бара, кувнашчал кув бавкьуну бикІияра, яла-яла хъама мабитару жулва аьзизсса ниттил маз, тІий.

Ялавай буллай буру Бахтгуннун хас бувсса ганил ссил ПатІиматлуд шеъри:

БАХТГУННУХА

*Ина ниттил був кьини,
Нину ххари хъунавав,
Ттунма душ бувссарча тІий,
Ппу пахрулий иявав.*

*Пахру-ххаралий буна,
Нину-ппу хъхъичІа занай,
Хъунма хъуну лавгунна,
Ца янил ляпІ учиннийн.*

*Нину-ппугу ливтІунни,
Чунгу лерххун ларгунни,*

*Мюрцимий уссур-ссугу
Циняв вихун багъунни.*

*Вилвагу оърчІру хъунни,
ОърчІал оърчІругу хъунни,
Цинявппа хъуни хъунни,
Цалва кулпатру хъунни.*

*Вил дур тти ссувай хъуну,
Оърмулуд шин маяцІалла,
ДакІ дур ттигу жагъилна,
Хъунмав къавхъуссара тІий.*

***ЛичІаннав ина, ссувай,
ОърчІал оърчІал хъун буллай!***



УКУНМИННАЙРИ МЕДИЦИНА ДАРЦУНУ ДУССА



Дазу-зума дакъар цалва пиша ххирасса ва му куртІну кІулсса хІакиннал къашайшалт хІин буллай, хъхъу-къини дакъа буллалисса захІматрал. Акъ-ахъунссар цавагу хІакин къашайшала ччаннай ацІан аву мурадрай, операцияртту буллай, дару-дарманну буллай цикссагу хъхъурду уттара дуккан къадурсса.

ХІакъину на бусан ччай бура кутІасса чІумул мутталией Дагъусттаннай акъассагу, Аьрасатнавугу бусрав хъусса, даврил опыт бусса, бигъа бакъасса хІакин –уролог, андрологнал пиша язи бугъусса Тахаев Ризван Аьлиевичлуя. Зун гъирагу, шавкъгу дусса жагъилсса хІакиннал вания тихунмайгу цикссагу операцияртту буллай, хІин булланссар ва рязий булланссар къашайшалт.

Ризваннул хІакиннал пиша язи бугъаврин савав хъуну бур хъхъичІва-хъ-хъичІ ванал нитти-бутта.

«Вияту чарабакъа хІакин хъун аьркинссар, тІун бикІайва ттухъ чІавани-яцІава нину-ппу, ттунмагу хІакиннал пиша яла дакІнил лавсмур бикІайва, - тІий, дакІнийн бутлай ур Ризван цувагу.

Тахаев Ризван Аьлиевич увну ур 1982 шинал Хъусрациял шяраваллил жамятран ххишала бакъа бусравсса ва хІурмат-къиматрайсса Аьлил ва Су-майсаглул кулпатраву.

ОьрчІру дуккингу бувну, хьин-хьинсса пишардай зузи баншиврул хьун-масса бияла бур цумацагу нитти-буттахь. Сумайсатлуца ва Аьлища цалва ряхвагу оьрчІан ларайсса кІулшивурттугу дуллуну, минная хьин-хьинсса пишакартал бан бювхьуну бур. ХІакьину вайннал кулпатраву ур шама хІакин: Ризван - уролог, андролог, уссу - Марат ур Москвавий ординатуралуву травматологнал пиша лахьлай, ссу Асият зий бур Склифасовскийл цІанийсса элмийсса ххалбигьавуртту даврил институтраву хІакин-анестезиологну.

ЧивинияцІава хІакин хьун хияллай ивкІсса Ризваннул, школа кьуртал бувну бур марцІсса ххювардай. ХьхьичІунсса хІасиллашчал школа кьуртал бувнугу, ци багъана савав хьуссарив, ванан «Мусил медаль» дуллуну дакъар.

ЩилчІав кумаг къабувну, цалла кІулшивурттайну ва цайнува цува 2000 шинал Ризван увххун ур дуклан Дагъусттаннал Медициналул академиялувун. 2006 шинал Мусил медалланушчал кьуртал бувну бур ванал Дагъусттаннал Медициналул академия. ХІакиннал пиша куртІну лахьхьаву ва даврил опыт сакин шаву мурадрай, Медакадемиялул 4-мур курсирай, урологиялул дарсру лахьлахьхьисса чІумал Ризван, хІакинтурачІан дежурствардайн занай, миннан кумаг буллай, зий икІайсса ивкІун ур. Му ппурттуву ххуй бивзун бур ванан урологнал пишагу.

2006 шинал Ризван цалва хІарачатрайну Москвауллал Цуллу-сагъшиву дурччаврил департаментрайхчІин увххун, Москвауллал яла хьунмур Урологиялул клиникалий ординатура кьуртал бувну бур. Ординатуралуву ккалай кІилчинсса шинал Ризван Аьлиевич айивхьуну ур Москвауллал 47-мур урологиялул больницалий анаварсса кумаграл хІакинну зий, дежурствардайн занай.

Ординатура кьуртал бувну, хІакиннал сертификат ларсун зий айивхьун ур личІи-личІисса Москвауллал клиникарттай, поликлиникарттай, цивппа заллусса медициналул центрдай, къашайшалт къамул буллай.

ЦІанакул Ризван зий ур Москвауллал 57-мур больницалий уролог, андролог, онкоуролог, генитальный хирург, ультразвуковой диагностикалул хІакинну.

Цалва пишалул даража гъаз баву мурадрай, хІакинну зий унува, аьрхІала чичлай ур Аьрасатнал эндоскопиялул урологиялул ассоциациялул президент, машгьурсса профессор Мартов Алексей Георгиевичлул каялувшиннаралу медициналул элмурдал кандидат хьунсса диссертация. ЧІал къавхьуну хьун най дур защитагу.

Ризван Аьлиевич гъарица зуруй учІайссар Дагъусттаннайсса медициналул клиникалий къашайшалт къамул буллан. Сант дирирну дуна, ванащал хьуна бавкъун, булав цаппара суаллу.

- Ризван Аьлиевич, цукунсса азарду духлахиссар урологиялувун ва андрологиялувун, ци личІишиву дуссар миннул дянив?

- Аьмну ласурчан, урология ва андрология ца журалул азарду хьанахьиссар. Урологиялувун духлахиссар ччаруллал, пурпуххул, кистарду, чартту, дурухрурду шаврил ва чІярусса цаймигу азарду. ЧІявуминнан ххан бикІай урологиялул азардал так арантал бакъа къашай къашайсса ххай. Вайра чартту шаврицІун, ччаруллив сагъ бакъашивруцІун, циститру, кистарду, дурухлурду шаврицІун дархІусса азарду дусса хьамигу бухлахиссар урологиялувун.

Андрологиялувун духлай дур хьунмурчІин арамтурал оьрчІ бакъашивруцІун, простатитру шаврицІун ва миннуцІунна дархІусса цаймигу азарду. Ва сфералувун духлахисса азардава ца яла ччя-ччяни хьунадакъаймур дур

простатит. ХъунмурчИин простатитрал къашавай бур зунттаву ялапар хъанахъ-исса, хъунмасса хІаллай ккурчІав, бявкъусса чарттай цябикІлай, ягу цалва цивпа бурукъавччуну бявкъу-гъили хъусса, жагъилминная тІайла хъуну, хъунив хъуминнайн бияннинсса арантал. Аденомалул, дурухлурду шаврил азарданул къашавай бур оърмулул 50 шинава ливчусса арантал. Вай азардая бурувччуну бикІаншиврул, 45 шинава ливчусса цинявпагу арантуран чара-бакъа аьркинссар, урологначІан лавгуну, ккаккан дурсса анализругу дуллуну, цалла цІуллу-сагъшиврул ялув бацІан. Му бакъассагу, къашайшалт бакІрай бацІан буллау, миннахъ буслан икІара цумур духъурчангу азар хъиннура гужлан хъанахъишиву хІан хІачІаву, къалиян учаву сававнугу.

- Урологиялувун дагъайсса цумий азарду дусса къашайшалт хъуна-бакъай хъунмурчИин Дагъусттаннай?

- Дагъусттаннай ляличІинува чІявусса къашайшалт бур урологиялул азардал къашавайсса. Цаймий регионнах бурувгун, жучІава чІявусса къашайшалт бур ччаруллаву, пурпуххуву чартту хъусса. Чартту шаврил сававгу хъанай дур жура хІачІайсса щинаву чІявусса минеральные соли бушиву ва инсаннал организмалул обмен веществ багъайкун зий дакъашиву. Къашайшалтран маслихІат ккаккан икІара щара лархъсса ва марцІ дурсса дакъа щин махІачІару тІий. Урологиялул пиша хъхъичІунмай баврил чулухагу, жулла Республика вайми регионар махъун дагъну дур. Мунияту жучІава урологиялул азардал къашавайсса агъалигу гъарзасса бур.

- Цуксса дур цІанасса медициналуву арантурал оърчІ бакъашиврул азар хъин дувансса кашаи?

- Махъсса ппурттуву цинярдагу азарду «жагъил хъуну дур», чІявусса жагъилтал бур оърчІ къахъанай азурда хъусса. ХІакинначІан увкІсса, сайки, гъарица кІилчинсса, шамилчинсса жагъил уссар оърчІ бакъашивруцІун дархІусса азарду дусса.

Цумацагу къашайшала ххал увну, хъирив бивзун мукъах, мунах ккаккан дайссар хасъсса лечение. Цавай даруртту бувну, цавай операцияртту бувну, ягу цаймий кумаг байсса медициналул методру ишла дурну, хІакъинусса къини мукунсса къашайшалт, сайки, циняв хъин буллау буссар. НукІува кІицІ лавгсса куццуй, арантурал оърчІ бакъашиврул азарду хъиннура гужлан дуллалиссар хІан хІачІаврил, пІапІрус учаврил, личІи-личІисса биодобавкартту ва гармонну дукралувух хІала дуллалисса иширтталгу.

- Ризван Аьлиевич, мюрщи оърчІай суннат цими шинаву ва цукун бувну хъинссар?

- Суннат цуксса ччясса оърмулуву буврив, муксса хъинссар ва му анаварсса мутталий хъингу шайссар. ЦІана чІярусса рекламартту дур личІи-личІисса жураддай суннатру байсса куц бусласисса. Миннувасса ца дур лазерданух суннат буллалисса. Ттухъ цІуххирча, ва дур яла къадучІимур метод. Цанчирча, лазерданул бурчу ччуччин буллалиссар, яла му хъингу шайссар чІалну. Ни-ну-ппу тІурчан буссар лазерданух суннат барчан, цІун къашайсса ххай, ягу оь ккабуккайсса ххай. Мунияту цанна му цирив къакІулну дунува, циняв буссар лазерданух суннатру буллау. Лазерданух суннатру бувну, шаппай бувкІун махъ, щавурду оьттуруцІай, хІакинтал азурдай хъанай бикІай. Мукунсса

цикссагу иширттал хІакъираву ттуйн оьвтІий, ци бувну хъинссар щавурду оьттукъаруцаншиврул тІий, цІухлан бикІай хІакинтал.

Мунияту на маслихІат бара, ка сававсса, даву канилух дурксса хІакин-урологначІан лавгун, суннатру баван.

- Ризван Аьлиевич, Дагъусттаннал, Чачаннал, Ингушетиянал ва цаймигу республикарттайсса медициналул клиникарттай къашайшалт къамул буллай, операцияртту буллай вил цІа бусрав хъуну дур. Вай клиникарттал мудана цачІава зун ачу тІийгу бухъунссар вихъ?

- Дагъусттаннал ва цаппарасса Ухссавнил Ккавказуллал регионалийсса медициналул клиникарттал тІалавшиннардайн бувну, ччя-ччяни учІара къашайшалт къамул бан, операцияртту буван, ягу миннан аьркинсса цаймигу медициналул маслихІатру ккаккан. Мййжанссар, дагъусттаннал цаппара клиникарттай хирургну зун оьвтІий бия ттуйн. Цалсса ттун ттулва пиша куртІну лахъхъаву, даву канилух дуккан даву мурадрай шиккува авцІуну хъинни. Гъай-гъай, жулла республикалух бурувгун, Москвалийсса больницарду уттизаманнул оборудованиялия тІайла хъуну, хІакиннал даврин аьркинсса цинярдагу шартІирдал дузал бувну бур. Буниялагу, цІанакулсса медициналул кашигу, бюхъугу хъунни. Жу операцияртту буллай буру инсаннал чурххан чанну зарал биян буллалисса уттизаманнул оборудованиярттай. Мунияту, сант дирирну дунура, бусан ччай ура, захІматсса урологиялул, онкологиялул операция буван багълагъисса къашайшалаща, аьркинсса джокументругу дузал бувну, Москвалий нава зузисса больницалийн бувкІун, уква операция буван бюхъантІишиву.

- Ризван Аьлиевич, хІисав шайрив вин инава Дагъусттаннаясса, жагъилсса хІакин хІисаврай Аьрасатнавусса къашайшалтрал винна вихшала къадуллалисса кІанттурду?

- Дагъусттаннаясса, Ккавказнавасса, ягу жагъилсса хІакин ур куну, хІисав къауллалисса ишру ттун ттулла давриву уттинин тачІав хъунакъабавкъунни. Инсаннал ккаккан буван аьркинссар цува цу уссарив, мунахсса бургавугу мунихара лархъхъуссар дусса.



ЗАННАЛЛА ХІАКИННУ ЛЯХЪАН УВМА



Цумацагу хІакиннал буллалисса захІматран яла лаваймур кьимат бур къашайшалт рязийну личІаву. КъачІявуну хьунабакъай хІакиннахь барчаллагь тІисса инсантал цІанасса заманнай. Мукума нажагьсса хьунабакъай уква операция бунни, ххуйну буруглай бия тІисса инсанталгу. Уттигъанну «Илчи» кказитрал редакциялийн увкІунни МахІачкъаллал клиникалул азарханалий хьин хъанай ивкІсса Маркъиял шяравасса Къурбанов Жалут, Мусал арс. Жалут буслай бусан къашавай ия Аьрасатнал ФГБУЗ ЮОМЦ ФМБА МахІачкъаллал клиникалул азарханалий (хьхьичІва ванийн учайссия Портовская больница) хирургиялул отделениялул заведующийну зузисса дакІ-цІимисса, цалла даву ларайну кІулсса, къашайшалтраха аякъалийсса хІакин, жулва лаккучу, КІулушацІиял шяравасса ХІасанов МахІаммад Шамильевичлул инсаншиврия. Ванал тавакъюрайн бувну, жулва буккултрангу укунсса хІакинная кІулу бикІаншиврул на хьунабавкъура МахІаммад Шамильевичлул.

Клиникалул хІаятравун бухлахини, най дунува итталун дагълай дия марцІ-шиву ва низам. Азарханалул хьхьичІ бия мурхьирдал вив лавсусса, тІутІал ва щюллишиврувун багълавгусса парк. Хьхьирил зуманицІ бивхьусса, хьхьирил гъавалул къанкъ ришлашисса азарханалийн багьсса къашайшалт цивпагу бия, жу шикку санаториялий кунма буру, тІий. ЖанахІраву ва палатардаву бия хьинну марцІсса гъава. ЧІалай бия къашайшалтраха хьуннасса аякъа дусса хІакинтуралгу, шиву зузисса персоналланулу вайннан ичІура куннасса шартІру дузал дан хьунмасса хІарачат бувну бушиву.

20ІІ шинал МахІачкъаллал клиникалул азарханалий хирургиялул отделение тІивтІуния шихунай заведующийну зий ур хІакин-хирург ХІажиев МахІаммад Шамильевич. Шиккун учІаннингу, ванал медициналул даврий

зий биялсса опыт хьуну бур. Ва халкъуннан кӀулну ур за кӀулсса, кару сававсса, бусравсса хӀакинну.

1995 шинал Дагъусттаннал медициналул институт къуртал байхту, хьхьичӀунну дуклакисса жагъилсса хӀакин най унува хирургну увцуну ур Кочубейливсса медсанчастьрайн . ХӀакиннал даву дакӀнихтуну дуллалисса жагъил шиккугу ччяни итталун агъну ур. Хъунма хӀал къавхьуну МахӀаммад Шамильевич увцуну ур Тарумовккаллал азраханалий хирургну зун.

1999 шинал гъунар бусса пишакар хӀисаврай ва тӀалав увну ур МахӀачкъаллал муххал ххуллул азарханалий зун. Ванал шикку хирургну зий дурну дур II шин.

Гъашину 6 шин барт лаглай дур МахӀачкъаллал клиникалул азарханалий хирургиялул отделение тӀиртӀуну. Ва отделение цӀуну тӀитӀлатӀисса чӀумал, МахӀаммад Шамильевич буслай ур къашайшалтрансса кроватьру, тумбочкартту батӀлай, цимурца давуртту дуллай цивппа зий бивкӀшиву.

Цанакул хирургиялул отделениялий укунма хьин буллалисса къашайшалт хӀисав къабувну, буллай бур кьинилун кӀива –шанма операция.

- ЧӀявусса къашайшалт бур сситтучӀикӀраву чартту бусса ва грыжардал инжит буллалисса. СситтучӀикӀравусса чартту бяххан бансса дару-дарманну буллалисса къашайшалтран кӀулну бикӀан аьркинссар муния цанна хъуннасса нигъачӀаву душиву. Чартту бусса сситтучӀикӀ, так операция бувну бакъа, хьин бан къашайссар,- тӀий, къашайшалт бакӀрай бацӀан буллай ур МахӀаммад Шамильевич.

Шиккува кӀицӀ лаган, клиникалий хьин буллай бур паспортрачал ва полисрачал увкӀсса цумацагу къашайшала.

ХӀакьину ва отделениялий МахӀаммад Шамильевичлушал архӀал зий ур лавайсса квалификация дусса кӀива хирург ва ца оториноларинголог. Хирургиялул отделениялий бур I7 къашайшалансса кӀану. Отделениялий операциартту буллай ва дарурттайну хьин буллай бур ситтучӀикӀраву чартту бусса, аппендэктомия, варикоцели ва гидроцели, гемарой, артрозру, бурчуйсса зарал бакъасса дурухлурду дусса ва цаймигу азарду дусса инсантал.

Цалла даву ххуйну кӀулсса хӀакиннал цӀа ччяни кӀул шай агъалинан. Шиккун нанисса чӀявумий къашайшалтгу бур МахӀаммад Шамильевичлул цӀа дургъуну букӀлакӀисса. Мьяжаннугу, хӀакин хьхьичӀива –хьхьичӀ икӀан аьркинну ур цалла иттав бурувгсса къашайшалтрах дакӀ цӀимисса ва личӀлулсса, аякъа дуллалисса.

- Жунма цаймий хӀакинтал жухва цукун бурувгун ччан бикӀай, жугу мукума бургару къашайшалтрах, хӀарачат буллан бикӀару миннашал маз лякъин, рахӀат хъунмур бусан. Къашайшалтрал хӀакинтурал чулухунмайсса бургаву, жура миннаха дуллалисса аякъалияр хьар хъанахьисса, - тӀий ур МахӀаммад Шамильевич.

ЧӀивинияцӀавасса хӀакин хъунсса цалва хиялгу, МахӀаммадлул хьхьу-кьини дакъа медициналул элму куртӀну лахьлай бувсса захӀматрайну дузрайн буккан бувну бур. Ванал буттан Шамильлун хьинну ччай бивкӀун бур арсна хӀакин хьуну. Утти МахӀаммад Шамильевичлул кулпатраву циняв медиктал бур. Щарсса дур невропотолог, хъунама арсналгу буттал пиша язи бувгъуну, гъашину дуклан увххун ур Медициналул университетравун.

Медициналул практикалуву винма яла дакӀний личӀансса иш цукунсса хьур куну цӀувххукун, МахӀаммад Шамильевич буслай ур, Кочубелийсса

азарханалий кьюкІлийн ххаржанналул шаву диян дурсса кьашайшала ххас-сал уллай, ххюра ссятрал мутталий булла ивкІсса операциялия.

Лавайсса категориялул хІакин МахІаммад Шамильевичлул медициналул давриву бувсса захІматрахлу лайкь дурну дур Аьрасатнал Цуллу-сагъшиву дуручаврил министерствалул чулухасса цикссагу хІурматрал грамотарду ва барчаллагьрал чагьарду.

Ванал цалла яла хьунмур наградалун ккалли бай кьашайшалтрал чулу-хасса барчаллагьру.

МахІаммадова Раиса:

- МахІаммад Шамильевичлул бунни ттул ситтучІикІрай операция. Ххуй-ну хьунни операциягу, рязийну ливчІунна навагу. МахІаммад Шамильевич буниялагу Заннаясса хІакин ур. Ванал каруннавун нава багъаврия пашман кьавхьура. Ва клиникалий, цимурца хІисавравун лавсун, шаллу дурну дур кьашайшалтрансса шартІру. КІицІ кьалаган кьахьунссар кьашайшалтран дуллалисса, ичІура кунна, нахІусса дукрардугу.

Мирошникова Людмила:

- На ттулва оьрмулуву цалчинна азарханалийн багьсса. Шиккун нанинигу хьинну буруккиттарай бивкІра азарханалий бацІан кьахьунссар, гьантта бикІан шаппай зананна тІий. Амма ттун шиккусса хІакинтуралгу, медсе-страхьалгу аякьа муксса ххуй дирзуннихха, цалчинсса гьантрайва бувчІунни нава нахІакьдан нигьа бувсун бивкІшиву. Ттун нава клиникалий бушивувагу асар кьавхьунни, ичІура куннасса тагьар дур шикку. МахІаммад ШамильевичлулчІан багьсса цинявпагу кьашайшалтрал ванайн Заннаясса хІакин учай, нагу мукунма тІий бура. Ва гьарица кьини учІай цалва кьашайшалтрачІан, гьарманашал ихтилат бай, гьарманах вичІи дишай. Мьяйжаннугу, хакІинтал цалва кьашайшалтрах аякьалий бикІан аьркинхьунссар, аммарив цинявн-нал мукунсса бургавугу кьадикІай. Шамильевич палаталувун уххайхту, му ккаккайхту, жун яхьанансса гьира-шавкь, вихшала ххишала шай.



Хизри ИЛИЯСОВ

ИХТИЛАТРУ

Ккурклиясса ишбажаранчи
Абдуразакъов Сайпуллагъ Маматилаевичлушалсса ихтилат



- Сайпуллагъ Маматилаевич, журналланул буккултрахъ вилва оърмулия бусан тавакью буллай ура.

- Бусан личисса ци баклави. На увссара 10-мур августрай 1950 шинал Лакрал алжаннаву, «зунтгал ва журюжантгал ляхъан дурсса Ккурккуллал шяраву» (Камалова Аида Атаевнал шяърилувасса махърури вай).

Нину, Магъдиева Аьйшат Загъидиевна, аьпа бан цил, байбихъулул клас-сиртгал учительницану зий биклайва, ппу, Абдуразакъов Маматилав Абдуразакъович – щупир ия: аьпа бан цал...

На ияв нитти-буттал усса акъасса, мурадиран увсса ца арс, хъуна хъанайгу ивкIра хъунтатгал, Буттал кIанттул цIанийсса дяъвилул ветеран Магъдиев Загъиди ЯхIъяевичлул хъунмасса ва хIала-гъуртгусса кулпатраву. На талихI бусса ивкIун ияв: ттух ца ниттил аякъа дакъасса, мачча-гъанналгу ургъил байва.

- Ина школа чув къуртал бувссар?

1968 шинал на къуртал бувссар Ккурккуллал Дянивмур даражалул

школа: хьунмасса гъира бикIайва ккалан. Ттун яла-яла ххирая «Химиялул» дарс, яла ххирамур учительницагу СалихIова Роза Саниевна бикIайва. Ци-нявпагу учительтал хIурматрай дакIнийн бичлан икIара: гайнная гъарная ци-бухъурчагу ттун лавхъхьунни, оьрмулуву аьркин хьунни. Цанчирча, гай цалва пишалул усттаргал бия. Школалия бувкссар 56 элмурдал кандидат ва 8 доктор.

Та чIумалсса кIулши ласаврил къяйда личIисса дия: оьрчIан гъарзат лахъ-хьин байва. Тти тIурча, так гихуннайсса дуккавриву аьркин хьунмур дакъа къадулай. Баччи бакъаявхха мурагу кIулну дикIайссания. Ттул пикрилий, дуккаврил масала захIматну бур школардай бакъасса, институтирттавугу. Цана ларайсса кIулши дулайсса Вузру чIяву хьуну бур. Мий къуртал бувмийгу даву дакъа личIлай бур.

- Сайпуллагъ Мамматилаевич, ина армия лавхъуссарив?

- 1969 – ния 1971 шинайн бияннин къуллугъ бувссар ГДР-навусса совет аьралуннаву. Ттун талихI хьуна: на агъунав учебно-разведывательный школалийн Н.А.Хавчаевлушчал, М.Массуевлушчал, Р. Ванатиевлушчал. На му школа марцIну ххювардай къуртал бувссия. Армиялул жагъил къянкъа лаган увайсса ия. Микку хьусса дусшиву цакъсса дикIайсса дия. ГДР-наву ттун дуллауна бахшиш: «За воинскую доблесть» (Аьскарнал виричувшиву) тIисса медаль.

1971 шинал увхссара ДГУ-рал технологический факультетравун, 1976 шинал къуртал бувссар. Деканну ия Гамацаев Къурбан Рамазанович, мунащалсса дахIаву жул ттигу-шилагу дурр. Жул хьинну бавкъусса, цаннал ца лавссса курс бикIайва, гъарца ххюра шинай жу хьуна бакъайссияв, преподавательтурайн ва деканнайну оьвкуну.

Ттул шарссанийн Земфира Шагъумилаевна чайссар, га элмурдал кандидатри, Информатикалул ва Информационный технологиялул ДГУ-рал кафедралул доцентри. Жул шанма оьрчI буссар: арс ккарччал хIакин ур, душру экономистал бур, хьунмур душгу ДГУ-рал «Экономика труда и управление персоналом» (ЗахIматрал аякъа ва каялувшиву) тIисса кафедралул доцентри, элмурдал кандидатри. Ттул оьрчIал оьрчIру хьуни хъанай бур, нагу ххарину ва пахрулий ура.

- Институт къуртал бувкун, ина чув зий ивкIра?

- На тIайла увккунав (по распределению) Хасаврайсса консервный завод-райн мастерну, яла зий ивкIра цехрал хьунаманал хъиривману, отдел сбытрал хьунаману, 2 шинай – рыбоконсервный комбинатрай МахIачкъалалив. 1983 шинай тинай зий ивкIра МахIачкъалаллал комбинат хлебопродуктоврай цал хьунама механикну, яла хьунама инженерну, «Махачкалахлебопродукт -I-мур» хлебозаводрал директорну. Цана тIурча ОАО «Махачкалинский комбинат хлебопродуктоврал» хьунаманал хъиривчуну ура.

2005 шинал тамансса хIаллай диялсса даву дурну тIий, Госсоветрал хIукмулийн бувну, ттун дуллауна Дагъусттан Республикалул ХIурматрал Грамота.

- Ци чара ина коррупциялушчалсса талатаврийн?

- Коза Ностра тIий, Дон Карлеоне тIий, коррупция даин диркIссар, му так ца жулла азар дакъар. Н.В.Гоголь муния чичлай ивкIссар. Амма мунийну Чичиковхьул бухкъалавгссар.

- **Ци зун аьркинссар жува жулла магьирлугъ ядуван, маз ябуван?**

- Цалла шаппавагу ниттил мазрай гьалгъа тIун аьркинссар. Мюрщину буна, оьрчIру бутгал кIанттайн буцаван аьркинссар, гайннахь лакку мазрайсса литература ккалан аьркинссар. Магьирлугърал зузалтралгу аьркинни ялун нанисса ник тарбия даврих къулагъас дан, ниттил мазран хас дурсса передачарттайн жагьилтал машхул бан, гайннал буруккинну ци бузив ххалбан.

- **Ина чIун цукун гьан дара? Игъа цукун лагара?**

- Ттул тамансса ххаллилсса дустал бур. Жу ахIал бигъалагару. Жул бигъалагавугу – республикалий хъанакъисса иширттаву гьуртту шавури, мазран, адабиятран, магьирлугъран хас дурсса. Жу гьуртту хьуру машгьурсса чичу Мариам Ибрагъимовна Ибрагъимовал 100 шин шаврин бувну МахIачкъалалив ва Гъумук дурсса байранналуву. Мукумма Ккурккуллал Щазал 150 шин шаврин хас дурсса къини кицI лагавривугу.

ЧIун хьутари, на гай кIивагу хъамитайпалул луттирду ккалан икIара. Вилва миллатрал гьунарду ккаклайни, гайннал акъилшиву ва элму чIалайни, дакIгу пахру-ххарарал дуцIай, навагу ва миллатрал ца касакрахха тIий.

- Барчаллагъ хъунмасса, Сайпуллагъ Маматилаевич, жугу вицIа ххариссару ва рязийссару...

* * *

**АДАМОВ АБДУРАХИМАН
МАХИММАДОВИЧЛУЩАЛССА ИХТИЛАТ**



- АбдурахIман МахIаммадович, тавакъюри вилва оьрмулия бусаву.

- На увссара 19 октябрданий 1949 шинал Ккуллал районналийсса Хъусрациял шяраву, колхозникнал кулпатраву. Нитти-буттал жу бияв 8 оьрчI: 4 арс ва 4 душ.КIия хъунама уссу жуя личIи хъунни. Жу я аваданну, я мискинну къабивкIру. ОьрчIшиву ттул талихI бусса дия. ДакIния къадуккай тяхъасса хьурдуккавал къини, бакIлахъи лакъаврил байран. 8 – 9 классраву ккалайни, жу тIайла буккайвав, бригада бувну, Бабаюртуллал районналин (къюмай тIутIуйн кказа баву, гивч батIаву), Бакресский зоналин, ппаллу марцI бан.

Гъинттул ризкъилун лазуни хIадур дуллангу багъайва, кIива зуруй (июль, авгъуст) зунттаву хъунхIухчил кумагчину зунгу багъайва(нис духхуну). Яла хъуннамур ххиришиву дикIайва сентябрь – октябрданий циксса къинирду ляркъуссарив бувсукун.

Ттул ппу ия Буттал кАнттул цАнийсса дяъвилул II группалул инвалид. Га молочно – товарный фермалул бригадирну зий икАйва. Нину колхозница дия.

- Ина школа та, чув къуртал бувссар?

- 1967 шинал на Хъусрациял Дянивмур даражалул школа къуртал бувссия. Дарсругу туну учительтурайхЧин ххира шайхъунссар. Физика ттун ххирая хьинну. Цанчирча, га дарс дурчИн дурну, дакІний личІанну дишайва Дагъусттан Республикалул халкъуннал учитель АхІмадов ХІасан АхІмадовичлул. Тарихрал дарс дишайва жул классный руководитель, Дагъусттан АССР-данул лайкъ хъусса учитель Билалов Рамазан Билаловичлул, цалла касмулул устарнал. Лап хьинну дишайва географиялул дарс Дагъусттаннал АССР-данул лайкъ хъусса учитель МахІаммадов Саид МахІаммадовичлул.

СССР-даний яла ххуймур кІулши ласаврил система дикАйва. Аьрастанал му къадиртунни, Великобританиянаву тІурча ишла дуллан байбивхъунни совет хІукуматрал кІулши дулаврил система. ХІакъинусса Аьрасатнал кІулши дулаврил къяйда ухчІин ларай кІура дарсса дур. Цуппа СССР-данул, Аьрасатнал тарих баккин бувну бур. ХІатга совет классиктурал произведенияртту бусса луттирду бишлай бакъар.

- Ина Армия лавхъсарив?

- 1968 шинал на Совет аьралуннавун увцунав. Германиянаву переправочно – десантный батальонналуву инженерный войскалуву ивкІссара. Армиялул лавхъхьин бувна ссавур дан, бакІрачІан бувкІмур бухІан, низамрай икІан, спортращал дусшиву дан. Яла –яла Ватанналул патриот хьун.

- Вил ларайсса кІулши дуссарив?

Армия лавхъун махъ, 1970 шинал дуклан увхра физико – математический факультетрайн Дагъусттаннал пединститутрал. Бувагу ца шанма буссия, мугу История КПСС-ран, яламий кыматру циняв ххювардуя бусса.

Барчаллагъращал дакІнийн бичлан икІара декан Владимир Иванович Чернобай, Аьбидин Аьбдулкъадырович ХІайдаев, математический анализрал лектортал Ценова, АсхІабова ва м.ц.

Яла ххирамур дарс дикАйва аьмсса физика, мунил кафедралый дипломгу ласун хІадур хъуссия. Му диплом ласайхту, на увхссияв инженерно – строительный факультетравун Дагъусттаннал политехнический институтравун. На лархъхъуссия инженер – строитель тІисса санят.

- Буси вилва кулпатрая.

- Ттул щарсса Лиза МахІаммадовна, ларайсса педагогический кІулши лархъхъусса бур. Га МахІачкъалаллал СШ №5 учительницану зий бивкІссар. ЦІана пенсиялий шаппа бур.

Ттул бур шама арс, мукъа арснал арс ва ца арснал душ. Цаягу арс хІукуматрал даврий акъар, циняв цалва маэшат буллай бур. Шамагу арснал ларайсса юридическое образование дуссар. Хъунама арс МахІаммад психологиялул элмурдал кандидат хъунни.

- Буси вилва захІматрал биографиялия.

1967 шинал на зун айивхьура Дагъусттаннал управление строительство завод железобетонных конструкции бетонщикну. Дурккуну махъ, на тІайла увккунав амсса физикалул институтрал кафедралийн. Амма, Обком ВЛКСМ-рал тавакьюрайн бувну, Дагъусттаннал областной штаб студенческих строительный отрядоврал хьунаману ивтунав. Микку 8 шинай зий ивкІра.

1983 шинай тинай зий ивкІра партийный даврий: Кировский Райком КПСС-рай, МахІачкьалаллал Горком КПСС-рай, Дагъусттаннал Обком КПСС-рай цал интерном отдела строительства, яла ответорганизаторну организационно – партийный ва кадровый даврий Обком КПСС-рай.

1988 шинал Лакрал районналул Райком КПСС-рал Пленумрай увчІуссара Райком КПСС-рал І-ма секретарьну, 1990 шинал Райсоветрал сессиялий – Райсоветрал председателъну.

СССР лияннингу, лирну махъгу 5 шинай Всероссийский внешнеторговый объединениялул «Росвнешторграл» Дагъусттаннал отделениялул хьунаману ивкІссара, ООО «Стройимпексрал», центр занятости населени-ялул Министерства труда и социального развития Дагъусттан республикалул директорну ивкІссара, «Центр по назначению и выплате пенсий ПФР РФ по РД-лул» хьунаманал хьиривчуну ивкІссара, «Комитета по лесному хозяйству РД-лул» пресс-службалул хьунаманугу ивкІссара.

2014 шинал увчІуссара республиканский территориальный профсоюз работников жизнеобеспечениялул хьунаману.

- Ци диялдакьашивуртту хІисав хьуна вин микку?

- Жилищно – коммунальный хозяйстволулу проблемартту чІяруссар даингу: авсса турбарду, зирзун нанисса ттукІрал ххаллу.

Масала, Дербент ва Буйнакск 30 % шинал щаллуни бусса, мукунна ххуй дакьасса щин хІачІлай буссар Гьанжилив яхъанахъимийгу. Мий гьар-задрал сававгу: харж лагьсса бушавури, пишакартал чІявуну баххана хъанай бушавури, комплектованный производственный базарду, теплоснабжениялул, водоснабжениялул идарартту бакьашавури, зузалт хІадур байсса учебный комбинатру бакьашавури.

Профсоюз жизнеобеспечения дуссар циняв шагьрурдай, так ца Южно – Сухокумскалий личІаннин.

Жул буссар Президиум (7 инсан) ва Совет (2 инсан).

- Ци чара ина жулла республикалий нанисса коррупциялуцалсса талатаврийн?

- Коррупция –му щаллагу дунияллул азарди, Авьзал заманнал Греция-нава байбивхьуну, хІакьинунийнсса. Амма ляличІийну жулабий бугьлай бакьлакьаву кьатІайлассар тІиссара, цанчирча, так ца Сахалиннал губернаторнал дарцуну дур бачІи Дагъусттаннал бюджет бугьансса арцу. Га Аьрасатнаву ца акьархха, агана лулттурасри ласлай бивкІсса чиновниктал,

прокурортал, генералтал бугъарча, миннал дарцумур цанний-ца диширча, Дагъусттаннай дарцумур, хъхъириву кунт кунма, чалантиссар. На мий коррупционертурахлу уклай акъара. Агарда, къасттангу, гай къачагътал бушиву тасттикъ барча, багъайсса ххуллугу ласун аьркинссар. На къарязийссара ляличийну Дагъусттан иттав къалану чалачи буллалаврий Центрданул. Шиккун миллиардру итабакълай бивкми чун бурувгун бивкиссар? Аудит цан къадурссар?

Микку жавабрунир чявусса суаллу бур.

- Ци чара ина маз, магъирлугъ, жулва мархри ябаврил хакъираву?

- Му хъинну агъамсса масала бур жулва миллатрал хъхъичи бавцусса. Мий гъарзат хънахъиссар Лакрал ва Ккуллал районну дачира хъуну най дуну тий, захматсса ишираву Цуссалакрал район лирчун дуну тий. Амма хъуннасса аьй, явара, жуйрагури дусса. Жува буттал мина хушрайрихха къадиртсса. Лаккуйсса школарттай оьрчру чанну бур, шагърулимий лакку маз лахлан ччай бакъар. Мунияту цайминнавух хала бувххун, неххаву ххюл кунма, бьвххуну гъан най бур.

«Илчилул», Лакрал драматический театр им. Э.Капиевлул, «Цубарз», «Чавалачинналул» дуллайсса бусравсса давугу бакрайн дуклай дакъар, гай меценатътурал къабивгун буну тий, гайннах бак дугъайсса акъа тий.

Агана жува цинявннал чичирча жулва газет-журналлу, оьрчалгу мий ккалан бюхъайва. Жува турча шаппавагу гайннащал лакку мазрай гьалгъа тий бакъару.

Ттул пикрилий мий иширттал хъирив лаян лакрал Съезд батирча хъина, миллатрал Маслихат бувчирча хъина. Му Советрал халкъунная талавшин дан бюхъайва, мазрал, культуралул ялув бацан бюхъайва.

- Ина оьннасса чун цукун гъан дара?

- Оьннасса чунгу хайрданун гъан данмур буллан икара. Ттун ккалан ххирар. Яла-яла А.П.Чеховлул мюрщи хаварду, цана турча Мариам Ибрагимовал луттирду ккалай ура. Ф.М. Достоевскийл «Преступление и наказание», «Къачагъшиву ва таммихгу» цуницла буккав. 1990 шиная тинай хънахъиссара подписчикну ва редакционный коллегиялул членну «Илчи» газетрал. Навагу «Тархъансса Профсоюз» тисса газетрал редакторда.


Ххирар ттун ккалан назмурду М.З.Аминовлул, Мирза Махаммадовлул, Расул Хамзатовлул. Махъсса ппурттуву лавгра Сибирбаг Къасумовлул «Оьтту ва макъ» тисса пьесалийн. Ттун хъинну даки даркъунни му пьесалий. Ххуйсса луттирду итабавкъунни Сугъури Увайсовлул, Мирза Давыдовлул, Булбул Омариовал ва Хизри Илиясовлул.

Утти дазул къаталлил хъуну бур ххаллилсса совет заманнул чичулт Чингиз Айтматов, Олжас Сулейманов. Щилли къабувккусса «Плаха», «Последний полустанок»?

Ттул пикрилий гъарца лаккучунал чичин багъавайссар «Цубарз» журнал, цанчирча, муний чявуну агъамсса масалартту гъаз бувну биклай.

- Барчаллагъ вин хъунмасса, дакинин ччимур барбигълай итаннав ина...

**МАХІАММАДОВ АБДУРАХІМАН
КЪУРБАНОВИЧЛУЩАЛССА ИХТАЛАТ**



- Абдурахман Курбанович, журналланул буккултрахъ вилва оърмулия бусаву тавакьюри.

- На увсара Ккуллал районналийсса Ккуллал шяраву 1955 шинал, учительнал кулпатраву.

Ттул ппу – Курбан цалчинсса дипломированный учитель ивкІссар.

Ганал Гъумук къуртал бувссар Педагогическое училище. Зун ивкІссар химиялул ва биологиялул учительну цал Ккулув, яла завучну Цийшав. Мунишала ахІал Вихъливгу дарс дихълай ивкІссар.

Ттул ттатта –МахІаммадов Цаххай МахІаммадович Лакрал округрал райзорал (районный земельный отдел) хъунаману ивкІссар, 1934 шинал Ккуллал район хІасул дурний, Райисполкомрал председателюну ивтссар. Райком тІурча хІасул бувссар так 1935 шинал. 1937 шинал, ттатта увгуну, авкъуна, «троцкистри» тІий. Ци троцкистья икІайсса 4 класс къуртал бувсса чув? Га большевиктурал партиялул членну ивкІун ия 1915 шинная тинай. Ганал цува заллусса навт буккай компания Чачаннал республикалийсса Шали тІисса шяраву диркІун дия. Ттул ниттил нину Басират чачанни. 1918 шинал гай бивзун бур Ккулув. Халкъуннал каялувшиву дан бюхъайсса ттул ттатта ивтун ур райзорал хъунаману.Ттатта ясир увну махъ, «троцкистнал арснан», ттул буттан баян бувну бур, учительну зун ихтияр дакъашиву, жагъилтал «баччан» къабаншиврул. Му ппурттуву ттул хъунмур ссу бувну бур. Кулпат бакІ буккан бан, дуланмагъ даншиврул ганангу гъан багъну бур хІалтІилий цал Бакуйн, яла Дянивмур Азиянавун. Зий ивкІун ур ккарччал усттарну, учительну, уссал усттарну, къалайчину ва дяъви байбишин хъхъичІ шавай зана ивкІун ур. Дяъвилийнгу хушрай лавгун ур, амма Владикавказрай эшелонналува уккан увну ур «троцкистнал арс» ва кулак хІисаврай. Микка тІайла увккун ур Владикавказрая Грозныйлин цемент байсса заводрай зун. Га ивтун ур отделениялул командирну. Фронт гъан хъанан бивкІукун, хъуниминнацал къадакълай тІий, Бакуйсса дяъвилул заводрайн гъан увну ур. 1943 шинал ахирданий, фронт западрайнмай хъанан бивкІукун, махъунай шавай тІайла увккун ур, учительтал биял къахъанай буну тІий. Бутта ка уст-

тарсса чув икІайва, аьпа бан цал. Дарсеругу дихълай, га зий икІайва колхозрал давурттай: чарил усттарну, кърнил бригадирну, учетчикну.

Ттул ниттил, ПатІул, арулва оьрчІ хъуни бувссар. Алжаннул хІайван кунма, дакІ хъинсса бикІайва, рухІиран дигъалагру дулун цил. Га бия ка мусилсса дарзи. Ганил буруххайва хъаннил ва арантуннал бартукъру. Мунияту ганичІан нех дирхъуну дикІайва бартукъру бан ччиминнал.

- Вин вилва дуклаки замана дакІний бурич?

- Гъай-гъайкъай, бур. На Ккулув 8 класс къртал бувссия.

Яла Каспийскрайсса ПТУ-равун увхссияв. Микку на 9 класс къртал бувссия, фрезеровщик хъуну, Дагдизелланий зун увхссияв ва II класс вечерний школалий къртал бувссия.

270-350 къруш лякъайссия заводрай зий, низам дуруччин хІарачат бувайссия. На хъинну гъирарай зий ивкІра. Заводрал хъуниминнал, му хІисав хъуну, ттухъ партиялувун ухху куна. На гайннахъ пикри банна куссия. Му ппурттуву шярава буттагу увкІуна. Ганан «коммунист» тІисса махъ къаххирая, цала буттайн «коммунист Цаххай» чайсса бивкІун буну тІий, «троцкист» увну, увгъуну, авкъуну тІий.

Ппу лавгун махъ, буттауссу Мирзал, ттуин цачІанма оьвкуну, партиялувун ухху увкуна. На аьрза буллуссия. Чалкъавхъуну цеховой организациялул партиялул член хъунав. Партийный комиссиялул заводрал комитетрал хІукму цІакъ байний, хІазсса иш хъуна. Шагърулул парткомиссиялий ххал-бигъайни, нагу, на дуклай ивкІсса вечерний школалул директоргу ца къини бувкІун бияв. Рабочийнал партия интеллегенциялулмунин кІура даллай дур куссар тІий КПСС-рал Съездрай, га къамул къаувна. Ттухлу тІурча цинявннал лахъну кару гъаз дурна.

Школа бувккун махъ, Вузравун къамул байва, саняткартурал курсу бикІайва. ХІукуматран дурккусса, кІулши дусса халкъ аьркинну бия.

Дурккун махъ, хІукуматрал даврийн тІайла буккайва, даврих шавкъ дутансса шартІру дикІайва, зузалт аттестовать байва. СССР-данийсса кІулши ласаврил ва здравоохранениялул система шалла дуняллий машгъурну дия. Утти тІурча шагърулуву дур учинсса зданиярттаву коммерческий учебный заведенияртту тІивтІуну бур. Мий цивппагу цябала бур. Ца Дарбантлив бур личІи-личІисса Вузирдал 33 филиал.

КІулши ласаву утти коммерциялийн кІура дарну дур. Циняв Вузирдаву тІивтІуну бур социальный факультетру. Шчин кІулссар микку ца хІадур байссаврив? Миннал дипломирттай чивчуну бур –«социальный работник» тІий. Миннаща чувчІав даврийн буххангу къашай.

Вузирдаву ва дянивмий даражалул учебный заведениярттаву аьркин дакъасса дарсеру дихълан бикІай. Гай дарсирдах арцу ласлай буну тІий студенттурая, программалувун дирчуну дур цирдагу.

- Ина армия лавхъсарив? Ци чара аьралуннаву къуллугъ баврийн?

1974 шинал на аьрза буллуссия военкоматраин, къуллугъ буван ччай ура тІий, бронь дулара тІий. Цанчирча, на зий ивкІра дяъвилул продукция дувайсса цехраву. Цал къаувцунав. КІилчин аьрза буллукун, увцунав. На къуллугъ булла ивкІра Тульский десантно-парашютный полкраву. Ттун 20 шин дия. На ивтунав батальонналул комсомол организациялул секретарьну, шинавату военный училищелул хІаписар хъуншиврул. Яла ттул аьралий дус авчуна, гъира бизан булла, Оренбурграл ларайсса кІулши ласайсса зенит-

но-ракетный командный училищелувун буххан. Га цувагу Оренбурграйтусса ия. Амма ттун Оренбурграл высшее летнее училищелувун уххан ччай бия. Му училище ттул ссурахъил къуртал бувну, Калининградрай зий ия. Дарсру дайдирахъукун, бувчІуна, оьрчІний щаву дирну, ттул май зий бакъашиву ва ттун кислородный маскалуву лахъсса кІанай ссихІ биял къахъанай бушиву. Мунияту училищелул начальникнал ттухъ зенитно-ракетное училищелувун ухху увкуна. На рязий хъукун, ганал зенитно-ракетный училищелул хъунаманайн оьвкунна: «ТтучІа ур десантник, ххуйсса спортсмен, коммунист, ххуйну экзаменну дуллусса. Амма ванан летчик хъун нясивну бивкІун бакъар. ВичІана къауциннав?»

Цаппара хІаллава на цІусса училищелуву хъунав. Му иш хъуна І4 октябръданий. На най уна ивтунав замкомвзводану, увчІунав партийный организациялул секретарьну. І-мур курсрай ккалай бия курсантътал –школьниктал ва цаппара, на кунма, абралуннавасса.

На ххуйну ккалай ивкІра, мунияту увчІунав Оренбурграл Обком комсомолланул бюрорал членну. Командир хъун ччай унугу, ттун политработник хъун багъуна. Яла ГСВБ-лий Германиянаву къуллугъ буллау уссияв. На ивкІра инженерну радиоэлектронный системарду ишла даврил. Германиянаву на комитет комсомолланул секретарьну итан ччай бия. На рязий къахъанай ивкІра. Ина багъайсса куццуйсса даву ккаккан дарча, шинава лавай лахъан анну, куна. Мукун на Лейпциграйн агъунав.

Гай ттул оьрмулул яла ххуймий шину дия. Лейпциграйн на хъуна акъайссияв тамансса военачальниктуращал, партийный ва советский зузалтращал, машгъурсса инсантуращал. Лейпциграйн дунияллул ярмарка-выставкарду шайва, хъуниминнал амрулийн бувну, на хъамал хъуна бакъайссия, гай воинский частьращал ва шагърулушал кІул байссия. 1984 шинал на махъунай Союзрайн зана хъуссия ва Краснодарский крайрал Ейск тІисса шагърулий къуллугъ буллан ивкІра партработникну. Ттун квартира буллуна, оьрчІру дуклан бувххуна, щарсса физиотерапевтну зун диркІуна.

1989 шинал, майор хъусса на, зенитно-артиллерийский профилланул Учебный центрданий политотделланул хъунаманану ивтунав. Мура шинал на увхссияв Ростоврайсса высший партийный школалийн.

Тикку ректорну зий икІайва ттушчал къуллугъ буллау ивкІсса абскарнал ппу. 1990 шинал Лениннул цІанийсса академиялувун увхссияв,amma махъва-махъсса курсирай къабивтссия, политорганну букъан бувну тІий. Ростовский высший партшколалийн тІурча Социально-политический институт тІуну бивкІуна. Ттул дипломрай чивчунна: «Политолог. Жматийсса дарсирдал учитель.» 2 шинау Ейский летный училищелул учительну зий ивкІра. 1993 шинал Учебный центр реорганизовать бувна, ттухъгу зун ачу увкуна замком корпуса РВСН-лий Нижняя Тура тІисса шагърулий. На рязий къавхъуссияв, РД-лул военный комиссариатравун утира куссия. 1998 шинал на гикку подполковникнал чин ларсъссия, амма яла га кІану къабивтссия.

Армиялул ттун лахъхъин бувна гъарзат низамрайн дудин ва чІумуй дуллан, мукунма спортрах хъуннасса къулагъас дуллан.

- Буси вилва кулпатрая.

Ттул шама арс уссар ва тамансса уссур-ссуннал оьрчІру-душру буссар. На гай личІи кьабара.

(На чІаванийва уссица ва ссица хьуссара.) Гайннал цинявннал цалва-цалва кулпатру хьуну бур, оьрчІру хьуну бур.

1998 шинал (ттун 43 шин дия), запасрайн увккукун, на бувссия жагьилтуран военно-патриотический тарбия дулаврол ва аьскартуруан социальный защита дулаврол фонд. Жу тамансса дяввикартуран кумаг бувссар. Цивппа хІаписартуран ва саллатьтуруан бакьасса, гайннал нитти-буттангу кумаг бувайссия бювхьуссаксса. 2002 шинал Фонд лавкьуна, аьркиншиву дакьар тІий.

- Буси вилла даврия...

2001 шинал ттуйн оьвкуну Цуссалакрал район дизан даврилсса буллалисса вице-премьер Правительства РД-лул, Аьрасатнал пенсионный фондрал РД-лийсса отделениялул хьунама Амуттинов Амучи Михайловичлул. Ганал ттухь ачу ахІал зун увкуну. На рязи хьуссияв. Ца-кІира шинава жу дурссия Объединенный профсоюзный организация. Мунил каялувшивугу дуллан ттун багьуна. Профсоюзрал даву совет заманнай партийныйлушал ахІал най дикІайва, мунияту ттун му давуку Іулссия.

Ттуйнна вихшала дурмий на тачІав махьунмай хьун кьабивтссар, дакІ дякьин кьабивтссар. Чув зий ивкІунугу, ттун дуккайва медаллу, грамотартту, почетный знакру так Министерство Обороньлуя дакьасса, Правления ПФР-дания дакьасса, Аьрасатнал Президентаягу.

Мува чІумал на хьанахьиссара І4 шинал мутталий І-ма заместитель Председателнал Президиум Правления Общероссийской общественной организации «Союз пенсионеров России» -лул, «Союз пенсионеров РД»-лул. 2013 шинава шинай Президентнал координационный совет по делам ветерановлул членна, Ухсавнил Кавказнал чулухасса вакилла.

Госдумалул пресс-службалул на увтунна Совет Федерациялул дискуссионный клубавун. На щиривкІуну зий ура хьунив хьусса агьулланул пенсионный ва социальный ихтиярду дуруччавриха.

2008 шинал жу гьаз бувссия жулва зузалт госслужащий бушиврийн ккалли баврил масала, амма му ттигу щаллу кьавхьунни. Пенсионный фондрай хьунмурчІин бугьарасса халкь зий бивкІун бур... Жагьилтал тІурча, зун лахьхьайхту, негосударственный Пенсионный фондрайн лихьай. Тикку харжру лахьсса бур. Ттигьанну хІасул хьусса МФЦ-лийгума харж 20-23 % лахьсса бур жулнияр. 2003 шинал Профсоюзрал хьунама хьукун, на бюджетниктуруан харж лахь баврил хьирив авцІра. 26 процентрал гьаз бунни гайннан, жун тІурча - І4. ПФР – внебюджетный идарари, тІар жухь.

Ттухь чІявуну тІун бикІай, гьай, циири шайсса профсоюзраца бан? Агана хьунама зузисса ухьурча, цІакьсса коллектив бухьурча, тамансса давуртту дан шайссар. РФ-лул Трудовой кодекс даххана хьунни, жулмур ишгу, чансса бухьурчагу, ххуй хьунни.

Цал-цал бикІай Пенсионный фондрай тамбалтал ва бюрократьтал буссар, тІий. Хьунмасса коллективраву бухьунссар мукунмийгу. Амма чІявумий тІайлану зузиссар. Агана лулттурасри ласайшиврин щак бухьурча, ягу документру лахьи лаган буллау ухьурча, мукунсса инсаннахлу жу, профсоюз,

къабуккару. Жу коррупционертал дащуй бишару. Республикалий нанисса коррупциялушалсса талатавугу тІайлассар тІий буру. Агана жулва оърчІру цалва захІматрай ялапар хъанан ччарча, му талатавривух жувагу гуртту хъун аьркинссару.

- Вил игъалагансса чІунгу шайрив?

- 45 шинни ттул Азов ва Каспи хъхьирирдал зуманийх лечлай, оьннасса чІун дириярча. Лицензиягу ларсун, ярагъгу бувгъуну, дустурашал, ав бан, арх зунттайн лагара дучрай...

- Вил пикрилий ци зун аьркинни ниттил маз ябаншиврул?

- На ттулва оърчІру Германиянава ва Краснодардал краяра шяравун тІайла буккайссияв. Ттун ккавказсар Кавказнавасса ва Дянивмур Азиянавасса халкъ цалва мазрай гъалгъа тІун къаччисса. Ттун мукунминнай язухъ хъанан бикІайва. Шикку гай чил халкъ бия, шаппа тІурча щинчІав къакІула. Ттун ттулва оърчІру хІакъсса лакну ччива. Гайннан марцІну лакку маз кІулссар. Школа къуртал бувну махъ, гъарма цалва иширттаха зун ивкІунни. ЧІавама арс, ДГУ къуртал бувну махъ, МГИМО-равун увххунни. Ганан ингилис мазгу кІулли.

ЧІявучин ххирар Лакку мазрал Форумирттай цанма маз ххирашиврия буслан, га бакъа хъанай бушиврия буслан. Амма шаппа гайннал оърчІру буссар оьрус мазрай гъалгъа тІий. Телевидениялий ва радиолий лакрал передачартту гъарза дан аьркинни. Щархъавусса клубру зузи бан аьркинни, гъунар бусса аьртІистурах, балайчитурах бургаву дикІан аьркинни. Ялун нанисса ник дур оьрусрай гъалгъа тІий. Миллатирттал дянивсса кулпатру чІяву хъанай бур.

Телевидение, интернет, электронный луттирду, социальные сети – мий гъарзат тІалавну дур. Щархъаву оърчІрува бур иштахІну оьрус мазрай гъалгъа тІий.

Агана нину-ппу ялув бацІарча, чув ялапар хъанай унугу, ниттил маз лахъхьин бан шайссар оърчІан...

-Барчаллагъ хъунмасса, ина дуллалимуницІун ка бакъиннав, вил мурадру барт лаганнав...



**ДЮХЪЛИЯССА ИШБАЖАРАНЧИ
ХІАСАНОВ МАВЛУД БИЛАЛОВИЧЛУЩАЛССА ИХТИЛАТ**



- Мавлид Билалович, ца хъис виятува бусарча ччива.
- На увну ура 26 апрелланий 1971 шинал Рутуллал районналийсса Дюкъллал шяраву. Буттал шяраву 1988 шинал къртал бав Дянивмур даражалул школа. Навагу хъинну гъирарай дуклан иклайссияв. Учительгалгу гъира бизанну дарс дишайсса биклайва.
- 1989-91 шиннардий Совет Аьралуннаву кьуллугъ булла ивкссара. На увтунав Прибалтикалийн, Латвиянавусса Лиепая тисса шагърулийн зенитно-ракетный войскалун.
- Армиялул чув-адамина хъиннува кьянкья-кърчИи увайсса ивкун ия. Ща-лагу Округрай армрейстлинграл спортраву на килчинмур кану бувгуссия.
- Армия лавхъун махъ, ци зун ивкссияв?
- Совет хукумат лирну нанисса, жапасса чун дия. На увхссияв 9 зуруйсса учебкалийн Ленинкентуллал милицанал школалийн. Му школа къртал бувну махъ, 1992-1996 шиннардий зун ивкIра нигъачIаврилсса байсса даврий: цал Кавказнал Биржевой банкрай, яла Тепко-банкрай. 1996 шинал тIурча ишбажаранчишиврухун агъра. Чара бакъашиврул му пишалухун агъра: личИи-личИисса кьай-кьуй, хъус-хъиншиву дахлай ивкIра. Ахирданийгу, кафель бахлан ивра. Яла нава заллусса фирма тIитIав. Му фирмалийн «Абсолют-керамик» чайсар. Жуца кафель машан ласай хукуматрал строительный объектру баншиврул, частный секторданулгу тамансса ласай.
- Ттун бавсар вил фирма хъхъичIунминнувух ккалли дайссар тIий.
- Дагъусттанналмий ХIурматрал грамотартту дакъасса, ттун грамотартту ва бахшишру дуллунни Испаниянал «Керлаф» тIисса кафель бувайсса фирмалулгу. Испан ва Аьрасат гурттусса (СП) идаралул вакилгу на ура.
- Ци дур вил пишалул ляличИшиву?
- Багъавайсса куцуйсса реклама аьркинни, кафель баххайсса ттучанну, мивусса зузалт ва кушу лавайсса даражалий бикIан аьркинни. Ялув бацIан аьркинни кафеллалун обьки-ххуйшиврулгу. ХIасибул-калам. Зузинан даву чан дакъар.
- Мавлид Билалович, ца хъис вилва кулпатраюгу бусарча ччива. Ина цукунсса кулпатраву тарбия хъуссара?
- Ттул ппу Билал колхозрал ризкьилучIа хIухчуну уссия. Жяматраву ганал хIурмат лавайсса биклайва, аьпа бан цал. Коммунист заманнайгу, га цакъсса иман дусса чув иклайва. Цувагу шарнил мизитрал имамну уссия. Ца хъисрагу ганал духIин ттувура духъурча, оьрму нахIакъ къабутлатиссара тIиссара на.Га

щинчIав зарал байсса инсан акъая, ччувччуну най икIайва цинявннан хайр бан, хьинбала бан. Нину Рабиятгу, аьпа бан цил, колхозраву зий бикIайва: къурнил давурттай, доярккашиву дуллай. Га хъхьичIунсса зузалан ккалли байва. ИчIаллилсса бангу туну ганин багъайва. Бутта ризкъи-къинилуцIух ухъукун, кулпатралсса баврил хъунмур хъар ганин дагъайва, алжаннул ххари дан цув. Кулпатраву арулва оьрчI бия: Насхалун, Рамазан, Гюлахалун, Муси, Айюб, Назани ва на. Циняв уссур-ссу цIуллуну-сагъну бур, гьарма цалла даврихун машхул хъуну бур.



- Вилвамур кулпатраягу хавар ласи...

- На бувцуссия жулла шяравасса Аьбдуллагълул душ Сиянат. Га цувпагу ттул кумагчину зий буссар. Арснан Сурхайн къуния шанна шинни.

МахIачкъалалив ЗI школагу къуртал бувну, ганал «Нефтегазовое дело» (навт буккул даву) тIисса санят ласайсса Технический Университет къуртал бунни. Аьрасатнаву хъусса оьрчIал дянивсса бяст-ччалливу (детско-юношеские соревнования) тайский боксрай увккун, ганал цалчинмур кIану бувгъунни.

Душнил Саидал хъхьичIунну къуртал буллай бур Башларовлул цIанийсса Медицинский колледж. ЧIавама МахIаммад ЗI школалул 8 класс марцIсса ххювардай къуртал буллай ур. Ганал хиял бур ДГУ-рал юридический факультетравун уххансса.

- Машаллагъ, барт лаганнав ганал хиял... Ина даврия лирчIсса чIун цукун харж дара?

- Ттун ххирар буттал шяравун гъаван, хаснува гъинттул чIумал. Гикку кунна, дакI чувчIав дигъа къалагай. Ххирар ккалан луттирду. Ттун хьинну ххуй бивзунни Мариям Ибрагъимовал «Имам Шамиль» тIисса роман ва Мазяйхъал Казбеклул «Хъун-неххал ххурхху» тIисса повесть.

- Ци зун аьркинссар халкъ зунттавунмай зана бикIан бан, аьдатру ва маз буруччин?

- Цалчин, дикIан аьркинссар хъуннасса буттал кIанттухсса ччаву. Му дакъахурча, шар мусил хъунугу, цучIав зана къахъунтIиссар. КIилчин, тIурча, инсантурал багъу-бизу бигъа бан аьркинссар: ххуллурду бан, газ буцин, инфраструктура дан.



- Вил пикрилий, лакку мазрайсса газет-журналлал подписка гъаз даншиврул, ци бан аьркинссар?

- Ци бави, лакрал шаннагу районналул хъуниминнал му масалалуха бакI цIуцIаву дан аьркинссар; яла, ОНО-рдал ва школардал директортурал. Му-кунма хъунмасса кабакъаву дуссар меценатшиврул, спонсоршиврулгу. Каши дусса халкъ тIурча жулва чансса бакъар...

- Барчаллагъ, Мавлуд Билалович, ина тIимур ччясса мутталий барт лаганнав...



**РД-ЛУЛ ЛАЙКЪ ХЪУССА ЭНЕРГЕТИК
АБДУЛХАЛИКИ АБЛИЕВИЧ ХАЛИКОВЛУЩАЛССА ИХТИЛАТ**



- Абдулхалик Абдиевич, ина та, чув увссара? Буси вилва оърмулия...

- На увссара 1953 шинал, февраль зуруй Хасаврай. Му шинал ттул нину-ппу, ссурвалгу бувцуну, Новороссийскалия Дагъусттаннайн бивзун бия. Аьпа бан цил, ттул нину, хьинну иман цакъсса хьамитайпа биклайва. Ганил ният дурну диркун дия, лая-къатлуву оърчI къабан. Муниату, цуксса оърчIах хьуну бунагу, шагьру кIучIу буллай, къатри ххал дуллай занай бивкIун бия. Ахиргу, царай ххира бакъасса пукьри лявкъун, гай машин лавсун бивкIун бия. Нагу, туну, гиву увну ияв.

На увссара Хъунмасса Буттал кIанттул цIанийсса дяъвилуву гьуртту хъусса ветераннал, 1915 шинал увсса Халиков Аьли Абдулхаликовичлул кулпатраву, цув алжаннул ххари аннавча. Нину Халикова Аьйшабала Исаевна, 1923 бувсса ЗахIматрал Фронтрал ветеран биклайва. Ганил хIукуматрал чулухасса бахшишру, барчаллагьрал чагьарду ттигу-шилагу яхьуну бур. ЧIявусса цаймигу Хасаврай ялапар хъанахьисса лак кунма, ттул бутта къалайчишиву дуллай, кулпат бакI буккан буллай иклайва.

Нитти-буттал кулпатраву жу бияв мукья: кIива ссу, на ва уссу. Жу давлатлувтал бакъаяв, хаснува бутта хIалтIилухун-за лавгний, къянатшиву диклайва. Амма къатлуву тирхханну диклайва. Жу думуний гьашиву дуллан биклайсси-



яв. Ниттил жухъ тяхъасса хаварду, магъри, ссигъри бусайва. Мукунма ганил бусайва хъунтаттая. Га ка машхулсса дувсилул усттар ивкун ия. Хакъинусса кьинигу кулпатравугу, гъан-маччаминначлагу, щарнил агъулланучлагу ишлану дур мунал дурсса манкъулат, тлахъини-кичиу. Хасибул-калам, бизар хъунсса чун жул дакъая.

- Ина школа чув къуртал бувссар? Тай шиннардия ци дакний ливчри?

- Школагу Хасаврай бувккуссар. Дуклангу хларачат байссия, отличник акъанугу. Марцину ххювардай ккалай бия ттул хъунимий ссурвал, мукунма гай акробатикагу дуллан лахълай бия. Бутта му иширая лап рязий акъа, гъургъу тун иклайва. Мунияту физкультуралул учительнан Макъсуд Тажибовичлун ганахъ маз-къаз бихълан багъайва, школалул хъхъичлунсса клану бугъаншиврул соревнованиерттай чара бакъа акробатгал аьркиншиву бувчин буллан багъайва. Ссурвалваврал цалчинмий клантурду бугъавриву ганал хъунмасса бияла бия. Тун яла ххирабий дарсру дия геометрия, физика, литература ва дянивмур аьсрулул тарих. Тухъ цуххавай Совет хукуматрай ххуйсса килши дулайва оьрчан. Улу, няравун дутлайвача! Тун циняв учительталгу дакний бур; цалчинманая махъва-махънайн бияннийн.

Цанасса Аьрасатналмур килши дулаврия ттуща цичлав ххуйсса чин къабюхъанссар. Совет хукуматрай, дурккуну махъ, даврийн тлайла буккайва. Хларачат буманал, микку цува цу уссарив ккаккан байва. Га системалий уссал усттар усру дувайсса фабрикалийн тлайла уккайва, ччатI шахъу турча – пекарнялийн ягу хлебозаводрайн. Ва цанасса системалий турча хъунимийну бур ссалчлав бакъасса къавдахул, саняткартал, пишакартал турча, ци зунссарив къаклулну ливчун бур.

- Вил ларайсса килши дуссарив?

- 1970 шинал на увхссара дуклан Ленинградулал кораблестроительный



институтрал Дагъусттаннайсса филиалланувун, 1975 шинал тГурча къртал бувссар 1972 шинал сакин бувсса Политехнический институтрал механический факультет, инженер-механикнал санят ларьссар. Цинявпа преподавательталгу дакИний бур. На гайннан оьрмул оьрмулхун буржлувссара, тгунма за лахъхьин бувну тИий. Му буржгу тачIав лахъан хъуншиву къакулли. Хаснува дакИний ливчIунни «Детали машин» тИсса кафедралул хъунама Темирханов Б.И. Ганан ххирая ттушчал бястру буллан сборочный чертежирттал хIакъираву, тгун прокурор тИсса чули ца дирзуна. Та чIумалсса преподавательтал ххирахъун бучIири так ца лулттурасри къаласлай бивкIшиврухлу. Агъ, вил къаттай, хIатти ция арцух зачет ягу экзамен машин ласун.

- Ина Армия лавхъсарив?

- Институт къртал бувну махъ, на увцунав Совет аьралуннаву къуллугъ буллан Черноморский флотрайн. «Грозный» тИсса ракетный крейсераданий къуллугъ буллай ивкIра. Гьарца бурхъничув гъан аьркинссар армиялийн, амма Ватанналулгу ганах аякъа дикIан аьркинссар. Акъахурча, щихлури в къакулли талан жагьилтал тIайла буклакаву – къачагъшивури.

- Буси вилва захIматрал ххуллуя.

- Зий айхъуссара электро-слесарну, Дагъусттаннал сетевой системардал компаниялул хъунама хъуннийн. Даврийн уххан оьрмулуву цалли аьрза чивчусса, яла гиккава гиккун тIайла уккайвав. Дагъусттан Республикалул Госсоветрал ХIурматрал Грамота дуссар, Дагъусттаннал лайкъ хъусса энергетикра ва Аьрасатнал ХIурмат бусса энергетикра.

Махъсса ппурттуву на тIайла увккунав Ухсавнил Кавказнал МРЕК-рал хъунаманал кумагчину. 2018 шинал авгъустрайн иянийн, на микку зий ивкIра.

Дагъусттаннай хъунимий баххана хъукун, тгун умуд буссия гайннан энергетикалуву цукун, ци зун аьркинссарив бувчIин бансса. Амма на гайнначIан



итакъаавкъунав, ттул умудгу гайннал ча, цукун ласунссия? Ччимур даву дан шайссар, так чансса духИ-дуцингу дикІан аьркинссар.

Энергетикалул иш ххуйну бакъар. Амма 2-3 шинал мутталий гьарзат дузал бан бюхъантІиссар. Агана цІана кІинттул 70 процент електроенергиялул бакъа хъанай бухъурча, мий хъунтІиссар нормативрайн буцин.

На хІарачат буллай ивкІра бувчІин бан: агана кІану машан лавсун бухъурча, цичІав бан къахъунтІиссар. Му идара тава-тагу лекъантІиссар, пираьннул къала кунма!


Даву дузрайн дуккан дан бюхъантІиссар, агана хъунама даин «кІантгух» дуллусса арцу цукун зана дансарив тІий, буруккинттай акъахъурча.

- Буси вилва кулпатрая.

- Ттул шарсса ХаликІова Тамара Юсуповна ларайсса кІулши ларьсса инженер-механикри. Пенсиялийн букканнин, цилва пишалий зий бивкІунни.

Ганил нину Шахъуватури, бутта Ххутияссари. На ва ттул шарссанил арсеру хъуни барду. Щукру гайвагу льякин хІарачат бусса бушиву, акъа 44 шинай зий-занайгу ивкІун, шярайх уккул пенсия ласайсса на, ци булланссия. Ттул тІурча лахъсса харж буссия, пенсионный фондралгу тамансса дугъайва.

- Ци чара ина коррупциялушалсса талатаврин?
- Му Дагъустаннай мархри итабакъин дурссар шиккумий коррупционер-тал, къачагътал буручлачиминнал, миннал хъуншагърулийсса заллукъруннал!
- Ци чара ина магъирлугъ дуруччаврийн, ниттил маз ябаврийн?
- На магъирлугърал усттар акъара. Ниттил маз тГурча, нину кунна, ххирану бикІан аьркинссар.
- Ина цукун игъалагара?
- Биривсса куццуй. ЛичИи-личИийну. Ттун ххирар ккалан. Жагъилний ккалан икІайссияв Вальтер Скоттлул рыцартурал роману, командировкалий найни, ахІал ласайссия О.Генрил мюрци хаварду. Ххирар ттун Оьмар Хайямлул рубаирду, Серебряный векрал поэзия. Хаснува Мариян Ибрагъимовал луттирдалгу хІайран ара...
- Барчаллагъ хъунмасса, ина жухъ тамансса насихІатру бувсунни...



ЦИНЯВННАЛ ЗУМА-МАЗРАЙССА ШАЭР



Дуклуса шинал Мухуттин Чариновлул 125 шин шаврил юбилейран хас бовсса мажлис МахIачкьалалал ОьрчIансса библиотекалуву

Лакрал ва Дагъусттаннал цIанихсса шаэр, лакрал халкъуннал гимнрал автор Мухуттин Чариновлул 125 шин шаврин хас дурсса батIаву хъуна дукIу Н. Юсуповлул цIанийсса Республикалул оьрчIал библиотекалий. Му сакин дурну дия миллатиртгал литературалул отделланул хъунмур Ххадижат Агъаевал.

БатIаврий гьуртту хъуна Дагъусттаннал халкъуннал чичу, «ЧIавалачин» журналланул хъунама редактор Мирза Давыдов, Дагъусттаннал халкъуннал шаэр Космина Исрапилова, чичу, «ЦIубарз» журналланул хъунама редактор Хизри Илиясов, МахIачкьала шагьрулул школарттай ккалаккисса лакрал оьрчIру ва лакку мазрал учительтал. БувкIун бия шаэрнал гъан-маччамигу: Мухуттин Чариновлул уссил душ Шамсият Чаринова, уссил арснал кулпат Ххадижат Чаринова, уссил арснал арснал арс Шамил Чаринов, уссил арснал арснал душ Ххадижат Чаринова.

Ихтилатру буллалимий лях-карах кIицI лаглай бия шаэрнал, драматургнал оьрмулул ва творчествалул агъаммий датарду ва ишру.

Увну ур Мухуттин 1893 шинал ХъурукIуннал шяраву. Зий ивкIун ур Бакуй учительну. Бакуй кьуртал бувну бур Шяраваллил хозяйствалул институт. Ва хъанай ур дуклаки оьрчIансса лакку мазрайсса цалчинсса луттирдал ва хрестоматияртгал автор. Зувилку шиннардий Мухуттин Чаринов зий ивкIун ур Дагъусттаннал тарихрал, мазрал ва литературалул элмурдал институтраву. 1934 шинал къамул увну ур Чичултрал союзравун. Шаэр аьпалул хъуну ур 1936 шинал. Цалва лахъи бакъасса оьрмулий чивчуну бур лакрал культура-

лул ца ххаллилсса бутІану хъанахъисса пьесарду: «ХІабибат ва ХІажияв», «Шагъалай», «Шумайсат».

Ванал поэзия хъанай бур лакрал литературалул ттиркьюкьки. МухІуттин Чариновлул творчествалулу кьачІивисса кІану бугълай бур таржумарттал, оьруснал ва дагъусттаннал язисса шаэртурал чивчумур пасихІну, хъинну усттарну лаккунайн бувцуну бур ванал. Вай ва шаэрнал оьрмулул ва творчествалул биографиялул агъамсса цаймигу кІанттурдай бацІаву дуллай бия ва кьини махъру лахълахъимий. Хъамаллурал, шагърулул школарттал дуклаки оьрчІал хъхъичІ ихтилат буллай, Мирза Давыдовлул увкунни:

- Аьрасатнал литературалулу агъамсса кІану бугълагъиссар дагъусттаннал литературалул, дагъусттанналмур литературалулу тІурчан, хъхъичІунну дуссар лакрал литература. Мунил гъанурду бивзминнавух уссар, Гъарун Саэдов хъхъичІну, МухІуттин Чариновгу. ХІисав дуvara, та чІумала, ванияр 100 шинал хъхъичІва, цуксса куртІну, аьшуйн шунну, цимирагу ттуршра шинай инсантурал дакІурдивату кьабукканну чивчуну бурив «ХІабибат ва ХІажияв» тІисса пьеса. Эшкьки-ччаврил балайрдал, лакку лирикалул гъану бивзмагур МухІуттин Чаринов. Бургияра, оьрчІрув, буттал кІантгхсса цуксса гужсса ччавришал чирчуну дур ванал лакку билятрахасса назму. Та чІумал лакку кІану хъиннува кьянатну бивкІссар, чагуртшиву дуллай занай бивкІссар лакрал чиваркІ. Уттирив Лаккуйсса зунттурду бачІва хъуну бур, миннуй канансса ятгу-гъаттара бакъар. Зуйтур, ххирасса оьрчІрув, хъар хъанахъисса лакку кІантул, лакрал миллатрал бучІантІимур, - увкунни ванал.

Шаэрнал оьрмулиясса ва творчествалиясса гъарза-гъартасса ихтилатру мукунма бувна Космина Исапиловал, Хизри Илиясовлул, Ххадиджат Агъевал, Шамай Чариновал ва м.ц.

Дуклаки оьрчІал бувсуна шаэрнал биография, дурккуна мунал назмурду, ккаккан бувна мунал чивчусса «ХІабибат ва ХІажияв» пьесалувацца бутІа.

Шаэрнал мукъурттийсса балайрдайну мажлис чІюлу бувна ДР-лул искусствалул лайкь хъусса ишккакку Жанна Кьурбановал.

БатІавривух гъуртту хъусса гъарцагу школа лайкь хъунни цІуну итабавкъусса МухІуттин Чариновлул луттирдан.



Мариян Илисова дакИнийн бутлай

ПатГимат РАМАЗАНОВА

МИЛЛАТРАЛ ВИЛАХХАВ ЦІУ ЛЕЩАН КЪАРИТАНССА ХХУЛЛИЙХ ЛАВГССА

Жул цинявннал дакІурдиву ливчІсса Мариян...

Даки хьолчай учин дуллалисса сурат: Марияннул ласнал ссу ванил гьаттай. Ва суратрайн я щайхтува, бувчІлай бур Мариян ласнал ляхьинналун цуксса ххирану буссарив. КъакІулли нава ва лахІза суратрай загьир баву тІайлассарив, къатІайлассарив, амма къювулияр ччаву ялтту дуклакисса лахІза ккаккан бувансса мурад бухьукун, тІайлану бувчІинссар, ялтту бучІанссар тІий бура.

Вана Мариян Илисова дуняллия лавгунгу гьунттий-сара шин хъанай. Ванил гьаттай гьайкал тІитІлатІисса къини, тІутІавун дахьларгсса гьаттахгу буруглай, укунсса иширал ялугу пикри буллаи бивкІра: Мариян бувччунни Читтурав. Ттун къакІулли ва ванил ласнал, арсураврал, душнил мурад бивкІссарив, ягу Марияннун цинма укун ччиссия куну дурсса даурив. Гьамин, Читтурав гьав нясив шавривугу дур куртІсса мяънагу, хІисавгу. Дазу дакъа буттал шяравалу ГьунчІукъатІи ва шяраваллил агьлу ххирасса Мариян, аслийсса зунттал аристократка кунма, ласнал ляхьинналул ва шяраваллил жяматрал дянив хІурмат лахьсса инсан бия. Абадул ахиратравусса ванил аьрххи-гу багьунни ласнал шяравун, вагу Марияннул махъра-махъмур уздансса тІулли. Ванил бувтсса оьрмулуцІунгу, багьу-бизулуцІунгу даркъусса тІулли. Сиражуттин Илисовлул ляхьинналул Марияннухсса ччаву чІалай, кІайннал къюву асаргу хъанай, кІиккува гьанай бия бакІраву, цукун бьохттулсса дакІнил ва багьу-бизулул инсан бикІан аьркинни, вакссава ласнал ляхьинналул хІурмат банну къуццу тІий бивкІсса, ласнахьал тухумрал дакІурдиву ливчІсса, тІий. Мариян цинявннала, цуппа кІулну бивкІцириннал дакІурдиву ливчІунни. КуртІну ва цІакьну. Чария жухва бакІра-бакІрах, гьарцаннал цІитІ бивкІсса Марияннул ярунниву ласнахьал хІурмат буну, чиваркІуннал къимат буну яхъанахьияра тІисса аманат бувсса хханссия. Рязий хьияра: жулва ниттил ниттихьалва мяърипатрал гьанулул ттарцІну диркІссар чиваркІуннал культ душиву. Мяърипат гьануну ларсун, чув адаминал хІурмат лахьну бусса кулпатравугу, миллатравугу, билаятрайгу адавгу личІиссар. Яла хьунмур дуаьгу, зукьлугу Марияннул бия, ляхьу дуняллий лак лакну личІаннав тІисса. Дуллалицири давурттивгу му ххуттайсса дия, ххуллугу миллатрал вилаххавнсса бия. Миллатрал вилаххав цІу лещан къаритансса ххуллийх найгу бия, яхІлий ва шавкъирай му ххуллугу бивтуна. ЦІуницІа ванил гьав Читтурав нясив шаврийн занабикІлай, ва цири Марияннул жува нех дирхьуну Лаккуйн бурган байсса тІий бивкІра. Ванил цилва биялаллий къавхьусса иш бухьурчагума, къабюхьайссия ва иш укун тІайлабацІан Мариян къирият дусса, лакку аьрщарах эшкъи хьусса къабивкІссания! Тарихравун Марияннул цІа дагьантІи-



шиву ва дагънура душиву танил дуллай байбивхъусса цалчинсса давуртгаватура чӀалай дия, личӀину куртӀ къахъанай ялттува ябитарчагу. Цилла чӀумал, миллатран гъарцагу чулуха къабигъасса ппурттуву, ина вай давурттив дуллан аьркинссара куну, «Дараччи» клубгу хӀасул бунан буну, уздансса душругу лагма лаган буну, Заннал ка дургъуну, тай давурттаха зузи бувхъунссия. Мариян Илиясова, миллат чантӀ учин буллай, бусрав-барчаллагърахгу къаялугълай хъунмасса захӀмат бихълай бия. Дуллалимунил мурад миллатрал цӀа-къини дюхъаннав тӀисса бия. Бия Мариянгу, мунил тарап дургъумийгу бюхъулий жулва дакӀурдивун къутӀа тӀий, жува чантӀ учин бан-мур булларчагу, дуллалисса даврил къимат къакӀулссагу, хӀатта дуллалимур дашуй дихълахъисса «виртталгу.» Цавай аьвамну цӀаннайва ливчӀисса, цавайрив – чаннал тӀиму ххал къахъун мурчӀи исултрал дуллалисса, цавай тӀурча дакӀру хъуншиврул цӀа дувансса чувшиву цаву дакъасса. Мариянмур миллатран хъинбаларду буллан чялишсса цӀарал ччувччуну лавгунни. Дурмунил къиматмур тарихрал аьдлулий бищай, шинну ларгукун. ДақӀ дарцуну бивкӀра танийва, уттигу ялу-ялун цӀакъ хъанай бур вава пикри: чӀярусса ххуй-ххуйсса давурттив дуллан, ххуйсса кулпат, нину хъун дуняллий ляхъусса Марияннул яла хъунмур буржгу, бигаргу бухъунссия хъуни-хъунисса хъинбаларду миллатран буллансса, цуппагу, цанмагу чӀалачӀин дакъа ххирасса миллат дуняллул гъунттуй ябуван цищава шаймур бувансса. Ва давриву Марияннул бивхъусса захӀматран багъа бакъассар. Аьлтта чӀалай бурхха жунма цинявнан мазурдил хъхъириву, глобализациялул дазу-зума дакъасса авлахърай ва багъана, та савав хъанай, ццах бутанну къия хъанай душиву ниттил мазрай. Шикку дақӀнийн багъунни журналист, публицист Ислам Узаловлул аьлимчу Ися Аьбдуллаевлуинсса аьчухсса чагъарданий увкумур: «ХӀазран бакъахъунссар жува лакку мазрайн ниттил маз учайсса». Мариянгу ливчӀунни дуняллий ниттил маз ххассал буван ка дуллаинува!

**ГъунчӀукъатӀрал школалучӀисса
«Дараччи» клубрал коллектив**

МАРИЯН ИЛИЯСОВАЛ АЬПАЛУН

*КӀушиву вай мукъурттил
Угълицал личлачисса,
Вих хъанай бакъанугу,
Ина бакъассар тӀисса.*

*Интнил къанкъ рищуну махъ
Дукканххива дараччи,
Интегу чӀарах дурккунни
Яру, дақӀ луглай дуна.*

*Мариян тӀи дараччи
Дақъар ххяхлай лухччиний,*

*Гъану цӀакъну бивз клуб,
Буссар вил цӀа ларсун най.*

*Щарний цӀу-цӀантӀир байва,
Аьркиннан кумаг байва,
Вил чулуха бивт бургъил
Жул дакӀру гъили дайва.*

*Алжаннул ххари баннав,
Гъав нурданул дуцӀиннав,
Жул дакӀурдиву мудан
Буссара ина сагъну.*

Гулизар СУЛТАНОВА

МАРИЯН

*ЦӀан ттуруллал бувгъусса,
Заваллайсса баргъ кунма,
Бахълавгуннахха ина
Бюхттул зунттал кувсавун.*

*Ттурулливгу ппив дурну,
Баргъ буккайхха някӀ ссавнийн,
Вил бургъил пишилл симан
Абадлий дахъларгссарив?*

*Гьарздраву бавкъусса,
Бусайсса махъ бювхъусса,
Дайсса даву уздансса,
ДаКI чумартсса Мариян.*

*Чурххаяр ххисса бивну,
Гуж къалаллан бивкIукун,
Леххаву цан къаучав
Вилва ПартIу ПатIимайн.*

*ЦуцIаврил заэв бивну,
Бизан къабюхълахъийни,*

*Овькуния кумаг бан
«Дараччилул» душварайн.*

*Амма щичар бювхъусса,
Цавагу гъантта ххи бан,
Бувкку гъантри бухлавгун,
Заннал ажал бивукун.*

*Аьрщарая лавгунугу,
Ина ахиратравун,
Вил цIа уттара дурссар
Инара дур давурттал.*

Светлана ЮСУПОВА

«КЪУМАШИВУ БУСАНССА МАХЪРУВАГУ ЛЯХЪЛАЙ БАКЪАР»

На кIул хъуссара Марияннушал 2000-ку шинал Дагъусттаннал цIанихсса хIакин Хайруттин ХIажиевлул юбилейрай. Тания шинмай хIакъинусса къининин «Дараччи» клубравасса ца дараччину нагу хъанай бура.

Мариян бия цIагу, тIуллугу ххуйсса, ляличIисса, щихачIав къалавхъхъусса инсан, бургъия кунна, нур дирзсса хъамитайпа.

ЦIанасса заманнай укунсса инсантал нажагъсса хъунабакъай. Жун цинявннан Мариян бишин-битан кIану бакъа ххирассия.

Ванил гъану бивзсса «Дараччи» клуб хъиншивурттал-хъинбаларттал, чирилул ва цIимилул школану хъунни.

Укунсса даву даКIнил, аькълулул бутIа ххишалану буллусса инсаннаща дакъа дан къашайссар.

Бия караматсса хъамитайпа. КIула лагма лаган бан, цивувасса гъавасгу, гъирагу цайминнавунгу бутан. Ттула даКIнил къумашиву бусансса махърувагу ляхълай бакъар. КутIасса бунугу, яргсса оьрму бувтссар ина, Мариян.

Нава вищал кIулну, хIала-гъурттуну бикIаву Заннал ттунна дурсса бахшишран ккалли дара.

Ина жул даКIурдива тачIав къабуккантIиссара.

Анриана АБДУЛЛАЕВА

МАРИЯННУЛ САХАВАТЛУВССА КА

Ноябрь зурул 23-нний жулва Марияннун 75 шин хъунтIиссия. ХIайп, къаливчIунни, ччяни личIи хъунни Мариян жуятува. ДялирчIунни ванил ххаллилсса сиптардугу, уздансса давурттугу. КIулну биявав, цилла чумартсса даКIнил бутIа гъарнайн биян буллай, ччалиш бувккун бивкIсса.

«Халкъуннал цIаний бувтсса оьрму» тIисса Марияннуясса луттирай Космина Исапилова чичлай бур Марияннул аьпалун цичIара яхъуну душиву ванил бахшиш дурсса авурсса лачак. Акъахъунссар Марияннул лагма-ялтту бивкIминнаву цаягу ваниясса бахшиш къадру-къиматрай якъадуллалисса.

Нагу, Марияннул дуллусса ланжарттувун ххункI буккайтари, ванил рухIиран мюнпат хъуннав куну, дуаь дуvara. Чяй духлагарчагу, уртту-щин дичлай, ядурну дуссар авурсса чяйлул къутигу.

ГьарначІан дияйва сахаватлувсса Марияннул ка. Циксса ххаллилсса да-
вурттив ттигу данссия Марияннул, цикссаннан тІитІинссия кумаграл ка.

Данссия, дитанссия...

ЗахІматну бур вания ларгсса чІумуй гьалгъа тІун, цукунчІав къамул хъанай
бакъар ва бакъассар учин. Цанагу хъхъичІ бавцІунма бур цІу буну лархсса
Мариян, пиш чан къашайсса марцІ-кІяласса симан.

КъабучІантІиссар утти ва, бувцІу-цІувххуну, «Илчилухъ» байранну барча
учин, «Илчилул» къинирду лахъа-хъун дан.

Мариян бия, цаманан зат дуллуну, цуппа рахІат буккайсса журалул инсан.
Гъич, ва кашилул иш бакъар, ва инсаннал дакІнил авадашиврул биялар.

«Дараччи» клуб сакин бувну хъунма хІал къавхъусса чІумал, цилла кку-
ранналушал кІул бан хъамалу оьвкуну Марияннул Тамара ХІажиевайнгу,
ттуйнгу. «Дараччи тІутІи хъя чайсса кунна» тІисса та чІумалсса макъалалий
жу чивчуну бур клубраву ряхцІалунния ливчусса хъами бушиврия. Цанарив
дараччирдал куцІаву 500 дараччи дур.

Вагур Марияннул даву тачІав къадирчІантІишиврул ва ванил аьпа утта-
вашиврул барашинна.

Гульшан ХАСАЕВА

«ОББАЛА КЪАБАНССА КАШИ ГЪАРЦАННАХЪ ДУССАР»

Ина бакъа дуниял дачІра дурксса хханссар. Ци бакъая, цІана, цинявпагу
лагма лавгун, ина бувсса къини кІицІ лаган. Вилла байран цинявннал бай-
ранналийн кІура даен дайссияхха ина. ХІайп, цимилагу хІайп.

ДакІний къурхъ дарцІуну дур, иттав макъ гъурххи ларгун дур, ляхълай
бакъар вил уздансса тІул-тІабиаьтраха лавхъхъусса махъру. ДакІния дуклай
дакъар вил чаннасса симан, тІааьнсса пиш, пасихІсса ихтилат.

БяличІан бунни ина жул оьрмулуну вицІунма бавхІусса яла тІааьнмий
лахІзарду. Ина бияв жул хъунмур ссугу, дакІ тІайласса дусгу.

Вияту гьалгъа тІутІийни, ина дакІнийн бутлатийни, кІицІ дуллансса вил
титуллу чІярур, амма яла хъунмур, къиматраймур вил титул – Инсаншиву
дия. Ина ккаккан бунни Аллагъу тааьланал му бутІа буллусса инсаннаша
І00-хъул цаймий баххана бан шайшиву. Гьарца шаттирахун асар хъанай бур
ина бакъашиву.

Ина учайва: «Инсаннахъ цинявннан хъинбалартту, хъиншивуртту дансса
каши къадикІайссар, амма щинчІав оббала къабансса каши гьарнахъ дуссар»,
– куну.

КутІасса вил оьрму хІайп тІий, дакІнийн багълай бур цаймигу вил махъру:

«Хъунасса Заннал итадаркъусса шиннаяр оьрму лахъи бансса бияла жухъва
бакъар, амма жунма буллусса оьрму лайкъну, узданну бутансса бияла гьарца
инсаннахъ буссар», – учайва ина:

ТачІав хъама къабитанссара ина жун, жул аьзизсса Мариян. Лавгунна ина
вилва миссиягу лайкъну бартбивгуну, жул дакІурдил бутІагу вищала лавсун.
Щукру тІий бикІара нава ва оьрмулуну вищал хъунабавкъусса.

Даниял МАГЪДИЕВ

ЛИЧАНТИССАР

*К*юрххил лирцІу ттурлу ахъая кунна,
Ларгунни ца шингу, ккарксса макІ кунна,
Ссутнил ахирданий зунттавун кунма,
Бивциунни чурххавух дюхлулул марчгу.

*М*ариян бакъасса жущалава цачІу
Тти чІалан бивкІунни гъарца давриву,
Аъркинну диркІишіву Дараччи жунна,
МурчІину ивкІнангу дурчІунни утти.

*М*иллатрал цІания давуртту дайний,
Лакку души жущала буссари тІунну,
Дагъусттан цашиврул байран дувайний,
Марияннул шакил лахъну гъаз данну.

*М*ариян тІутІаву лакрая тІавур,
Буттахъал чувшиврун кымат бищавур,
Мариян гъаз баву миллат хъун бавур,
Зунттал души дакІнихту бюхттул бувавур.

*И*нтнил къни кунна, дакІ чанна лахъай.
Лакку души Мариян дакІнин багътари,
Ссуттил багъ укунна, дакІгу пашман шай,
Мариян бакъасса чІалан бивкІукун.

*М*агъравунма багъсса Гъухъалла къурух,
Буссаксса Гъумукун ххулу бивхъуну,
ЛичІантІиссар, чІумул лиххан къадурну
Лакку душнил цІагу Мариян тІисса.

* * *

Мариян ИЛИЯСОВА

ИНА ТТУЩАЛ ДУРА, ДАДАЙ, МУДАННА

*О*ърмулул цичулийн кІункІу тІурчагу,
Ттул дакІнил мудангу вичІан хъит учай,
Ххуллия баякъуну чунмай нарчагу,
Дадай, вил яруннил «манарда» учай.

*Н*урданул чирахъ-яв цІаннай лахъайсса,
Чаннайгу оъккимур чІалачІи дайсса?
Касмучияв ина, на дуллалимур
КІанийн дуртун дуван кумаг буллайсса?

*Ттул хъхъичІ бацІай, дадай, шяраву оърму,
КІирисса кІарттуву ччатІ бишлашисса,
Ттунна цІа ририуну, дириусса гурга,
Шахъаннин къис дурну, кІарттух цябивкІсса.*

*Нава хъунма хъуну бунугу, ттигу
Ччива, вицІун лявкІун, вих вичІи дишин –
ВичІи дишин къюкІлил туннурдал тарглих,
Ина ттухва бивтсса яруннал парглих.*

*Ахиратрал ххуллийх ина ларгунна –
Къуниясса шиннур вил, ттуцал дакъа,
Амма, ттигу ттул дакІ цІунцІутІи дуллай,
Мудан ина дура дакІнивун духлай.*

*Ва ляличІий чІумул къизгъин оърмулий
Вил дакІнил хияллал накъич лирчІунни,
Ттуца вил аьналун, хІарачатирай,
Вил хияллал сурат дишин бювхъунни.*

*Вил хиял ттун талихІ чІа тІисса бия –
На му дузал бансса хІарачат бував,
ДакІ хъиншиврул къавтІи лахъансса бия –
Му лавхъун, лекъащан бюхъаймур бував.*



П аржу мартту

РОБИНДРАНАТ ТАГОР

Ттул мусил Бенгалия

Ттул аьзизсса Бенгалияй,
Ттул мусил Бенгалияй,
На вих ччаву хьуну ура.
Даиман вил ссавнил
Ттул дакIнил макъу дакъин дай,
Балабанттул кунна.

Инттухунмай, я ттул нинуй,
Вил багъирдал на ххихху итара,
ТалихIрайн уккан ара
Ваппабай, ттул шадшивуй!

Ссуттил тIурча, я ттул нинуй,
Ппиринжерал хьуруннай,

Ттун ккавказсар нацIусса пишру
Агъ, ххуйшиву, авуришиву вил!
КIукIлушиву ва ттIюнгъашиву вил!
Ина мурхъирдацIух
Неххал зумардацIух
дуртсса виргъанналул чIюлушиву!

Агъ, дакI дур гъалак дуклай,
На ура буруккинттай:
Я ттул нинуй,
Агана пашманишврл ххют
Вил симанналийн дагъарча,
Ттул яру мукъал буцIинссар!

Ингилис мазрая.

Таржума –Хизри Илиясовлул.

* * *

Мурад АХИМАДОВ

Ттун ина
макIра ккавказкунна,
лап аьнтIикIану,
жулва чанна цIуку
парх кусса
шиннардий кунма.

Ттун ина
Макира ккавказкунна,
Чавахъулттий ххют кунма!
Дя лирчIунни,
Дакъа хьунни макI,
ЛирчIунни ччаврия
Пашмансса аьш-бакI.

* * *

Ссавний цIуртти лавхъсаксса,
Ттун ина ххирассара,
Ххуллу бур никру дичлай,
Нама - вил хъирив лечлай.

Ттул ччаву абадлийссар,
Ххуттал хъирив хха буссар,

УцинтIиссара миннул
На вил хъхъичIун, ххирамур.

Вил чIан дакъа яруннил
Бярдавун на овъкъунна,
ЧIан дакъа ссутнил ссавний,
Бяйкъусса къурукъ куна!

* * *

*Ттул дакI-къакI ина бура,
Ина бакъа на цура,
Гъар ттун вил зунзул чани,
ЦичIав яла къачанни.*

*Вищал хъунаакъиннин,
Минутру ккалай ура,
Агъ, ттул оърмулуд бахтти
Ччаврил ивчIавай ура.*

*Ина ттуцалва буний,
Ттун буруккин къабикIай,
Ина чIарав бакъаний,
Ва ттул дакIний дард дикIай.*

*Агъ, ттул оърмулуд мяънай,
Ттул эшкъи-ччаврил мяъдан!*

* * *

*Ина бакъа къачча ттун ва дунъялгу,
Ина бакъа оърму – багъ, къавкъун найсса,
Ина бакъа цури цIукугу ссавний,
Чанигума цIанну чIалай буния.*

*Ина бакъа гъинттул гъелишив дакъар,
Оьбала, хъинбала личIи бан къашай,
Майдангу къумари, туснакъ укунма,
АхIмакъ хъуну гъангу чансса иш личIай.*

*Ина бакъа дунъял – къунналул авлахъ,
Ина буний – къавкъсса авлахърай чявхъа,
Ина бакъассаксса къюкI-мурчIи шара,
Лажинни, ххирамур, хаин машара!*

**Оърус мазрая.
Таржеума –Хизри Илиясовлул.**



Критика ва библиография

ЛАКРАЛ ЛИТЕРАТУРАЛУЛ ДАРСРУ МУЗЫКАЛУЦІУН ДАРХІУНУ ЛАХЪХЪАВУ

МАГЪДИЕВА П. М, литературалул секторданул хъунмур
элмийсса зузала ДНИИП

Лакрал литературалул дарсру дишаву цилва багъайкунсса даражалий гъаву мурадрай, учительнаша бюхълай бур ишла дан дарсирай искусстволул произведениярдащал архІал музыкалулмигу.

ЧІявусса литературалул произведенияртган хас буну чивчусса музыкалул произведенияртту дарсирай ишла баврил, оърчІан дарсирах гъира бувтун, темалуя кІулмур куртІ бан кумаг буллай бур.

Литературалул произведение лахъхъин диялсса чІун къадулаврин буну, учительнаша литературалул произведениялул мурадран хас буну чивчусса музыкалул оърчІру так ялттува бакъа кІул бан къашайссар (чІяруну му давугума дан къашайссар). Агарда ва даву классрал къатІувсса занятиярттай дачин дарча, вания хъунмасса хайр хъунтиссар.

Музыкалул кумаг бантиссар литературалул произведениярдал геройтурая кІулмур гъарта бан, мий хъхъичІ бацІан бан.

Музыкалул произведение ишла буну, дарс дишаврил къяйда дур укунсса: кутІану музыкалул произведениялуягу бувсун, оърчІащал вичІи дишайссар га произведениялух, яла ганин багъайсса къимат бишайссар, ахирданий учительнал кумаг байссар бувчІин мукъурттил ва музыкалул дахІаву.

Лакрал шаэртурал чІявусса назмурдан хас дурну, чирчуну дур макъанну, мий назмурду пасихІну дурккуну махъ бучІиссар мий балайлий шаллу даврих вичІи дишин. Мунил оърчІан хъунмасса асар биян байссар.

Яла чІявуну радиолувух, телевизорданувух шаллу буллай бур М. МахІаммадовлул, М-З. Аминовлул, М. Чариновлул, А. Мирзаевлул, Б. Рамазановлул мукъурттийн бувсса балайрду. Мий балайрду чивчусса электронний носительллу дур чІявумий школартгал литературалул кабинетирттаву. Вай носительллу ишла даврил оърчІан назмурдал гъанусса мяъна дурчІин кумаг бантиссар ва биян байсса асар гуж бантиссар.

Шаэртурал произведенияртту лахълахъини бакъагу, музыка ишла бан бучІиссар лахъи балайрду лахълахъинигу. Ласунну ярусаннал халкъуннал «Батир Хучулав» тІисса лахъи балай. Ва балай гъануну лавсусса опера сакин буну, мунил хасъсса музыка чивчуну бур Готфрид ХІасановлул. Опера ванал къуртал буну бур сувилку шиннардил ахирданий, сценалий тІурча бивхъуну бур ХХ векрал ахирданий.

«Батир Хучилав» тІисса балай буккиннин, бувчІин баннин ва балай сакин баврил тарихращал оърчІру кІул байссар. Бусайссар балай хъинну машгурсса бушиву. Балайлий дакІ даркъуну ивкІшиву оьруснал хъунасса чичу Л.Н. Толстойгу. Мунал халкъуннал балай бувккуну бивкІун бур «Хаджи – Мурат» тІисса повестьраха зузиний, П. Услардул оьрус мазрайн бувсса таржумалий. Балайлун къимат кутІану бивщуну бур: «Хучбардухасса балай аъжаивну ххуйсса бур» - куну.

Дагъусттаннал фольклордануха зий бивкIсса аьлимчу У. Б. Далгат чичлай бур: «Хучбардухасса балайлуву талатаврил ва виричушиврул яла бьохттулмур шачIану ккаккан бувну бур»¹, - тIий.

ЧIалачIисса куццуй, балай, так ярусаннал мазрай бакъа, машгурну бур цаймий дагъусттаннал мазурдийгу, масала, лакку мазрай. Цинявпагу мазурдийсса балайдавугу хъхьичI ацIлай ур цукунчIавсса душманная нигъа къаусайсса, къянкъасса виричу.

Ва балайлул гъануну оьрмулуву хъумур лавсъсар тIий бур. Тарихрал тIутIимунийн бувну, Гьидатуллал жяматрал ва Хунзахъиял щяраваллил дяниву ччясса заманная шиннайра зулмукартурал ва зулмулулу ливчIиминнал дяниву душманшиву диркIун дур.

Хунзахъиял хантурал, багтурал цалла ихтиярданулусса щяраваллурду хъямала дуллай бивкIун бур. Яла чIявумий баларду ХунзахърачIан гъансса Гьидатуллал жяматрайн бияйсса бивкIун бур. Хунзахъиял Гьидатуллаца гъаттара, ярагъ бакъассагу, аьрщивгу, хъусгу зеххайсса диркIун дур.

XVII ттуршукулул ахирданий ярусанная каялувшиву дуллай ивкIун ур зулмукар Нуцал-хан.

Мунал ханшиву дуллалисса чIумал, Гьидатул хъямала бувну бивкIун бур. Му чIумал Гьидатуллай бувсса зулмулул къясас ласуну бунтчи Хучбар ивкIун ур.

«Халкъуннал цашиву, куннахлу ку бувккун, чIарав бацIаву оьрмулул цакуцсса шартIирдал хъун дуллай дур. Амма му цашиву, захIматчий халкъуннал цакуцсса мурадру ва хияллу кунналсса куннан бувчIин бан хъиннува хъунмасса кумаг бувну бур цавай халкъуннал культура ва искусство гаймий халкъуннан кIулшиврул. Мунийн барашин дуллай бур лакрал ва даргаллал мазурдийн ттуршрахъул шиннардил хъхьичIава таржума бувсса «Хучбар» тIисса ярусаннал балайлул. Агана ва балайлул мурад, балайлуву бусала буллалисса ишру так ца ярусаннан бакъа хасъсса къабивкIессания, ва балай шаммайвагу халкъуннал цава цакуцну лахъисса чIумул манзилланий, ца никирал гамур никирайн тапшур буллай, я къахъунссия», – тIий чичлай ур лакрал чичу Ю. Хаппалаев.

Нуцал-ханнан Хучбар цацава тIайласса талатавриву ух ан къашайсса бувчIукун, мунал танмихI хIиллалийну буллай ур. Хучбардуйн хъатIуйнни куну, оьвкуну цIарал къавтIилий ччучлай ур. Амма виричу цIаравугу цувалу ччуччин ацIлай акъар. Мунал цащалва цIаравун Нуцаллул кIия мюрщисса оьрчIгу ххюрхху буллай ур.

Балай ляхъан баврил тарихращал оьрчIру кIул бувну махъ, буккайссар учительнал, мукъурттищалсса даву дайссар, буккин байссар оьрчIахъ. Бувккумур суаллал кумаграйну цIакъ байссар. Хъиривмур дарс произведение ххал бигъаврин хас дайссар.

БувчIанну балай ххал бигъаврийн. Ва балайлуву Хучбар оьрчIал хъхьичI ацIлай ур къянкъасса, халкъуннал чул бувгъуну талатисса виричуну. Виричунал хасият, ганал сипат яргну хъхьичI дацIан дан кумаг буллай бур ва балайлул дайдихъулийсса Хучбардул ва ванал ниттил дянивсса ихтилатрал. Хучбардул нину жула хъхьичI аькълу бусса, дуниял ва оьрму ххуйну кIулсса царссану дацIлай дур. Мунин кIулну бур хан лавмартсса, макрурдал увцIусса инсан ушиву. Мунин арс оьмуния уруччин ччай дур. Хучбар тIурча, цалла чувшиву лиян ччай акъар.

Балай, цаймигу лахъи балайрду кунма, ниттил ва арснал дянивсса ихтилатрая байбихълай бур.

¹ Далгат У.Б. Фольклор и литература народов Дагестана. ИЯЛ, 1962, с. 132.

*Хунзахъа Гьидатлив чапар увкІуна,
 Ярттациял Нуцал овтІий ури тІий.
 – ОвтІий ури хъатІуйн Хунзахъ Нуцаллул
 Гъававкъай къагъавав, ттул хъунна бавай?
 – Магъарала бавал, бавал ххира арс,
 Вин макру байссарча Хунзахъ Нуцаллул!
 – Валлагъ, къаикІанна, ттул хъунна бавай,
 Батиргу лагайва овкүсса кІанайн,
 Оьрмулий къалирсса Батир чувшиву,
 Царсса дуриуссар тІий, лиян къахъунссар.*

Хъамаличу хІисаврай лавгун ур Хунзахъун Хучбар, аьдатрай ханнан ва кулпатран ссайгъатругу лавсун. Амма къадарсса тІул дурну дур ханнал, зунттал халкъуннал хъамаллурал хІурмат байсса аьдатгу хъама риртун, хъамаличунайн ка гъаз дурсса.

Куннайн ку къаршисса, кунная ку хъинну архсса дур Хучбардул ва Нуцал-ханнал сипатру. Цукссагу ххуйри ханнал сипатнир Хучбардул сипат. Ханнашалсса ихтилатраву пІякъ диркІун чІалай дур Хучбардул хасиятрал лишанну, масала, тІайлашиву, къянкъашиву, багъний жаваб ччяни лякъаву. Нигъа къаувсун Хучбар буслай ур ханнахъ цалва мунан бувцири оьбалардая, мискинминнан бувцири хъинбалардая:

*Суал буллан ивкІри Хунзахърал Нуцал:
 – Заннаху, заннаху, Батир Хучулав,
 Ва жул шяравату цимий чув чан ав?
 – Циксса ливтІуссарив щил хІисав дави,
 МукъцІала нукарнайх тунаврду дачІав,
 – Ялагу заннаху, цІа дурк багъадур,
 Ва жул илхъилува цимий чу бугъав?
 – Цимий чу бувгъуриу зу хІисав дара,
 МукъцІала ятиннайх мукъ-мукъва бачІав.
 – Ялагу заннаху, Батир Хучулав
 Вай жул ттурзанная цимий чІи чан бав?
 – Миву-тивуминнул хІисав щил данссар,
 Вай цахъаннил оьрчІайх ттури-ттурива бачІав.*

Нуцаллул ва Хучбардул дянивсса ихтилатрава кІул хъанай бур дуклаки оьрчІан Хучбардул бувцири гъунарду. Ва ихтилатрал щалвагу балайлуву агъамсса кІану бугълай бур. Ихтилатрава оьрчІан кІул хъанай бур халкъуннал оьрму ххуй шаврил цІаний Хучбардул бувцири гъунарду. Мунир махъ балайлува оьрчІан кІул хъунтІий бур Хунзахъи Хучбардуй хъяй, му къякълунун ихълахъисса куц. Миннан ччай бур цалва бивкІулул хъхъичІ Хучбардудухъ цанна тяхъашиву дан ан: мунахъ балай уча, къавтІун изу тІий бур.

Ахирданийгу къуртал къашайшиву бувчІукун, къавтІун изаймишан дурну, Нуцаллул никирая ганал кІия мюршисса оьрчІгу хъап куну, га цІаравун ххяхлай ур.

Нуцал-хан гацІана аххана хъанай ур, цалва багъайхту, Хучбардудухъ лергъ тІий ур:

*– Заннаху, заннаху, Батир Хучулав,
 Ина ччуччин дакъар жу цІу дирхъусса!*

*Вин ссувхлат бан тIия жу цIу дирхъусса,
Мий кIива бургъил оьрчI шихунмай була.
Хучбар мунан жаваб дуллай ур:
Акъахъу, акъахъу, лавмарт Нуцал-хан,
Вил лавмартшивугу ттун кIулссияча!*

Нуцал-хан Хучбардун цалла ханшиву дулунна тIий ур, амма Хучбар ханнал къадаршиву къакIулну акъар.

ИвчIаннин хъхъичI Хучбардул дурсса къел оьрчIан дурчIин кумаг бантIиссар чичу – таржумачи Н. Къапиевал чивчумунил. Ва чичлай бур: «ЦIанакулсса буккултран тIайлану дурчIин дан аьркинни Хучбардул ивчIан хъхъичI дурсса къел. Микку дур ва балайлул кульминация (иш яла къызгъинмур чIун): виричу цIаравун ххяхлай ур Нуцал-ханнал кIия мюрщисса оьрчIашал. Ва ванал инсап дакъашивурир? Ягу ванал оьсса танмихIрив бувсса? Бакъар! Та чIумушал бавхIуну, шиву балай тIий бур багъавай бувсса танмихIрая. Хучбардул аьс буллай ур ханнал кIану бугъансса зулкукартал, миннал мархха гъануца ххартI буллай ур. Халкъуннал Хучбардул рахIму бакъашиву тIайла дуллай бур... рахIму – цIими бакъасса заманалуха лархъхъусса рахIму – цIими бакъасса аьдатругу дур.»²

ОьрчIан учительнал аьркинссар бувчIин бан Хучбар ханнал оьрчIашал цIаравун интикъам ласлай къаххяхшиву, мунал му ялун нанисса никирал талихIрахлусса махъра – махъсса талатаву диркIшиву.

Хучбар цIаравун ххяххаврийну произведениялул ахир дукIлай дакъар. ЦIараву аьзаврай, инсаннаца духIан къашайсса къювулий унугу, ханнал оьрчIру зана ба тIисса миннат къамул къабувну, Хучбар виричуну жан дуллай ур. Цалва кулпат ссукIурай, ханнахъул тачIаввагу ссалкIуй къайгъу бакъа, мискинминнал оь хIачIлай, хIазрай оьрму бутлай бикIаву Хучбардул ххаллилсса дакIнища бухIан къавхъуну бур. Хучбардул цалла кулпатрал чулухуннайсса ччаву чIалай дур балайлул махъсса ххару буклакинигу:

*– СсукIургу батIича нуцаллул царнил,
ЯтIулгу лаххича ттул ххира царнил,
Нуцаллул ичIуннай вай кIира нурчIи,
Батирдул ичIуннай вай кIира нурчIи!*

Дуклаки оьрчIан мискинминнал чул бувгъуну, миннахлу талатисса Хучбардул сипат ххуйну дурчIайсса ва гъансса дур. Учителънан аьркинссар миннал цалва лавхъхъусса балайлувасса Къайдардул ва Хучбардул сипатру цачIу дирхъуну, миннул цалашаву ва личIийшиву ххал дигъин. БучIиссар мий оьруснал тарихийсса балайрдавасса вирттал Степан Разин ва Емельян Пугачевлушал цачIу бивхъуну ххал бигъингу.

Мунияр махъ оьрчIахъ бусайссар дагъусттаннал чичултрал, композитор-турал, драматургтурал, художниктурал, цалла творчестволуву Хучбардухасса балай ишла бувну бушиву.

Балайлуя лавхъхъумур жям байсса дарсирдай бусайссар оьрчIахъ Хучбар тIисса лахъи балайлул мурад композитор Готфрид ХIасановлухъ бувсун бивкIшиву А. Къапиевлул, цуппа балай оьрус мазрайн таржума бувну, бившун бивкIун бур 1935-ку шинал, опералучIансса либретто (кутIасса текст) чирчуну диркIун дур Наталья Капиевал.

Ва опера чIявуссалийла сценалий бивхъуну бур, ттигу бихъланссар, ва ххал бан районнайсса оьрчIаша къахъунссар, къахъурчагу ваниясса дурчIала

² Песни народов Дагестана. Советский писатель 1970 г. (Вступительная статья Капиевой Н.)

учительнаша дулун бюхъайссар. Бусайссар оърчлахъ ва опералучлансса музикалул произведениялул гъавас члалачли буллай бушиву.

«Опералул цалчинмур суратраву члалачли буллай бур Хунзахъ, ханнал къатлуву хъанахъимур. Нуцаллун клул хъанай бур Хучбардул ханнал отрядгу ххит дурну, миннал дартлсса дишалагу махъуннай хъудугъултрахъхъун зана дуршиву. Ссибивзсса ханнан бувчллай бур цашава Хучбардуяр ялтту уккан къахъуншиву, мунияту хиллалийну мунацлухсса бан къаст лахллай ур. Мунайн хъатлийн оьвтлий ур.

Хучбар я цала ниттих, я шяравуцириннах вичли къадирхъуну, оьвчаву къамул дуллай ур.

(Килчинмур суратрай члалачли бувну бур Гьидатул) Хучбардун бувчллай бур ханнал цува къатлухъхъун ириян ан ччишиву, бухъурчагу ганан цала ас-намус оьрмунияр лавайну члалай, нигъачлавричлан най ур, цува шилклуй нигъа усун ккалли къааншиврул «Бивклу цалли бувчлайсса, бюхттулсса цла халкъуннаву личлайссар», тлий ур га.

Шамулчинмур суратраву члалачли бувну бур Хунзахърахъхъун Хучбар ирияву, миннал му угъаву, мукълчинмур суратраву Хунзахъату ливхъун увклсса Аьлил Нуцал ханнал учли акъашивриясса хавар, хъуннасса дардиравусса Гьидатул, Хучбардун кумагран гъан ччисса.

Хюлчинмур суратрай члалачли бувну бур Хучбар цанма хладур бувсса къавтлилувун ханнал клия арснашал ххяхлай. Гъалак бувксса халкъуннан бувчллай бур ханнан багъайсса танмихл хъушиву»³.

Бусайссар оърчлахъ Х.А. Хасановлул опералуву ишла бувну бушиву дагъусттаннал халкъуннал музыка, къавтлавуртту ва опералул темагу хлакьинусса кьинилунгу дучли дансса душиву. 1937-ку шинал чивчусса опера хлакьинусса кьинигу хъунмав къавхъушиву ва уттигу цикссалийлагу сценарттайн букканшиву.

Багъа бишун къашайсса дур Г. Хасановлул дурмур. Мунал чивчуну бур музыка дагъусттаннал театрдал 12 спектакльданун. Я бурган бансса бур мунал А. Салаватовлул чивчусса «Айгъази» тлссса пьесалунсса музыка. Ва пьеса 1943-45 шиннардий ккаккан бувну бивклун бур ттуршийла, музыкалуву композиторнал ишла бувну бивклун бур къумукънал халкъуннал балайрду. Танияр махъгу ва пьеса бихълай хъуну дур чларысса шинну.

Лакрал литературалул дарсирдай лахълай бур лавай ххал бивгъусса балайлул темалучлан гъансса «Бархъаллал Давди» тлссса лахъи балай. Балай лахълан хъхъичл оьрчлан бувчлин байссар халкъуннал балай цукунсса иширацлун бавхлуну ляхъан бувну буссарив ва кумаг байссар дурчлин мивуссаа сипатру.

Бусайссар балай хъинну гъансса бушиву яруссаннал Хучбардухасса балайлучлан. Яруссаннал виричу Хучбардул баклрачлан бувклмур, лакрал халкъуннал виричу Бархъаллал Давдил баклрачлангу бувклшиву.

«Лакрал агъалийнал бусалалийн бувну, – тлий чичлай ур Х.М. Халилов, Давди Агъларханначла къадину (судьяну) ивклун ур ва тлайласса унутлий халкъуннал бусравну ивклун ур. Мунихлуну ханнан му бат ан къаст лархлуну дур. Ханнал Давдийн хъамалу оьвкуну, къюлтлну загъру буллуну, ивчлан увну ур.

Балладалуву Давди дакл къянкъасса инсан ивклшиву члалай бур, нину, кулпат манарда тлий бунува, му ханначлан най ур.

Халкъуннал цала балайлуву Давди хъинну бусраврай ккаккан увну ур. Халкъуннал зид ханнайн, мунал дучли дакъасса къелуйн бур. Хъаннил буллумур къуру махъунмай зана къабанссар тлий, Агъларханнал цала къуруваллил хъунмурну дирклсса Зазахъ мунал къуру буцла чай ва гивун загъругу бичин бай.

³ Якубов Манашир. Отец дагестанской музыки. Махачкала: Дагкнигоиздат, 1980, с.72.

Къуртти къахIачIаншиврул, къирим булун къавхъур, чу булун къавхъур тIий ур яла махъ загърулул хханхха ччучлачисса Давди.»⁴

БувчIин байссар оърчIан вай кIивагу балайлуву чIявумур лавхъхъусса бушиву, масала, Хучбар ва Давди хантурачIан кулпатиртгал ва ниттихъал тIайла букваву, миннал ниттихъал аькълу, миннал къадарду.

Хучбардухасса балайлуву кунма «Бархъаллал Давди» тIисса балайлувугу буклакиминнан бувчIинтIиссар халкъ виричунал чулий бушиву.

ЧIалачIисса куццуй, Нуцал-ханнал ва Агълар-ханнал хIиллалий, хъяврин бувну, цацIанма хъамалу оьвкуну, Хучбар ва Давди литIлай бур.

Вай балайрдаву халкъуннал нааьна дуллай бур хантурайн ва миннал лавай бацIултрайн. Халкъ балайрдаву хантурал къадарсса тIулуу ва лухIисса ишру дащуй бихълай, ханнахъайнсса зид халкъуннаву ххишала буллай бур.

Бусайссар оърчIахъ, балай чIалачIиссаксса, халкъуннал ляхъан бувшиву XIX ттуршукулий, лакрай яла оьсса зулкукарсса хан Агълар каялувшиву дуллалисса чIумал, мунал цайнма мютIий къавхъуминнан хъунисса танмихIру бувну, къисас ласайсса бивкIшиву.

Балайлуя кIулмур жям бувну махъ, бувчIиссар В. Трофимовлул балай оьрус мазрай буклакисса кассеталул, ягу флешкалул кумаграйну оьрчIашал вичIидишин ва Сс.ХIусмановал балайлий щаллу буллалисса куццухгу вичIидишин. Ва даврил оьрчIан лавхъхъумур хъиннува цIакъ байссар.

Арулчинмур классраву оьрчIру «Хан-Муртазааьли» тIисса лахъи балайлул кумаграйну кIул хъунтIиссар XVIII ттуршукулул дайдихъулий дагъусттаннал халкъуннал цалла тархъаншиврул цIаний дуллай бивкIсса талатавуртгашал. Зунттал халкъуннал къажар Надир-шагънал чапхунчитурашалсса талатавуртгаясса балайрду цIанакулнин яхъуну бур лакрал, яруссаннал ва даргиял халкъунначIа. Лакрал ва яруссаннал Муртазааьлихасса лахъи балайрду хъинну кунничIан ку гъансса бур.

Балай лахъланнин бувчIин байссар оьрчIан, ва ляхъан баврин савав хъушиву къажар Надир-шагъ цала аьралуннашал шамулчингу Дагъусттаннайн ххяххаву. Х.М. Халиловлул чичлачимунийн бувну: «Гъарца чIумал мунайн къаршину буккайсса бивкIун бур зунттал халкъ. 1739-ку шинал Закаталлайсса Джардал-Белоканнал жяматру гъаз хъуну, Надир-шагънал уссу-Ибрагъим-хан ивкIуну ур. Уссихлу къисас ласунна тIий, му 1741-ку шинал Дагъусттаннал халкъуннайн къаршину увккун ур. Мунал оьттух къанихшиву хIат хIисав дакъасса диркIун дур. Уттининнин ливчIун бур мунал «Шагъ-къирман» (шагънал ччар) дуллай ивкIсса куццуясса бусалартту. Мюрщисса оьрчIашал хъами ттарацIув буккан бувну, дучрах ккуччу бувну бивкIун бур Гъулудав, Ахтгав.

1742-ку шинал му лакрал зунтгавун авчуну ур. Чулахъ Сурхайл анаварну бавтIсса аьралуннаща чIявусса шагънал аьралуннайн данди бацIан къавхъуну бур. Цала арс – Муртазааьлихъ бурттигьалтрашал Аьндалаллал тихун насу, куну, Чулахъ Сурхайл Надир-шагънал аьраллу бацIан буллай ивкIун ур, арсанн тихун гъансса тагъар сакин дуллай. Амма лагма дургъуну бухъувкун, цанма канийн гъан багъну бур. Шагъ кIилчинмур къини Муртазааьлил бурттигьалтрал хъирив авчуну ур.

ТтурчIиял зунттайн душман ивукун, мунайн данди буккан хIадур хъуну диркIун дур лакрал, яруссаннал, даргиял ва цайминнал къюкьри. Хъхъувай къажарнал дучри канаки буллалисса кIанайн къюлтIну гъан хъуну, къаралгу къатI бувну, дучри лихъан бувну бур. Хъхъувай, къакIулсса кIанттурдай хъирив агъан шагъ нигъа увсун ур.

КIюрххил цацIун хъусса Дагъусттаннал къюкьри къажарнайн ххярххун дур. Душманнан цивппа чIявусса бушиву ккаккан баншиврул, хъаннил

⁴ Халилов Х.М. ПартIу ПатIима. МахIачкъала. Дагъучпедгиз, 1972, с. 93

арамтуннал янна ларххун дур ва зунттал хъачІунттайх чарттал чІюйрду бувну бур. Гай архния аьралуннал кьюкьраха лавхъхуну бивкІун бур.

Муртузааьлил бурттигьалтрал Надир-шагьнал гьанумий аьраллу лихъ-лахъи бувну бур. Ираннал аьраллу ццаххандарал хьуну, лихълан бивкІун бур. Гай лихъан бувну бур ДербентуллачІан бияннин»⁵

Укунсса ихтилат бувну махъ, балайлувусса, оьрчІан букъавчІайсса мукъ-урттишалсса даву дайссар. Ялагу бучІиссар бусан оьрчІахъ ва лахъи балай гьануну лавсун М. Хуршиловлул «Аьндалал» тІисса пьеса чивчуну бивкІшиву. Му пьеса ккаккан бувну бивкІун бур кьумукьнал театрданул, муниципансса музыкагу чивчун бивкІун бур Г. ХІасановлул. Ва лахъи балай гьануну лавсун пьеса чивчуну бур ЦІ-А. Камаловлулгу, му бивхъуну бур сценалий лакрал театрданул.

Яла балайлул текст дуккайссар хъхъичІ учительнал, яла дуккин байссар ххуйну буккаймий оьрчІахъ. Балайлуву бур куннашал куннал буллалисса ихтилатругу. Мий кІанттурду рольлайх бавчІуну буккин барча, ххуйну хьунтІиссар, масала, Сурхай-ханнал ва Надир-шагьнал, Сурхай-ханнал ва Муртазааьлил, Муртазааьлил ва Надир-шагьнал дянивсса ихтилатругу. ОьрчІан бувчІумур суаллал кумаграйну цІакъ бан бучІиссар.

Дарсирал ахирданий оьрчІан зунттал халкьуннал чил билаятирттал чапхунчитурашалсса талатавурттая ци кІулну бузив цІуххайссар. Шаппа хьуниминнахъ мий талатавурттая кІулмур цІуххин маслихІат байссар.

Хъиривмур дарс балайлул анализран ишла дайссар.

Балай ххал бигьлагьини, оьрчІал я бурган байссар мунил мурад лябукла-кисса куццух.

Къажарнал чапхунчитурашалсса дявилуву чІалай бур дагъусттаннал миллатругу цашавриву хьунмасса гуж бушиву ва миннаша ччима кьатІаллил душман ххит ан бюхъантІишиву.

Учительнал бувчІин байссар оьрчІан, ва лахъи балайлун цІа «Хан-Муртазааьли» дунугу, шиву ца виричунал гьунардая балай тІий бакъашиву, ва бушиву цинявгу зунттал халкьуннал цалла тархъаншиврул цІанийсса гьунардаясса балай.

Лахълахъисса балайлул мяьналух, гиву гьуртту хъанахъиминнал куннал куннашалсса аралух бурувгукун чІалай бур, ва балайлувусса геройтурал ва иширттал куннийн ку кьаршисса личІишиву душиву. БучІиссар ххал дигьин оьрчІашал, зунттал кьюкьлул ва къажарнал аьралуннал, Муртазааьлил ва Надир-шагьнал дянивсса тапаватшиву цукунсса дуссаривгу.

Дуклаки оьрчІан бувчІин бан аьркинссар балай ляхъан бувсса халкъ, цалла Ватан зулмулуца ххассал даврил цІаний талатисса Муртазааьлил ва зунттал кьюкьлул чулий бушиву ва миннал хьуннасса ччавришал, эпитетирттай мяш къавхъуну, сакин дурну душиву Муртазааьлил сипат. Халкьуннал му лашан уллай бур кьарчигъайлуха, гьалбурцІиха, барзуха. Ва чІалачІи увну ур халкьуннал балайлуву ццах бакъасса, цалла зунттал Ватан хьинну ххирасса виричуну.

Лакрал аьрщи душманнал ххяппулун ларгукун, му уссурвалсса миллатирттал вирттаварая кьюкьагу сакин дурну, къажарнашал кІирисса талатаву дуллай ур.

Укунсса ххал бигъаву дурну махъ, оьрчІашал дакІинин бичайссар ряххулчинмур классраву лавхъхуну бивкІисса лахъи балайрду ва мий балайрдал геройтал Муртазааьлил чІарав бивхъуну ххал бигъайссар.

Лахъи балайлуя кІулмур жям баву мурадрай бучІиссар М. Дандамаевал шаллу буллалисса «Хан-Муртазааьли» тІисса балайлух вичІидишин элек-

⁵ Халилов Х.М. ПартІу ПатІима. МахІачкъала. Дагъучпедгиз, 1972, с. 31.

тронный носителлал кумаграйну ва мукунма вичИидишин оьрус мазрай В. Трофимовлул ва балай буклакисса куццух.

Ягу ласунну арулчинмур классраву оьрчIал лахьхьайсса «Багьадур Аьли» тIисса лахьи балай. Балай лахьлай байбишиннин бусайссар оьрчIахь балай-луву халкъуннал дащуй дихьлай бушиву хьунимий уссурваврал цала чIавама уссин дурсса хаиншиву, мунан дурксса луркIан. Хьунимий уссурварал лачин бугьан гьанну куну, Багьадур Аьли увцуну, уккан къашайсса муруллаву хIинчурай авхIуну увтун, гилува къаитлай бур. Ва къадарсса къел уссурварал дурну дур хьуслихсса къанихшиврул, буттая лирчIсса хьуслил Багьадур Аьлинсса бутIа цайхва бачIиншиврул.

ОьрчIан бувчIин бан аьркинссар лачин бугьан хьунисса арамталгу циван лагайсса бивкIссарив. Миннахь бусайссар хьхьичIава арамтал урттил хIайвантрах, лелуххантрах авлий наниний, каний махь бувсса лачингу бувцуну лавгун, мунил кумаграйну ав байсса бивкIшиву. Лачинналул оьрчIругу мюрщину бунува кюрттарава бувгьуну, авлий буцланма тIий, каний махь байсса бивкIшиву. Ва балайлувусса уссурвавралгу, му мурад багьана бувну увтхьунессия чIивима уссу муруллун.

Балайлувусса уссурваврал дурсса къадарсса къелуйн къаршину оьрчIал дакIурдиву гай оькки чулий ккаклакисса асарду хIасул шайссар, тIайласса, хьинсса виричу ххира шайссар. Бусайссар ва лахьи балай балладардавун багьлай бушиву, цанчирча, бувсун бунутIий ца кулпатравусса инсантурая, гайннал дянивсса аралуя. Балайлул ахиргу къумасса дур: Багьадур Аьли ивкIлай ур.

Ва бувчIин баву дурну махь, балай оьрчIащал классраву буккайссар. Балайлул биян бувсса асар гуж баву мурадрай бучIиссар электронный носительлал кумаграйну Сс. ХIусмановал балайлий шаллу буллалисса «Багьадур Аьли» тIисса балайлух оьрчIащал вичИидишин.

Лажь балайрду бакъассагу, литературалул дарсирдай лахьхьайсса цаймий назмурдугу шаллу дуллай бур балайлий жулва лакрал балайчитурал, масала, А. Мирзаевлул «ОьрчIан», «Бархьаллал урша», М-З. Аминовлул «Ттул нину», «Авчитал», «Ххуллухьин баннав», М. Чариновлул «Лакку кIану», «Ххит хьусса ваза», М. МахIаммадовлул «Ккуллалул цIалцIи», «Тахсир мабара» ва мукунма С, Къасумовлул, А.ХIажиевлул, М. Давыдовлул, И.МахIаммадовлул назмурду.

Вайннал балайрду учительнаща лякьин бюхьайссар интернетраву, лакрал сайтрай.





Гъази - Гъу.мучиял Юбури.мизит.

Индекс годовой 63334
Индекс полугодовой 73894



Тъази - Тъумуш.

НОВОЛУНИЕ
На лакском языке